

ମାର୍କ ଲିଖିତ ଯୀଶୁ ଖ୍ରୀଷ୍ଟଙ୍କ ସୁସମାଚାର ମାର୍କ ଅଲ୍ଲୀକାଦ୍ ଯୀଶୁ ଖ୍ରୀଷ୍ଟଆଃ ସୁକୁକାଜି ପାରିଚାଏ

ଯୀଶୁ ଖ୍ରୀଷ୍ଟଆଃ ଜୀଞ୍ଜାନକେ ଉଦୁବେତାନ୍ ନାଞ୍ଜା ନିୟାମ୍ଭାରଃ ଚାର୍ଡୁ ପୁଥୁକଏତେ ମାର୍କ ହବାଅଃତାନା ମିଆଁଦ୍ । ଏନ୍ ସବେନାଃକକେ “ସୁକୁକାଜି” କାଜିୟଃତାନା, ଏନାରଃ ମୁଣ୍ଡି “ବୁଗିନ୍ କାଜି” ତାନାଃ । ଯୀଶୁଆଃ ଗନଏଃ ତାୟମ୍ଭେ, ଏନ୍ ସୁକୁକାଜିକେ ମାଥୁଉ, ମାର୍କ, ଲୁକ, ଆତଃଯୋହାନ୍ ତିକୁ ଅଲ୍ଲୀକାଦାଃକ । ଉପୁନିୟା ସୁକୁକାଜିକଏତେ ମାର୍କ ହବାଅଃତାନା ସବେନ୍ଏତେ ହୁଡିଙ୍ଗ୍ । ନେ କାଜିୟଗି ବିଶ୍ୱାସଃ ତାନା ଯେ, ନେ ସୁକୁକାଜି ସବେନ୍ ସୁକୁକାଜି ଏତେ ସିଦା, ଯୀଶୁତାୟମ୍ ୬୫-୭୦ କରେ ଅଲ୍ଲୀକାନା । ତିମିନ୍ ବାଇବେଲ୍ ପାଣ୍ଡିଡକ ବିଶ୍ୱାସେତାନାକ, ରୋମ୍ଭେ ତାଇନଃତାନ୍ ଖ୍ରୀଷ୍ଟ ବିଶ୍ୱାସୀକକେ ବିଶ୍ୱାସ୍ରେ କେଟେଦଃ ନାଗେନ୍ତେ ରୋମ୍ଭେ ନେ ସୁକୁକାଜି ଅଲ୍ଲୀକାନ୍ ତାଇକେନା ।

ମାର୍କ, ଅକଏଚି ଯୋହାନ୍ ମାର୍କ ନୁଡୁମ୍ଭେ ସାରିଅଃତାଇକେନାଏ, ଇନିଃ ପାଉଲୁସ୍ ଆତଃ ବର୍ଣ୍ଣବାସ୍ଭାରଃ ଗାତି ତାଇକେନାଏ, ମେନ୍ଦ ଚିମ୍ତା ଇନିଃ ଇନ୍କୁଆଃ ସେଞ୍ଜାକାମିରଃ ସେନଃରେ ବାଗିକେଦ୍ତେ ରୁହାଡ୍ଫାନାଏ, ଇମ୍ତା ଇନିୟା ନୁଡୁମ୍ଭେ ଆଞ୍ଚ ହିଜୁଃୟାନା ପ୍ରେରିଡ୍ ୧୩:୧୩ । ତାୟମ୍ଭେ ଆତଃମିସା ଇନିଃ ବର୍ଣ୍ଣବାସ୍ଲଃ ସେଞ୍ଜାକାମି ନାଗେନ୍ତେ ସେନଃୟାନାଏ ପ୍ରେରିଡ୍ ୧୫:୩୭-୩୯ । ମାର୍କହଗି ପାଡ୍ଭାରାଃ ମିଆଁଦ୍ ଦୁଲାଡ୍ ଗାତି ମେନ୍ତେ ସାରିଅଃତାଇକେନାଏ ୧ ପାଡ୍ଭାରାସ୍ ୫:୧୩ । ମାର୍କ ଯୀଶୁଆଃ ଜୀଞ୍ଜାନକେ ମେଦ୍ତେ କାଏ ନେଲ୍ଲକାଇରେୟଗି, ବାଇବେଲ୍ ପାଣ୍ଡିଡକ ବିଶ୍ୱାସେତାନାକ ଯେ, ଇନିଃ ପାଡ୍ଭାରାଃ ଗାଞ୍ଜାଇଲେକାତେ ଆୟାଃ ସୁକୁକାଜିକେ ଅଲ୍ଲୀକାଦାଏ । ନେ

ସୁକୁକାଜିରେ ମାର୍କ ଚେଲାବାଇ ଆଡ଼ଃ ଚୁଣ୍ଡୁ ଦିପିଲି ବିଷାଏରେ ଯୀଶୁଆଃ ଇନିତୁକେ ଉଦୁବାକାଦା ।

ମାର୍କ ନେ ପୁଥୁରେ ଯୀଶୁ ଖ୍ରୀଷ୍ଟକେ ଲେବେଃ ଦାସି ଆଡ଼ଃ ଆପୁ ପାରମେଶ୍ଵାରରାଃ ସାନାଙ୍ଗ୍ ପୁରାନାଙ୍ଗ୍ ସବେନ୍ ନେଡାରେ ତାୟାରକାନ୍ କାଜି ମାନାତିଙ୍ଗ୍ ହନ୍କଡ଼ା ଲେକା ଉଦୁବିତାନାଏ, ଏନାମେନ୍ତେ ଇନିଃ ବିଶେଷକେଦତେ, ପ୍ରାଭୁ ଯୀଶୁଆଃ ପେଡେୟାନ୍ କାମିକ ବିଷାଏରେ ଅଲକେଦା । ଦିଶୁମ୍ବରାଃ ସବେନ୍କଡ଼ାଃରେ ପାରମେଶ୍ଵାରରାଃ ସୁକୁକାଜି ପ୍ରାଚାର୍ ରିକାରାଃ ମାରାଙ୍ଗ୍ ଆନ୍ତୁହଗି ନେ ସୁକୁକାଜିରେ ଅଲକାନା ।

ପୁଥୁ ଭିତରରେ ତାଇକାନ୍ କାଜି

- ୧. ବାପ୍ତିସ୍ମା ଏମଃନିଃ ଯୋହାନ୍ ଆଡ଼ଃ ଯୀଶୁଆଃ ବାପ୍ତିସ୍ମା । ୧:୧-୧୩
- ୨. ଗାଲିଲରେ ପ୍ରାଭୁ ଯୀଶୁଆଃ ସେଝା । ୧:୧୪-୯:୫୦
- ୩. ଯୀରୁଶାଲେମ୍ତେ ସେନଃ ଆଡ଼ଃ ମାନ୍ଦିର୍ ଅଡ଼ାଃରେ ବଲଃ । ୧୦:୧-୧୨:୪୪
- ୪. ହିଜୁଃ ବିଷାଏକରାଃ ଆୟାରକାଜି । ୧୩:୧-୩୭
- ୫. ଯୀଶୁଆଃ ଗନଏଃ ଆଡ଼ଃ ଜୀଉବିନିରିଦ୍ । ୧୪:୧-୧୬:୨୦

ଯୋହାନ୍ ବାପ୍ତିସ୍ମା ଏମଃନିଃରାଃ ପ୍ରାଚାର୍
(ମାଥୁଉ ୩:୧-୧୨; ଲୁକ ୩:୧-୧୮; ଯୋହାନ୍ ୧:୧୯-୨୮)

୧ ନେଆଁ ପାରମେଶ୍ଵାରଆଃ ହନ୍ ଯୀଶୁ ଖ୍ରୀଷ୍ଟ*ଆଃ ସୁକୁକାଜିରାଃ ଏନେଟେଦ୍ । ୨ ଯିଶାୟ ନାବୀ† ଅଲକାଦ୍ ପୁଥୁ ଲେକାଡେ,
“ପାରମେଶ୍ଵାର୍ କାଜିକେଦାଏ, ‘ଆଲେ ଆମାଃଏଡେ ସିଦାରେ
ଆଲେୟାଃ ଦୁଁଡକେଲେ କୁଲିତାନା
ଇନିଃ ଆମାଃ ନାଗେନ୍ତେ ପାହିଲାରେ ହରା ବାଇୟାଏ ।’
୩ ଜେତାଏ ମିହୁଡ୍ ବିରରେ କାଉରିକେଦାଏ,
‘ପ୍ରାଭୁଆଃ ହରା ବାଇୟେପେ,
ଆୟାଃ ଏଙ୍କବେଙ୍କ ହରା ସିଧାଏପେ ।’ ”

୪ ଏନ୍ତେ ବାପ୍ତିସ୍ମା ଏମଃନିଃ ଯୋହାନ୍ ବିରରେ ସେଟେରତାନ୍ଲଃ,
ଇନିଃ ହଡକକେ କାଜିୟାଦକଆ, “ପାପ୍ଏଡେ ମନ୍ତୁହାଡେପେ

* ୧:୧ ୧:୧ ମାସି, † ୧:୨ ୧:୨ କାଜି ଆୟାରନିଃ

ଆତ୍ମା ବାପ୍ତିସ୍ମାଅଃପେ, ଏନାରେ ପାର୍ମେଶ୍ଵର ଆପେୟାଃ ପାପକ ଛାମାପେୟାଏ ।” ^୫ ଏନ୍ତେ ଯିହୁଦା ରାଇଜ୍, ଯାରୁଶାଲେମ୍ ନାଗାର୍‌ଏତେ ଆତ୍ମା ଯାର୍ଦୀନ୍ ନାହିଁରାଃ ସବେନ୍ ହପର୍‌ଜାପାଃରେନ୍ ହତ୍ତକ ଯୋହାନ୍‌ତାଃ ଆୟୁମ୍ ନାଗେନ୍ତେ ହିଜୁଃୟାନାକ । ଏନ୍ତେ ହତ୍ତକ ଆକଆଃ ପାପକ ପାତିୟାରକେଦା ଏନ୍ତେ ଜନିଃ ଯାର୍ଦୀନ୍ ନାହିଁରେ ଜନ୍‌କୁକେ ବାପ୍ତିସ୍ମାକେଦକଆ ।

^୬ ଯୋହାନ୍ ଉର୍‌ରାଃ ଉବ୍‌ତେ ବାଇୟାକାନ୍ ଲିଜାଃ ତୁସିଙ୍ଗ୍‌ଅଁଃତାନ୍ ତାଇକେନାଏ, ଆୟାଃ ମାୟାଙ୍ଗ୍‌ରେ ଉହୁର୍‌ରାଃ କାସ୍‌ନା ତଲଃ ତାଇକେନାଏ ଆତ୍ମା ଜନିଃ ସନ୍‌ସରେଦ୍ ଆତ୍ମା ହୁରୁମ୍‌ସୁକୁ ଜମ୍‌କତାନ୍ ତାଇକେନାଏ । ^୭ ଜନିଃ ପାର୍‌ତାରେତାନ୍‌ଲଃ କାଜିୟାଦକଆଏ, “ଆଇଙ୍ଗ୍‌ଏତେ ପୁରାଃଗି ପେଡେୟାନ୍‌ନିଃ ଆଇୟାଃ ତାୟମ୍‌ତେ ହିଜୁଃତାନା, ଉଙ୍ଗ୍‌ଦକେଦ୍‌ତେ ଜନିୟାଃ ଖାର୍‌ପାରେୟାଃ ତନଲ୍ ରାଡାଏ ଲେକାନ୍‌ନିଃ ନାହିଁଲିଙ୍ଗ୍ ।” ଆଇଙ୍ଗ୍‌ଦ ଆପେକେ ଦାଆଃତେ ବାପ୍ତିସ୍ମାପେ ତାନାଇଙ୍ଗ୍, ମେନ୍‌ଦ ଜନିଃ ଆପେକେ ପାବିତାର୍ ଆମ୍‌ତେ ବାପ୍ତିସ୍ମା ଏମାପେୟାଏ ।”

ୟୀଶୁଆଃ ବାପ୍ତିସ୍ମା ଆତ୍ମା ବିଡାଅ
(ମାଥ୍‌ଉ ୩:୧୩-୪:୧୧; ଲୁକ ୩:୨୧-୨୨; ୪:୧-୧୩)

^୮ ଏନ୍ ଦିପିଲିରେ ଯୀଶୁ ଗାଲିଲ୍ ପାର୍‌ଗାନ୍‌ରେୟାଃ ନାଜ୍‌ରେଡ୍ ନାଗାର୍‌ଏତେ ଯାର୍ଦୀନ୍ ନାହିଁତେ ହିଜୁଃୟାନା, ଆତ୍ମା ଯୋହାନ୍ ଯୀଶୁକେ ବାପ୍ତିସ୍ମା ଏମ୍‌କିୟାଏ । ^୯ ଆତ୍ମା ଯୀଶୁ ଦାଆଃ ଭିତାର୍‌ଏତେ ବାହାରି ଅତଙ୍ଗ୍‌ୟାନ୍ ଜମ୍‌ତା ଜନିଃ ସିର୍‌ମା ନିଜାକାନ୍ ଆତ୍ମା ପାବିତାର୍ ଆମ୍‌ ଦୁଦୁମ୍‌ଲ୍‌ ଲେକା ଆୟାଃ ଚେତାନ୍‌ରେ ଆଡ୍‌ଗୁତାନାଏ ନେଲ୍‌କିୟା । ^{୧୦} ଆତ୍ମା ସିର୍‌ମାଏତେ ନେ'ଲେକା କାଜି ଆୟୁମ୍‌ୟାନା, “ଆମ୍‌ଗି ଆଇୟାଃ ଦୁଲାଡ୍ ହନ୍, ଅକଏକେଚି ଆଇଙ୍ଗ୍ ଦୁଲାଡାଃ; ଆମାଃତାଃରେ ଆଇୟାଃ ପୁରାଃଗି ସୁକୁ ।”

^{୧୧} ଜମ୍‌ତାଗି ପାବିତାର୍ ଆମ୍‌ ଯୀଶୁକେ ବିର୍‌ତେ ଜଦିକିୟା । ^{୧୨} ଯୀଶୁ ଏନ୍ତାଃରେ ବାର୍‌ହିସି ନିଦାସିଙ୍ଗି ତାଇକେନାଏ, ଆତ୍ମା ସାଏତାନ୍ ଜନିଃକେ ବିଡାଅକିୟା । ଜନିଃ ବିର୍‌ ଜାଁତୁକଲଃ

‡ ୧:୧୦ ୧:୧୦ ପାରା ✱ ୧:୧୧ ୧:୧୧ ମାଥ୍‌ଉ ୩:୧୭; ୧୨:୧୮; ମାର୍କ ୯:୭; ଲୁକ ୩:୨୨.

ତାଇକେନାଏ ଆଡ଼଼ ହିଜୁ଼କେଦତେ ଇନି଼କେ ସୁସାର୍
ଏଟେଦକିୟାକ ।

ୟୀଶୁ ଚାର୍ଝାନ କେଉଁକକେ କେଡ଼ାକତାନାଏ
(ମାଥୁଉ ୪:୧୨-୨୨; ଲୁକ ୪:୧୪-୧୫; ୫:୧-୧୧)

୧୪ ଯୋହାନ୍ ଜେହେଲୟାନ୍ ତାୟମ୍ତେ, ଯୀଶୁ ଗାଲିଲ୍
ସାହାରତେ ହିଜୁ଼ୟାନାଏ ଆଡ଼଼ ପାର୍ମେଶ୍ଵାରରାଃ ସୁକୁକାଜି
ଉଦୁବବାଡ଼ାକେଦାଏ । ୧୫ ✧“ନେତା ପୁରାୟାନା, ଆଡ଼଼
ପାର୍ମେଶ୍ଵାର୍ଆଃ ରାଇଜ୍ ଆପେତାଃ ନାଡ଼େୟାକାନା ! ଆପେୟାଃ
ପାପ୍ତହେତେ ମନ୍ରୁହାଡ଼େପେ ଆଡ଼଼ ସୁକୁକାଜିରେ ବିଶ୍ଵାସେପେ”
ମେକ୍ତେ ଇନି଼ କାଜିକେଦକଆଏ ।

୧୬ ଯୀଶୁ ଗାଲିଲ୍ ଦରେୟା ଗେନାଗେନାତେ ସେନଃତାନ୍ ଇମ୍ତା
ଶିମୋନ୍ ଆଡ଼଼ ଆୟାଃ ହାଗାତେ ଆହିୟକେ ଦରେୟାରେ ଜାଲୋମ୍
ହୁଦମାକେଦତେ ହାକୁ ସାବ୍ତାନ୍ ନେଲକେଦକିନାଏ, ଚିୟାଃତି
ଇନକିନ୍ଦ କେଉଁକିନ୍ ତାଇକେନା । ୧୭ ଯୀଶୁ କାଜିକେଦକିନାଏ,
“ଦେଲା ଆଇଙ୍ଗକେ ଅତଙ୍ଗିଇଙ୍ଗବେନ୍, ଆଇଙ୍ଗ ଆବେନ୍କେ
ହଡ଼କକେ ପାର୍ମେଶ୍ଵାର୍ତାଃତେ ଆଉତେୟାଃ ଇତୁବେନାଇଙ୍ଗ
।” ୧୮ ଇନକିନ୍ ଇମ୍ତାଙ୍ଗି ଜାଲୋମ୍ ବାଗିକେଦତେ ଯୀଶୁକେ
ଅତଙ୍ଗକିୟାକିନ୍ ।

୧୯ ଆଡ଼଼ ଯୀଶୁ ଏଡ଼ାଃଏତେ କାଟିଃସାଙ୍ଗିନ୍ ଆୟୁରତେ
ସେନ୍କେଦତେ ଜେବଦୀୟାଃ ହନ୍ ଯାକୁବ୍ ଆଡ଼଼ ଆୟାଃ ହାଗାତେ
ଯୋହାନ୍କେ ଲାଉକାରେ ଜାଲୋମ୍ ଚାପିତାନ୍ ନେଲକେଦକିନାଏ
। ୨୦ ଆଡ଼଼ ଇମ୍ତାଙ୍ଗି ଯୀଶୁ ଇନକିନ୍କେ କେଡ଼ାକେଦକିନାଏ,
ଆଡ଼଼ ଇନକିନ୍ ଆକିନାଃ ଆପୁ ଜେବଦୀକେ ନାଲାନାମ୍ ହଡ଼କଲଃ
ଲାଉକାରେ ବାଗିକେଦତେ ଯୀଶୁକେ ଅତଙ୍ଗକିୟାକିନ୍ ।

ବଙ୍ଗା ଏସେରାକାନ୍ ହଡ଼କେ ଯୀଶୁ ବୁଗିକିୟାଏ
(ଲୁକ ୪:୩୧-୩୭)

୨୧ ଏକ୍ତେ ଯୀଶୁ ଆୟାଃ ତେଲାକଲଃ କପରନାହୁମ୍ ସାହାରତେ
ସେନଃୟାନାଏ, ଆଡ଼଼ ଇନି଼ ରୁଡ଼ନ୍ ହୁଲାଙ୍ଗରେ ସାମାଜ୍ ଅଡ଼ାଃରେଃ

ବଲକେଦ୍‌ରେ ଧାରାମ୍ କାଜି ଉଦ୍‌ବ୍ ଏଟେଦ୍‌କେଦାଏ । ୨୨ ✠ଆୟାଃ ଧାରାମ୍ କାଜି ଆୟୁମ୍‌କେଦ୍‌ରେ ହଡ଼କ ଆକ୍‌ଦାନ୍‌ଆୟାନାକ, ଚିୟାଃଟି ଇନିଃ ଆଇନ୍ ଇଡୁକ ଲେକାଦ କାହା, ମେନ୍‌ଦ ମିଆଁଦ୍ ଆକ୍‌ଡେୟାର ନାମାକାଦ୍‌ନିଃଲେକା ଇନ୍‌କୁକେ ଧାରାମ୍ କାଜି ଉଦ୍‌ବ୍‌କ ତାଇକେନାଏ ।

୨୩ ଇମ୍‌ତାଗି ଇନ୍‌କୁଆଃ ସାମାଜ୍ ଅଡ଼ାଃରେ ମିଆଁଦ୍ ସଡ଼ରା ଆମ୍‌ତେ ଏସେରାକାନ୍ ହଡ଼ କାଉରିକେଦାଏ, ୨୪ “ହେ ନାଜ୍‌ରେଡ଼ରେନ୍ ଯାଶୁ, ଆଲେଲିଃ ଆମାଃ ଚିକାନ୍ କାମି ? ଆମ୍ ଚିନାଃ ଆଲେକେ ଜିୟନ୍ ନାଗେଡ଼େମ୍ ହିଜୁଆକାନା ? ଆମ୍ ପାର୍‌ମେଶ୍‌ଆଃ ପାବିତାର୍‌ନିଃ ତାନ୍‌ମେ, ଏନା ଆଇଙ୍ଗ୍ ସାରିତାନାଇଙ୍ଗ୍ ।”

୨୫ ଯାଶୁ ଇନିଃକେ ମାରାଙ୍ଗ୍‌ମତାକେଦ୍‌ରେ କାଜିକିୟାଏ, “ହାପାଅଃମେ, ଆଡ଼ଃ ଇନିଃତାଃଏତେ ଅଡ଼ଙ୍ଗ୍‌ଅଃମେ ।”

୨୬ ଏଡ଼େ ଏନ୍ ସଡ଼ରା ଆମ୍‌ା ଇନିଃକେ ମୁର୍କୁଟାଅକିୟାଏ ଆଡ଼ଃ କାଉରିତାନଲିଃ ଇନିଃତାଃଏତେ ଅଡ଼ଙ୍ଗ୍‌ୟାନା । ୨୭ ନେୟାଁ ନେଲ୍‌କେଦ୍‌ରେ ସବେନ୍‌କ ନେଲେକା ଆକ୍‌ଦାନ୍‌ଆୟାନାକ ଯେ, ଇନ୍‌କୁ ଆକ ଆକଗି କୁଲିୟାଃତାନ୍‌କ ତାଇନ୍‌କେନା “ନେୟାଁ ଚିକ୍‌ନାଃ ? ନେଆଁଦ ନାଞ୍ଜା ଇଡୁ ! ନିଃଦ ଆକ୍‌ଡେୟାର୍‌ରେ ସଡ଼ରା ଆମ୍‌ାକକେ ଅଡ଼ଙ୍ଗ୍‌ଅଃ ନାଙ୍ଗ୍ ଆଡୁକତାନାଏ ଆଡ଼ଃ ଇନ୍‌କୁ ଇନିୟାଃ କାଜିକ ମାନାଡ଼ିଙ୍ଗ୍‌ତାନା ।”

୨୮ ଆଡ଼ଃ ଯାଶୁଆଃ କାଜି ଇମ୍‌ତାଗି ଗାଲିଲ୍ ଦିଶୁମ୍‌ରାଃ କଟାକୁନି ସବେନ୍‌ସାଃରେ ନିଡିରୟାନା ।

ୟାଶୁ ଦୁକୁହାସୁତାନ୍‌କକେ ବୁଗିକୁତାନାଏ
(ମାଥୁଉ ୮:୧୪-୧୭; ଲୁକ ୪:୩୮-୪୧)

୨୯ ଇମ୍‌ତାଙ୍ଗ୍‌ଗି ଯାଶୁ ଆଡ଼ଃ ଆୟାଃ ଚେଲାକ ସାମାଜ୍ ଅଡ଼ାଃ ବାଗିକେଦ୍‌ରେ, ଯାକୁବ୍ ଆଡ଼ଃ ଯୋହାନ୍‌ଲିଃ, ଆହିୟ ଆଡ଼ଃ ଗିମୋନ୍‌ଆଃ ଅଡ଼ାଃରେ ସେନଃୟାନାକ । ୩୦ ଗିମୋନ୍‌ଆଃ ହାନାର୍‌ରେ ଉରିୟୁଡେ ପାର୍‌କମ୍‌ରେ ବାଟିୟାକାନ୍ ତାଇକେନାଏ, ଆଡ଼ଃ ଇମ୍‌ତାଗି ଇନିୟାଃ କାଜି ଯାଶୁକେ ଉଦ୍‌ବ୍‌କିୟାଃକ । ୩୧ ଏଡ଼େ ଯାଶୁ

✠ ୧:୨୨ ୧:୨୨ ମାଥୁଉ ୭:୨୮,୨୯.

ଇନିୟାଃ ଜାପାଃତେ ସେନୟାନିଃ ଇନିୟାଃ ତିଃଇ ସାବକେଦତେ ବିରିଦକିୟାଏ ଆତଃ ଇନିଃ ଉରିୟୁଏତେ ବୁଗିୟାନା, ଆତଃ ଇନିଃ ଇନକୁକେ ସୁସାର ଏଟେଦକେଦକଥା ।

୩୨ ସିଙ୍ଗିହାସୁରଃ ତାନରେ ହଡକ ପୁରାଃ ବଙ୍ଗା ଏସେରକାନ ଆତଃ ଦୁକୁହାସୁତାନ ସବେନ୍ ହଡକକେ ଯୀଶୁତାଃତେକ ଆଉକେଦକଥା । ୩୩ ଆତଃ ଏନ୍ ସାହାରରେନ୍ ହଡକ ଏନ୍ ଅଡ଼ାଃ ଦୁଆରରେକ ହୁଣ୍ଡିୟାନା । ୩୪ ଏନ୍ରେଦ ଯୀଶୁ ତିନିନ୍ ରାକାମ୍ରେନ୍ ହାସୁ ଦୁକୁତାନ ତିନିନ୍ ତିନିନ୍ ହଡକକେ ବୁଗିକେଦକଥାଏ, ଆତଃ ତିନିନ୍ ତିନିନ୍ ବଙ୍ଗାକକେ ହାରଅତଙ୍ଗ କେଦକଥାଏ, ଆତଃ ଇନିଃ ବଙ୍ଗାକକେ କାଏ କାଜି ଇତିକେଦକଥା, ତିୟାଃତି ଇନକୁ ଯୀଶୁକେ ସାରିତାଇକେନାକ ।

**ୟୀଶୁ ଗାଲିଲ୍ରେ ସୁକୁକାଜି ଉଦୁବକେଦାଏ
(ଲୁକ ୪:୪୨-୪୪)**

୩୫ ଏଗାଃ ହୁଲାଙ୍ଗ୍ ଆଙ୍ଗମାର୍ସାଲ୍ ଝୁଲ୍ପୁଲ୍ନୁବାଃ ତାଇନ୍ଲଃଗି ଯୀଶୁ ବିରିଦକେଦତେ ସିଃସଏଃ ଠାୟାଦତେ ସେନୟାନାଏ ଆତଃ ଏନ୍ତାଃରେ ବିନ୍ତ୍ରକେଦାଏ । ୩୬ ମେନ୍ଦ, ଶିମୋନ୍ ଆତଃ ଗାତି ତାୟାଃକ ଯୀଶୁକେ ଦାଣ୍ଠା ନାମକେଦତେ, ୩୭ ଆୟାଃତାଃକ ହିଜୁଃୟାନା ଆତଃ କାଜିକିୟାଃକ, “ସବେନ୍କ ଆମ୍କେ ଦାଣ୍ଠାବାଡ଼ାତାନାକ ।”

୩୮ ମେନ୍ଦ ଇନିଃ କାଜିୟାଦକଥାଏ, “ଦଲା, ଜାପାଃକରାଃ ହାତୁତେବୁ ସେନଆଃ, ଜେ'ଲେକାତି ଏନ୍ତାଃକରେହ୍ ଆଇଙ୍ଗ୍ କାଜିକ ଉଦୁବେୟାଈଙ୍ଗ୍, ତିୟାଃତି ଏନା ନାଗେନ୍ତେ ପାର୍ମେଶ୍ୱାର୍ ଆଇଙ୍ଗ୍କେ କୁଲାକାଇଙ୍ଗ୍ୟା ।”

୩୯ ☆ଏନ୍ତେ ଇନିଃ ଇନକୁଆଃ ସାମାଜ୍ ଅଡ଼ାଃକରେ ଇତୁକେଦକଥା ଆତଃ ବଙ୍ଗାକକେ ହାରତାନଲଃ ଗଟା ଗାଲିଲ୍ ହନରକେଦାଏ ।

**ୟୀଶୁ ମିଆଁଦ୍ ନାଗେଦାଅନିଃକେ ବୁଗି ତାନାଏ
(ମାଥୂ ୮:୧-୪; ଲୁକ ୫:୧୨-୧୬)**

୪୦ ମୁସିଙ୍ଗ୍ ହୁଲାଙ୍ଗ୍ ମିଆଁଦ୍ ନାଗେଦାଅନିଃ ଯୀଶୁତାଃ ଦେଙ୍ଗାଆସି ମେନ୍ତେ ହିଜୁଃୟାନାଏ, ଆତଃ ଇକ୍ଡ଼ୟୁକେଦତେ ବିନ୍ତ୍ରତାନଲଃ

☆ ୧:୩୯ ୧:୩୯ ମାଥୂ ୪:୨୩; ୯:୩୫.

କାଜିକିୟାଏ, “ଆମ୍ ସାନାଙ୍ଗ୍ରେଦ ଆଇଙ୍ଗ୍‌କେ ବୁଗିନିୟାର୍* ଦାଡ଼ିୟାମ୍ ।”

୪୧ ଏନ୍ତେ ଯୀଶୁ ଦାୟାତେ ପେରେୟାନାଏ ଆଡ଼ଃ ଆୟାଃ ତିଃଇ ଜିଲିଙ୍ଗ୍‌କେଦ୍‌ତେ ଜୁଟିଦ୍‌କିୟାଏ ଆଡ଼ଃ କାଜିକିୟାଏ, “ଆଇଙ୍ଗ୍ ସାନାଙ୍ଗ୍‌ତାନିଙ୍ଗ୍ ଆମ୍ ବୁଗିନିୟାରଃମେ ।” ୪୨ କାଜିତରସାଗି ଇନିୟାଃ ନାଗେଘାଅ ନିର୍‌ୟାନା ଆଡ଼ଃ ଇନିଃ ବୁଗିୟାନାଏ । ୪୩ ଏନ୍ତେ ଯୀଶୁ ଇମ୍‌ତାଗି ଏନ୍ତାଃଏତେ କୁଲ୍‌କିୟାଏ, ଆଡ଼ଃ ମାରାଙ୍ଗ୍‌ମତାତେ କାଜିକିୟାଏ, ୪୪ “ଆୟୁମେମେ, ଜେତାଏକେ ନେ କାଜି ଆଲମ୍ ଉଦୁବ୍‌କଆଃ, ମେନ୍‌ଦ, ଜୁ, ଯାଜାକ୍‌ତାଃରେ ଉଦୁବେନ୍‌ମେ ଆଡ଼ଃ ଇନିଃ ନେଲ୍‌ମେକାଏ, ଏନ୍ତେ ଆମ୍ ବୁଗିଫାଠ୍‌ରିୟାଃତେୟାଃ ସବେନ୍ ହଡ଼କଆଃ ସାରିନାଗେନ୍ତେ, ମୁଣା ହୁକୁମାକାଦ୍‌ଲେକା ଦାଣ୍ଠୋରାକାବେମେ ।”

୪୫ ମେନ୍‌ଦ ଏନ୍ ହଡ଼ ସେନଃୟାନ୍‌ତି ନେ କାଜି ସବେନ୍‌ତାଃରେ ଉଦୁବ୍ ଏଟେଦ୍‌କେଦାଏ, ଇନିୟାଃ ନେ କାଜି ମେନ୍ତେ ଯୀଶୁ ଜେତାନ୍ ସାହାଠ୍‌ରେ ହଡ଼କଆଃ ଆୟୁରରେ କାଏ ବଲ ଦାଡ଼ିକେନା, ଆଡ଼ଃ ସିଃସଏଃ ଠାୟାଦ୍‌ରେ ତାଇନ୍‌ବାଡ଼ାୟାନାଏ, ହଲେହିଁ ହଡ଼କ ସବେନ୍‌ସାଃଏତେ ଇନିଃତାଃତେ ହିଜୁଃତାନ୍ ତାଇକେନାକ ।

୨

ୟୀଶୁ ମିଆଁଦ୍ ବାଡ଼କାନ୍‌ନିଃକେ ବୁଗିକିୟାଏ
(ମାଥ୍‌ଉ ୯:୧-୮; ଲୁକ ୫:୧୭-୨୭)

୧ ଚିମିନ୍ ମାହିଁ ତାୟମ୍‌ତେ, ଯୀଶୁ କପର୍‌ନାହୁମ୍‌ତେ ଆଇଃକ୍ ତାଇନଃ ଅଡ଼ାଃତେ ରୁହାଡ଼୍‌ୟାନ୍‌ତି, ଅଡ଼ାଃରିୟା ମେନ୍ତେ ଇନ୍‌କୁ ଆୟୁମ୍‌କେଦା, ୨ ଏନ୍ତେଦ ହଡ଼କ ପୁରାଃଗି ହୁଣ୍ଡିୟାନ୍ତେ ଏନ୍ତାଃରେ ଦୁଆର୍‌ପିଣ୍ଡିଗିରେହ ଠାୟାଦ୍ କା ତାଇକେନା, ଆଡ଼ଃ ଯୀଶୁ ଇନ୍‌କୁକେ ବାଚାନ୍ ଉଦୁବାଦ୍‌କଆଏ । ୩ ଏନ୍ ଦିପିଲିରେ, ମିଆଁଦ୍ ବାଡ଼କାନ୍ ହଡ଼କେ ଚାର୍‌ଝାନ୍ ହଡ଼କ ଇନିଃତାଃତେକ ଗଅଃ ଆଡ଼କିୟା । ୪ ମେନ୍‌ଦ ଗାଦେଲ୍ ହଡ଼କ ନାଗେନ୍ତେ ଇନ୍‌କୁ ଯୀଶୁଆଃ ନାଡ଼େଃତେ

* ୧:୪୦ ୧:୪୦ ଯିହୁଦୀକଆଃ ଲେକାତେ ନାଗେଘାଅ ତାଇକାନ୍ ହଡ଼ ସଡ଼ରା କାଜିୟଃ ତାଇକେନା ଆଡ଼ଃ ପାର୍‌ମେଶ୍ୱାଠ୍‌ରାଃ ସେଞ୍ଜା କାଏ ଦାଡ଼ିତାଇକେନା

କାକ ସେନଦାଢ଼ିୟାନା । ଏନାମେନ୍ତେ ଯୀଶୁ ତିଜୁକାନୁତାଃରାଃ ଅତାଃ ସାଡ଼଼ି ଗେନାକେଦତେ, ଏନ୍ ବାଡ଼କାନନିଃକେ, ବାରିୟାକାନ ପାରକମଲଃଗି ଆଡ଼ଗୁକିୟାକ । * ଆତଃ ଯୀଶୁ ଇନ୍କୁଆଃ ବିଶ୍ୱାସ ନେଲକେଦତେ ବାଡ଼କାନନିଃକେ ମେତାଇୟାଏ, “ଏ ହନ୍ ଆମାଃ ପାପକ ଛାମାୟାନା ।”

୧୭ ଏନ୍ତାଃରେ ଦୁବାକାନୁ ଚିମିନ୍ ଆଇନ୍ ଇଡୁକ ଏନା ନେଲକେଦତେ ଆକ ଆକଆଃ ମନ୍ରେ ପାହାମକେଦାଃକ, ୧୮ “ନିଃ ଚିଲକାକେଦତେ ନେ ଲେକାଏ କାଜି ଦାଡ଼ିତାନ୍ ? ନିଃଦ ପାରମେଶ୍ୱାରକେ ନିନ୍ଦାଈତାନା, ମିହୁଡ଼କେ ବାରିକେଦତେ, ମେନ୍ଦ ପାରମେଶ୍ୱାର ବେଗାର ଅକଏ ପାପ ଛାମା ଏମ୍ ଦାଡ଼ିୟାଏ ।”

୧୯ ଇନ୍କୁ ଏନ୍ଲେକା ଆକଆଃ ମନ୍ରେ ପାହାମତାନା ମେନ୍ତେ ଯୀଶୁ ଇମ୍ତାଗି ଆୟାଃ ଆମ୍ରେ ଆଟକାରକେଦା, ଆତଃ ମେତାଦକଆଏ, “ଆପେ ଆପେୟାଃ ମନ୍ରେ ଚିନାଃପେ ଉଡ଼ୁତାନା ?” ୨୦ ଅକନାଃ ରାଝାଲାଃ, ନେ ବାଡ଼କାନନିଃକେ “ପାପ ତାମାଃକ ଛାମାୟାନା” କାଜିତେୟାଃ ରାଝାଲାଃ* ଚି “ବିରିଦମେ, ପାରକମ୍ ତାମାଃ ଗଅଃକେଦତେ ସେନଃମେ” ମେନ୍ତେ କାଜିତେୟାଃ ରାଝାଲା ? ୨୧ ମେନ୍ଦ ଆପେ ସାରିଦାଡ଼ି ନାଗେନ୍ତେ ଉଦୁବାପେତାନାଇକ୍ ନେ ଅତେଦିଶ୍ୱମ୍ରେ ପାପ ଛାମାରେୟାଃ ଆକ୍ତେୟାର୍ ମାନଝାହନ୍ଆଃ† ମେନାଃ, ଏନ୍ ବାଡ଼କାନନିଃକେ କାଜିକିୟାଏ, ୨୨ ଆଇକ୍ କାଜିମେତାନାଇକ୍, “ମାର ବିରିଦମେ ଆତଃ ପାରକମ୍ତାମାଃ ଗଅଃକେଦତେ ଆମାଃ ଅତାଃତେ ସେନଃମେ ।”

୨୩ ଇମ୍ତାଗି ଇନିଃ ବିରିଦୟାନାଏ, ଆତଃ ଆୟାଃ ପାରକମ୍ ଗଅଃକେଦତେ ସବେନ୍କଆଃ ସାମନାକ୍ରେ ସେନଃୟାନାଏ, ଏନାତେ ସବେନ୍କ ଆକ୍ଦାନ୍ଦାଅଃତାନଲଃ ମେନ୍କେଦାଃକ “ନେ ଲେକା ଚିଉଲାହ କାରୁ ନେଲକାଦ୍ ତାଇକେନା, ଆତଃ ପାରମେଶ୍ୱାରକେ ମାରାକ୍କିୟାକ ।”

ଯୀଶୁ ଲେବୀକେ କେଡ଼ାଇତାନାଏ
(ମାଥୁର ୯:୯-୧୩; ଲୁକ ୫:୨୭-୩୨)

୧୩ ଆତଃଗି ଯୀଶୁ ଗାଲିଲ୍ ଦରେୟା ଗେନାତେ ସେନଃୟାନାଏ, ଗାଦେଲ୍ ହଡ଼କ ଇନିଃତାଃକ ହିଜୁଃୟାନା ଆତଃ ଇନିଃ ଇନ୍କୁକେ

* ୨:୯ ୨:୯ ସାହକ୍ † ୨:୧୦ ୨:୧୦ ଯୀଶୁ

ଇତୁ ଏଟେଦକେଦକଆ । ୧୪ ଆୟାତରେ ସେନଃତାନ୍ ଦିପିଲିରେ ଆଲ୍‌ଫିୟାନ୍‌ରାଃ ହନ୍ତେକଡ଼ା ଲେବୀ ଆୟାଃ ମାଲ୍‌ହାରମ୍ ଠାୟାଦରେ ଦୁବାକାନ୍ ନେଲ୍‌କେଦତେ ଯୀଶୁ କାଜିକିୟାଏ, “ଦେଲା ଅତଙ୍ଗଇଙ୍ଗମେ ।” ଏନ୍ତେ ଇନିଃ ବିରିଦକେଦତେ ଅତଙ୍ଗକିୟା ।

୧୫ ତାୟମ୍ ଦିପିଲିରେ ଯୀଶୁ ଲେବୀଆଃ ଅଡ଼ାଃରେ ଜମ୍‌ନାଙ୍ଗ୍ ଦୁବାକାନ୍ ତାଇକେନାଏ, ଇମ୍‌ତାଙ୍ଗ୍ ଯୀଶୁକେ ଅତଙ୍ଗଇଁତାନ୍ ପୁରାଃ ମାଲ୍‌ହାରମ୍‌କ, ପାପିକ ଯୀଶୁ ଆଡ଼ଃ ଆୟାଃ ତେଲାକଲଃ ଜଜମ୍‌କ ଦୁବ୍‌ୟାନା । ୧୬ ଫାରୁଶୀକଏତେ ଚିମିନ୍ ଆଇନ୍ ଇତୁକ, ଯୀଶୁକେ ମାଲ୍‌ହାରମ୍ ଆଡ଼ଃ ପାପିକଲଃ ଜମ୍‌ତାନ୍ ନେଲ୍‌କେଦତେ ଆୟାଃ ତେଲାକକେ କାଜିୟାଦକଆକ “ଚିନାଃମେନ୍ତେ ଇନିଃ ନେ ଲେକାନ୍ ହଡ଼କଲଃ ଜମ୍‌ତାନାଏ ?”

୧୭ ଯୀଶୁ ନେୟା ଆୟୁମ୍‌କେଦତେ କାଜିୟାଦକଆଏ, “ବୁଗିନ୍ ହଡ଼କ ନାଗେନ୍ତେ ମେନ୍ତେଦ କା, ମେନ୍‌ଦ ହାସୁତାନ୍‌କ ନାଗେନ୍ତେ ବାଇଦ୍ ଲାଗାତିଙ୍ଗୟାଃ, ଧାର୍‌ମାନ୍ ହଡ଼କକେ କେଡ଼ା ନାଗେନ୍ତେଦ କା ମେନ୍‌ଦ ପାପିକକେ କେଡ଼ା ମେନ୍ତେଇଙ୍ଗ୍ ହିଜୁଃକାନା ।”

କାଟାବ୍‌ରେୟାଃ କୁନୁଲି
(ମାଥୂଃ ୯:୧୪-୧୭; ଲୁକ ୫:୩୩-୩୯)

୧୮ ଯୋହାନ୍ ଦୁବାକ୍‌ରାଃ ତେଲାକ ଆଡ଼ଃ ଫାରୁଶୀକ କାଟାବ୍‌ ତାଇକେନ୍ ଦିପିଲିରେ ଚିମିନ୍ ହଡ଼ ଯୀଶୁତାଃ ହିଜୁଃକେଦତେ କୁଲିକିୟାକ, “ଚିନାଃମେନ୍ତେ ଯୋହାନ୍ ଦୁବାକ୍‌ରାଃ ତେଲାକ ଆଡ଼ଃ ଫାରୁଶୀକଆଃ ତେଲାକ କାଟାବାଃ ? ମେନ୍‌ଦ ଆମାଃ ତେଲାକଦ କାକ କାଟାବାଃ ?”

୧୯ ଯୀଶୁ ମେତାଦକଆଏ, “ଆଣ୍‌ଦିଅଡ଼ାଃରେ ଦୁହ୍ଲୀକଡ଼ା ବାଲାକଲଃ ତାଇନଃରେ, ବାଲାକ ଚିଲ୍‌କାତେ ରେଙ୍ଗେଃ କାଟାବ୍‌ଗି ତାଇନାଃକ ? କାହାଗି, ଏନ୍‌କାଦ କା ହବାଅଆଃ ଆକଲଃ ଦୁହ୍ଲୀକଡ଼ା ତାଇନଃ ଜାକେଦ୍ କାକ କାଟାବ୍‌ ଦାଡ଼ିୟାଃ ।” ୨୦ ମେନ୍‌ଦ ନେତା ତେବାଗାଃ, ଆଡ଼ଃ ଦୁହ୍ଲୀକଡ଼ାକେ ଇନ୍‌କୁଆଃ ଆଲାଏତେ ଇଦିୟାଆ, ଏନ୍ ଦିପିଲିରେ ଇନ୍‌କୁ ରେଙ୍ଗେଃ କାଟାବ୍‌ ରିକାଏୟାକ ।

୨୧ “ଜେତାଏ ନାଞ୍ଜା ଲିଜାଃରାଃ କେତାଃ ମାରି ଲିଜାଃରେ ଜଡ଼ାଇକେଦତେ କାଏ ତୁନାଏୟା, ଏନ୍‌କାଲେରେ ନାଞ୍ଜା ଲିଜାଃରାଃ କେତାଃ ମାରି ଲିଜାଃଏତେ ଆଡ଼ଃଗି ଚେତାଃ ଇଦିୟାଏ, ଆଡ଼ଃ ଏନ୍

ଚେରାଃ ସିଦାଏତେ ଆଡ଼ଃଗି ମାରାଙ୍ଗ ଇଦିୟଃଆ । ୨୨ ଆଡ଼ଃ ନାଞ୍ଜା ଦାଖିରାସିକେ ମାରି ଉହୁରୁତୁମ୍ବାରେ ଜେତାଏ କାକ ଦୁଲ୍‌ପେରେଜେୟା, ଏନକାଲେରେ ଦାଖିରାସି ଉହୁରୁତୁମ୍ବାକେ ଅଡ଼େଃତାଃଏ ଆଡ଼ଃ ଦାଖିରାସି ଲିଙ୍ଗି ଏଣ୍ଡାଗଃଆ, ଏନାମେନ୍ତେ ନାଞ୍ଜା ଦାଖିରାସିକେଦ ନାଞ୍ଜା ଉହୁରୁତୁମ୍ବାରେ ପେରେଜାଃକ ।”

ରୁଡ଼ନୁ ହୁଲାଙ୍ଗରେଆଃ କୁନୁଲି
(ମାଥୁଉ ୧୨:୧-୮; ଲୁକ ୬:୧-୫)

୨୩ ମୁସିଙ୍ଗି ରୁଡ଼ନୁ ହୁଲାଙ୍ଗ ଯୀଶୁ ହେରାକାନ୍ ପିଡ଼ି ଆଲାଆଲାତେ ଚେଲାକଲଃ ସେନଃତାନ୍ ତାଇକେନାଏ, ଆଡ଼ଃ ଇନିୟାଃ ଚେଲାକ ସେନତାନ୍‌ଲଃ ଗେଲେକ ହଦ୍ ଏଚେଦ୍‌କେଦା । ୨୪ ଆଡ଼ଃ ଫାରୁଗୀକ ଯୀଶୁକେ କାଜିକିୟାଃକ, “ନେଲେମେ, ରୁଡ଼ନୁ ହୁଲାଙ୍ଗରେ ଆମାଃ ଚେଲାକ ଆଇନ୍ ଲେକାତେ ଅକ୍‌ନାଃ କା ଠାଉକାନ୍ କାମି ତାନାଃ, ଏନା ଚିନାଃମେନ୍ତେକ ରିକାତାନା ?”

୨୫ ଯୀଶୁ ଇନକୁକେ କାଜିରୁହାଡ଼ାଦ୍‌କଆଏ, “ଦାଉଦ୍‌ଆଃ ଜମେୟାଃ କା ତାଇକେନା ଇମ୍‌ତା ଇନିଃ ଆଡ଼ଃ ଆୟାଃ ଗାତିକ ରେଙ୍ଗେଃୟାନ୍ ଇମ୍‌ତା, ଇନିଃ ଚିନାଃଏ ଚିକାକାଦ୍‌ ତାଇକେନା, ଏନା ଚିଉଲାହ ଚି କାପେ ପାଡ଼ାଅକାଦା ? ୨୬ ଚିଲ୍‌କା ଇନିଃ ମାରାଙ୍ଗ ଯାଜାକ୍ ଅବିୟାଅରୁରାଃ ସାମାଏରେ ପାର୍‌ମେଣ୍ଡାୟାଃ ଅଡ଼ାଃତେ ବଲ୍‌ୟାନା ଆଡ଼ଃ ଅକ୍‌ନାଃକେଚି ଆଇନ୍ ଲେକାତେ ଯାଜାକ୍‌କକେ ଏସ୍‌କାର୍ ଜମେବାଇୟାଃ ହଲ୍‌ଙ୍ଗକେ ଜମ୍‌କେଦାଏ ଆଡ଼ଃ ଆୟାଃ ଗାତିକକେୟ ଜମ୍‌ନାଙ୍ଗ୍ ଏମାଦ୍‌କଆଏ ।”

୨୭ ଆଡ଼ଃ ଚୁଣ୍ଡୁରେ ଯୀଶୁ ମେତାଦ୍‌କଆଏ, “ରୁଡ଼ନୁ ହୁଲାଙ୍ଗକେ ମାନଞ୍ଜାରାଃ ବୁଗିନାଃ ନାଗେନ୍ତେ ବାଇୟାକାନା, ମେନ୍‌ଦ ମାନଞ୍ଜାକେ ହାମ୍‌ଲ୍‌ତେ ତେନ୍ ନାଗେନ୍ତେ କାହାଗି । ୨୮ ନେ ଲେକାଗି ମାନଞ୍ଜାହନ୍ ରୁଡ଼ନୁ ହୁଲାଙ୍ଗରେନ୍ ହୁଁ ଗମ୍‌କେ ତାନିଃ ।”

୩

ୟୀଶୁ ରହଡ଼ିଃଇନିଃକେ ବୁଗି ତାନାଏ
(ମାଥୁଉ ୧୨:୯-୧୪; ଲୁକ ୬:୬-୧୧)

୧ ଏନ୍ତେ ଯୀଶୁ ସାମାଜ୍ ଅଡ଼ାଃତେ ବଲ୍‌ୟାନା, ଏନ୍ତାଃରେ ତିଃଇ ରହଡ଼ାକାନ୍ ମିଆଁଦ୍ ହଡ଼ ତାଇକେନାଏ । ୨ ଆଡ଼ଃ ଯୀଶୁ ରୁଡ଼ନୁ

ହୁଲାଙ୍ଗରେ ଏନ୍ ହତକେ ବୁଗିୟାଏ ଚି କା ମେନ୍ତେ ଚିଟାଇ ନାଗେନ୍ତେ ଚିମିନାଙ୍ଗ ହତକ ହରାକ ଦାଣ୍ଟାତାନ୍ ଆତଃ ଲତଇତାନ୍କ ତାଇକେନା । ୩ ଯୀଶୁ ତିଃଇ ରହଡ଼ାକାନ୍ ହତକେ କାଜିକିୟାଏ, “ଏଲା, ସବେନ୍କଆଃ ଆଲାରେ ତିଙ୍ଗୁନ୍ମେ ।”

୪ ଏନ୍ତେ ଯୀଶୁ ଇନ୍କୁକେ କାଜିୟାଦକଆଏ, “ଆବୁଆଃ ଆଇନ୍ଲେକାତେ ରୁଡ଼ନ୍ ହୁଲାଙ୍ଗରେ ଅକନ୍ କାମି ରିକା ଲାଗାତିଙ୍ଗୟାଃ ? ମିହୁଡ଼ଆଃ ବୁଗିନ୍ ରିକାତେୟାଃ ଚି ଏଡକାନ୍ ରିକାତେୟାଃ ? ମିହୁଡ଼ଆଃ ଜୀଉ ବାଆଅତେୟାଃ ଚି ଜୀଉ ଗଗଏଃତେୟାଃ ?” ମେନ୍ଦ ଇନ୍କୁ ଇନିଃକେ ଜେଡନାଃ କାକ କାଜିରୁହାଡ଼ ଦାଡିକେନା ।

୫ ଏନ୍ତେ ଇନ୍କୁଆଃ କେଟେଦ୍ ମନ୍ ନେଲକେଦ୍ତେ ଯୀଶୁଆଃ ମନ୍ ଦୁକୁୟାନା, ଆତଃ ଖ୍ୱତେ ଇନ୍କୁକେ ନେଲବିୟୁର୍ କେଦକଚି ଏନ୍ ହତକେ ମେତାଇୟାଏ, “ତିଃଇତାମାଃ ଜିଲିଙ୍ଗୟେମେ,” ଇନିଃ ତିଃଇ ଜିଲିଙ୍ଗକେଦାଏ, ଆତଃ ତିଃଇତାୟାଃ ପୁରାଗି ବୁଗିରୁହାଡ଼ୟାନା । ୬ ଆତଃ ଫାରୁଶୀକ ଅତଙ୍ଗକେଦ୍ତେ ଯୀଶୁକେ ଚିଲକାତେବୁ ଗଜିୟା ମେନ୍ତେ ଇମ୍ତାଗି ହେରୋଦ୍ ରାଜାରାଃ ହତକଲଃ ରଜୋଟ* କେଦାଃ ।

ଗାଦେଲ୍ ହତକ ଯୀଶୁକେକ ଅତଙ୍ଗଇତାନା
(ମାଥୁଉ ୪:୨୩-୨୫; ୧୨:୧୫-୧୬; ଲୁକ ୬:୧୭-୧୯)

୭ ଏନ୍ତେ ଯୀଶୁ ଆୟାଃ ତେଲକଲଃ ଗେନାକେଦ୍ତେ ଗାଲିଲ୍ ଦରେୟାସାଃତେ ସେନଃୟାନାଏ, ଆତଃ ଗାଲିଲ୍ ଆତଃ ଯିହୁଦାଏତେ ଗାଦେଲ୍ ହତକ ଇନିଃକେକ ଅତଙ୍ଗକିୟା, † ଯୀରୁଶାଲେମ୍, ଇତ୍ରୁମ୍, ଯାର୍ଦାନ୍ ଗାଡ଼ା ହାନ୍ପାରମ୍, ସୋର୍ ଆତଃ ସିଦୋନରାଃ ହପର୍ଜାପାଃ ନାଗାର୍କଏତେ ପୁରାଃ ଗାଦେଲ୍ ହତକ ଇନିୟାଃ ସବେନ୍ ମାପରାଙ୍ଗ୍ କାମି ରିକାରେୟାଃକାଜି ଆୟୁମ୍କେଦ୍ତେ ଇନିଃତାଃତେକ ହିଜୁୟାନା । ୯ ☆ଏନ୍ତାଃରେ ହତକ ହୁଣ୍ଡିୟାନ୍ତି ଇନ୍କୁଆଃ ଉପୁଦୁର୍ଠେପସାଅ† ଏତେ ବାଆଅ ନାମେ ନାଗେନ୍ତେ ଯୀଶୁ ଆୟାଃ ନାଙ୍ ମିଆଁଦ୍ ଲାଉକା ଜଗାଡ଼ନାଙ୍ଗ୍ ତେଲକକେ

* ୩:୬ ୩:୬ ବିଚାର୍/ ମନ୍ତ୍ରଣା ☆ ୩:୯ ୩:୯ ମାର୍କ ୪:୧; ଲୁକ ୫:୧-୩. † ୩:୯ ୩:୯ ଠେଲପେଲା

କାଜିକେଦକଆଏ । ^{୧୦} ଚିୟାଃଚି, ଯୀଶୁ ପୁରାଃ ହଡକକେ ବୁଗିକାଦକ ତାଇକେନା, ଏନାମେନ୍ତେ ଦୁକୁହାସୁତାନ୍ ସବେନ୍କ, ଇନିଃକେ ଜୁଚିଦି ନାଗେନ୍ତେ ଇନିଃତାଃ ଜୁରୁହୁଣ୍ଡିନ୍ତାନ୍କ ତାଇକେନା । ^{୧୧} ଆତଃ ସତରା ଆମ୍ବାତେ ଏସେରାକାନ୍ ହଡକ ଇନିଃକେ ନେଲ୍ତାଇଲଃଚି ଇନିୟାଃ କାଟାସୁବାରେ ଉୟୁଗେନ୍ତାନ୍କ ତାଇକେନା, ଆତଃ “ଆମ୍ବି ପାର୍ମେଶ୍ୱାର୍ଆଃ ହନ୍ ତାନ୍ମେ” ମେନ୍ତେକ କାଉରିତାଇକେନା ।

^{୧୨} ଏନ୍ତେଦ ଆଇୟାଃ ବିଷାଏରେ ଏଟାଃକକେ ଆଲ୍ପେ କାଜିକଆ ମେନ୍ତେ ଇନିଃ ଇନ୍କୁକେ ମାରାଙ୍ଗମଟା କେଦକଆଏ ।

**ୟୀଶୁ ଗେଲ୍‌ବାର୍ କୁଲ୍‌କାନ୍‌କକେ ସାଲାକେଦକଆଏ
(ମାଥୁଉ ୧୦:୧-୪; ଲୁକ ୬:୧୨-୧୬)**

^{୧୩} ଏନ୍ତେ ଯୀଶୁ ବୁରୁତେ ରାକାବୟାନାଏ, ଆତଃ ଆୟାଃ ସାନାଙ୍ଗଆଁକାଦକକେ ଆୟାଃତାଃତେ କେଡାକେଦକଆଏ, ଆତଃ ଇନ୍କୁ ଇନିଃତାଃତେକ ହିଜୁଃୟାନା । ^{୧୪} ଆତଃ ଇନିଃ ଗେଲ୍‌ବାର୍ ‡ପ୍ରେରିଡକକେ ସାଲାକେଦ୍ତେ, ଇନ୍କୁକେ ପ୍ରେରିଡ ମେନ୍ତେ ନୁଡୁମକେଦକଆଏ । ଇନିଃ ଇନ୍କୁକେ କାଜିକେଦକଆଏ, “ଆଇଙ୍ଗଲଃ ତାଇନଃ ନାଗେନ୍ତେ ଆପେକେ ସାଲାକାଦପେଆଇଙ୍ଗ, ଆତଃ ସୁକୁକାଜି ଉଦୁବ ନାଗେନ୍ତେଇଙ୍ଗ କୁଲ୍‌ପେୟା । ^{୧୫} ଆତଃ ବଙ୍ଗାକ ହାର୍‌ଅଡଙ୍ଗ ନାଗେନ୍ତେ ଆପେକେ ପେଡେଃ ଏମାପେୟାଇଙ୍ଗ ।”

^{୧୬} ଯୀଶୁ ନେ ଗେଲ୍‌ବାର୍ କୁଲ୍‌କାନ୍‌କକେ ସାଲାକେଦକଆଏ, ଶିମୋନ୍, ଅକଏକେଚି ଇନିଃ ପାଡରାସ୍ ନୁଡୁମକିଆଏ । ^{୧୭} ଜେବଦୀଆଃ ବାରିୟା ହନ୍‌କଡାକିନ୍ ଯାକୁବ୍ ଆତଃ ଯୋହାନ୍, ନେ ବାରାନ୍ ହାଗିୟାକିନ୍‌କେ ଯୀଶୁ, ବାନାରଗେସ୍ ମେନ୍‌ଲେରେ “ରିମିଲ୍‌ସାଡିରେନ୍ ହନ୍‌କିନ୍” ମେନ୍ତେ ନୁଡୁମକେଦକିନା; ^{୧୮} ଆନ୍ଦ୍ରିୟ, ଫିଲିପ୍, ବାର୍ଥୋଲମି, ମାଥୁଉ, ଥୋମା, ଆଲ୍‌ଫିୟନାଃ ବାରିଆ ହନ୍‌କଡାକିନ୍ ଯାକୁବ୍ ଆତଃ ଅକ୍ରିୟ, କିନାନ୍‌ରେନ୍ ଶିମୋନ୍, ଅକଏଚି ଇସ୍ରାଏଲ୍‌କକେ ମୁକ୍ତି ଏମ୍ ସାନାଙ୍ଗତାନ୍ ଯିହୁଦୀକ ଏତେ ମିହୁଡ୍ ତାଇକେନାଏ । ^{୧୯} ଆତଃ ଇଷ୍ଟାରିୟଡ୍ ଯିହୁଦା ଅକଏଚି, ତାୟମ୍‌ତେ ଯୀଶୁକେ ବାଇରିକଆଃ ତିଃଇରେ ଆଖ୍‌ରିଙ୍ଗକିୟା ।

‡ ୩:୧୪ ୩:୧୪ ବାରାଙ୍ଗାନ୍

ୟୀଶୁ ଆତ୍ମ ବାଲ୍‌ଜେବୁଲ୍
(ମାଥୂଇ ୧୨:୨୨-୩୨; ଲୁକ ୧୧:୧୪-୨୩; ୧୨:୧୦)

୨୦ ଏବେ ଯୀଶୁ ଅତୀତରେ ରୁହାଡ଼ିଯାନ୍ତାଏ, ଆତ୍ମ ଏକ୍ଷାରେ ପୁରା ହତକ ହୁଣ୍ଡିଯାନ୍ତା, ଏନାତେ ଇନିଃ ଆତ୍ମ ଆୟାଃ ଚେଲକ ଜମ୍‌ହ କାକ ଦାଡ଼ିକେଦାଃ । ୨୧ ନେୟା ଆୟୁମ୍‌କେଦ୍‌ତେ ଆୟାଃ ଅତୀତରେନ୍ ହତକ ଆଇଃକ୍‌କେ ସାବ୍‌ଇଦି ନାଗେନ୍ତେ ଅତ୍‌ଜ୍‌ୟାନ୍ତାକ, ଚିୟାଃଚି ହତକ କାଜିତାଇନାକ, “ନିଃ ବାଲ୍‌ଅଃତାନ୍ତାଏ ।”

୨୨ ✨ଆତ୍ମ, ଯୀରୁଶାଲେମ୍‌ଏତେ ହିଜୁଆକାନ୍ ଆଇନ୍ ଇତୁକ ମେନ୍‌କେଦାଃକ “ବଙ୍ଗାକଆଃ ଗମ୍‌କେ ବାଲ୍‌ଜେବୁଲ୍ ଇନିଃକେ ଏସେରକିୟାଏ । ଇନିଃଗି ଇନିଃକେ ବଙ୍ଗା ହାଡ଼ଅତ୍‌ଜ୍ ନାଜ୍ ପେଡ଼େଃ ଏମାଇତାନ୍ତାଏ ।”

୨୩ ଏନାମେନ୍ତେ ଯୀଶୁ ଇନକୁକେ ହାକାଅକେଦକଆଏ, ଆତ୍ମ ଜନ୍‌କା କାଜିତେ ମେତାଦକଆଏ, “ସାଏତାନ୍‌ଗିଃ ସାଏତାନ୍‌କେ ଚିଲ୍‌କା ହାଡ଼ଅତ୍‌ଜ୍ ଦାଡ଼ିୟାଏ ? ୨୪ ମିଆଁଦ୍ ରାଇଜ୍ ଆୟାଃରେଗି ବିନ୍‌ଗାଅକେଦ୍‌ତେ ଆକ ଆକଆଲାରେ ଲାପଡ଼ାଇରେଦ ଏନ୍ ରାଇଜ୍ ଛିତିବିତିକଆଃ । ୨୫ ଆତ୍ମ, ମିଆଁଦ୍ ଅତୀତରେନ୍‌କ ଆକ ଆକଗି ଲାପଡ଼ାଇରେଦ ଏନ୍ ଅତୀତ କା ତିଜ୍‌ନାଃ । ୨୬ ଏନ୍‌ଲେକାଗି ସାଏତାନ୍, ସାଏତାନ୍‌ଆଃ ରାଇଜ୍ ହିଗାଡ଼କେଦ୍‌ତେ ବିନ୍‌ଗାଅରେଦ ଏନା କା ତିଜ୍‌ନାଃ, ମେନ୍‌ଦ ଛିତିବିତିକେଦ୍‌ତେ ତୁଣ୍ଡୁତାରଃଆ ।

୨୭ “ପେଡ଼େୟାନ୍‌ନିଃକେ ଆଉରି ତଲ୍ ଜାକେଦ୍ ଜେତାଏ ଇନିୟାଃ ଅତୀତରେ ବଲକେଦ୍‌ତେ ଆୟାଃ ମେନାଃତେୟାଃ କାଏ ରେଃକ୍‌ଦାଡ଼ିୟା, ମେନ୍‌ଦ ସିଦାତେ ଇନିଃକେ ତଲ୍‌କେଦ୍‌ତେ ଆୟାଃ ମେନାଃତେୟାଃ ରେଃକ୍‌ଦାଡ଼ିୟାଏ ।

୨୮ “ସାଡ଼ିଗି କାଜିପେତାନ୍‌ଇଜ୍, ମାନଂହାନ୍‌କଆଃ ସବେନ୍ ପାପ୍ ଆତ୍ମ ଇନ୍‌କୁଆଃ ନିନ୍‌ଦା କାଜିକ ଛାମାଂଝାଃ; ୨୯ ✨ମେନ୍‌ଦ ପାବିତାର୍ ଆମ୍‌କେ ହିଲାଜ୍‌ଇ ହଡ଼କେ ଚିତଲ୍‌ହ କା ଛାମାଂଝାଃ, ଚିୟାଃଚି ଇନିଃ ଜାନାଅ ଜାନାଅରାଃ ପାପ୍ କେଦାଏ ।” ୩୦ “ସଡ଼ରା ଆମ୍‌ ଇନିଃକେ ଏସେରାକାୟାଏ” ମେନ୍ତେ ଆଇନ୍ ଇତୁକ କାଜିକେଦ୍‌ତି ନେ ସବେନାଃ ଯୀଶୁ କାଜିକେଦାଏ ।

✨ ୩:୨୨ ୩:୨୨ ମାଥୂଇ ୯:୩୪; ୧୦:୨୫. ✨ ୩:୨୯ ୩:୨୯ ଲୁକ ୧୨:୧୦.

**ୟୀଶୁଆଃ ଏଙ୍ଗା ଆତଃ ହାଗାକ
(ମାଥୂଉ ୧୨:୪୭-୫୦; ଲୁକ ୮:୧୯-୨୧)**

୩୧ ଏନ୍ତେ ଯୀଶୁଆଃ ଏଙ୍ଗାତେ ଆତଃ ହାଗାକ ହିଜୁଃୟାନା ଆତଃ ରାଚାରେ ତିଜୁକେଦତେ, ଇନିଃକେ କେଡ଼ାଆଉଝି ନାଗେନ୍ତେ ନିହୁଡ଼କେକ କୁଲ୍‌କିୟାଃ । ୩୨ ଆତଃ ଗାଦେଲ୍ ହଡ଼କ ଇନିଃତାଃରେ ଦୁବ୍ ଜୁରୁଆକାନକ ତାଇକେନା, ଆତଃ ଇନକୁ କାଜିକିୟାଃକ, “ନେଲେମେ, ଆମାଃ ଏଙ୍ଗାମ୍ ଆତଃ ହାଗା ମିଶିକ ରାଚାରେକଆ, ଇନକୁ କେଡ଼ାମେତାନାକ ।”

୩୩ ଯୀଶୁ କାଜିୟାଦକଆଏ, “ଅକଏ ଆଇଁୟାଃ ଏଙ୍ଗାଇଙ୍ଗ୍ ? ଆତଃ ଅକନକ ଆଇଁୟାଃ ହାଗାଇଙ୍ଗକ ତାନକ ?” ୩୪ ଆତଃ ଦୁବାକାନକକେ, ଆରିଦ୍‌ବିୟୁରକେଦତେ କାଜିକେଦାଏ, “ନେଲକପେ ନିକୁଦ ଆଇଁୟାଃ ଏଙ୍ଗା ଆତଃ ହାଗାକତାନକ । ୩୫ ଅକଏ, ପାରମେଶ୍ୱାର୍‌ଆଃ ସାନାଙ୍ଗ୍ ପୁରାଃଏ, ଇନିଃ ଆଇଁୟାଃ ଏଙ୍ଗାଇଙ୍ଗ୍, ହାଗାଇଙ୍ଗ୍ ଆତଃ ମିଶିଙ୍ଗ୍ ତାନିଃ ।”

୪

**ହିତାହେରନିଆଃ ଜନକା କାଜି
(ମାଥୂଉ ୧୩:୧-୯; ଲୁକ ୮:୪-୮)**

୧ ☆ୟୀଶୁ ଆତଃଗି ଗାଲିଲ୍ ଦରେୟା ଗେନାରେ ଇନିତୁ ଏଟେଦକେଦାଏ, ଆତଃ ଏନ୍ତାଃରେ ଗାଦେଲ୍ ହଡ଼କ ହୁଣ୍ଡିୟାନତି ଦରେୟାରେ ତାଇକାନ ନିଆଁଦ୍ ଲାଉକାରେ ଦୁବ୍‌ୟାନାଏ ଆତଃ ସବେନ୍ ହଡ଼କ ଦରେୟା ଗେନାରେ ଅତେରେକ ତାଇକେନା ।

୨ ଯୀଶୁ ଇନକୁକେ ଜନକା କାଜିତେ ପୁରାଃ କାଜିକ ଇତୁକେଦକଆଏ, ଆତଃ ଇତୁକତାନଲଃ କାଜିକେଦକଆଏ,

୩ “ଆୟୁମେପେ, ମିଆଁଦ୍ ହିତାହେରନିଃ ହିତା ହେରନାଗେନ୍ତେ ଅତଙ୍ଗୟାନା । ୪ ଆତଃ ଇନିଃ ହିତା ହେରତାନଲଃ ଚିମିନ୍ ହିତା ହରା ଗେନାରେ ଉୟୁଃୟାନା ଆତଃ ତେଣିକ ଆଡ଼ଗୁକେଦତେ ଏନାକ ହାଲାଙ୍ଗ୍ ଜମକେଦାଃ । ୫ ଚିମିନ୍ ହିତାଦ ହାସା ପୁରାଃ ବାନଃ ଦିରି ଅତେରେ ଉୟୁଃୟାନା, ହାସା ଏତାଙ୍ଗି ତାଇକାନ ହରାତେ ଅମନ୍ ଧାବ୍‌ୟାନା । ୬ ମେନ୍‌ଦ ସିଙ୍ଗି ରାକାବ୍‌ୟାନତି ଏନ୍ ଅମନ୍‌ତେୟାଃକ

☆ ୪:୧ ୪:୧ ଲୁକ ୫:୧-୩.

ସବେନ୍ ଗସୟାନା, ଆଡ଼ଃ କା ରେହେଦାକାନ୍ ହରାଡେ ରହଡ଼ୟାନା ।^୭ ଚିମିନ୍ ହିତା ଜାନୁମ୍ ରୁପାଦକ ଆଲାରେ ଉୟୁଃୟାନା, ଏନାକକେ ଜାନୁମ୍ ହାରାଡପାକେଦାଏ, ଆଡ଼ଃ ଏନାକ କା ଜ ଯାନା ।^୮ ମେନ୍ଦ ଚିମିନ୍ ହିତା ବୁଗିନ୍ ଅଡେରେ ଉୟୁଃୟାନା, ଆଡ଼ଃ ଏନା ଅମନ୍ ହାରାୟାଡ୍ରେ ଜ ଯାନା, ଅକଆଃକ ତିରିଶ୍, ଅକଆଃ ଷାଠେ, ଅକଆଃ ମିଦ୍‌ଶାଅଗୁନା, ଜ ଯାନା ।”

^୯ ଆଡ଼ଃ ଯୀଶୁ ମେନ୍‌କେଦାଏ, “ଆୟୁମ୍ ନାଗେଡ୍ରେ ଲୁତୁର୍ ମେନାଃନିଃ ଆୟୁମେକାଏ ।”

ୟୀଶୁ ଚିକାନାଙ୍ଗ୍ ଜନ୍‌କା କାଜି କାଜିକେଦାଃଏ
(ମାଥୁଉ ୧୩:୧୦-୧୭; ଲୁକ ୮:୯-୧୦)

^{୧୦} ଯୀଶୁ ଏସକାର୍‌ଗି ତାଇକାନ୍ ଦିପିଲିରେ, ଆୟାଃଲଃ ତାଇକେନ୍ ହଡକ, ଗେଲ୍‌ବାର୍ ଚେଲ୍‌କଲଃ, ନେ ଜନ୍‌କା କାଜିରେୟାଃ ମୁଣ୍ଡି ଚିକ୍‌ନାଃ ତାନାଃ ମେଡ୍ରେକ କୁଲିକିୟାଃ ?^{୧୧} ଇନିଃ କାଜିୟାଦକଆଏ, “ଆପେଦ ପାର୍‌ମେଶ୍‌ବାର୍‌ଆଃ ରାଇଜ୍‌ରେୟାଃ ଉକୁଆକାନ୍ କାଜିରାଃ ମୁଣ୍ଡିପେ ନାମକାଦାଃ । ମେନ୍ଦ ବାହାରିରେନ୍ ଏଟାଃକକେ କାଜିରାଃ ଜନ୍‌କା କାଜିଡେ ସବେନାଃ ଉଦୁବଃତାନା ।^{୧୨} ଏନ୍‌ଲେକାଡେ, “ଇନ୍‌କୁ ନେଲ୍‌ଦକ ନେଲେଆ, ମେନ୍ଦ କାକ ନେଲ୍‌ଉରୁମେୟା, ଇନ୍‌କୁ ଆୟୁମ୍‌ଦକ ଆୟୁମେୟା, ମେନ୍ଦ କାକ ଆର୍‌କାରେୟା, କା'ରେଦ ଇନ୍‌କୁ ମନ୍‌କ ରୁହାଡ୍‌ଡେୟାଃ, ଆଡ଼ଃ ପାର୍‌ମେଶ୍‌ବାର୍ ଇନ୍‌କୁକେ ଛାମା ଏମାଦକଡେୟାଏ ।”

ୟୀଶୁ ହିତାହେର୍‌ନିଆଃ ଜନ୍‌କା କାଜିରେୟାଃ ମୁଣ୍ଡି ଉଦୁବେତାନାଏ
(ମାଥୁଉ ୧୩:୧୮-୨୩; ଲୁକ ୮:୧୧-୧୫)

^{୧୩} ଏଡ୍ରେ ଯୀଶୁ ମେତାଦକଆଏ, “ନେ କାଜିରାଃ ଜନ୍‌କା କା'ଚିପେ ମୁଣ୍ଡିକେଦା ? ତାଦ୍‌, ଆଡ଼ଃ ଜନ୍‌କାକ ତିଲ୍‌କାପେ ମୁଣ୍ଡିଆ ?^{୧୪} ହିତାହେର୍‌ନିଃଦ ପାର୍‌ମେଶ୍‌ବାର୍‌ଆଃ କାଜି ହେର୍‌ନିଃ ତାନିଃ ।^{୧୫} ଚିମିନ୍ ହଡକ ପାର୍‌ମେଶ୍‌ବାର୍‌ରାଃ କାଜି ଆୟୁମ୍ ତାନଲଃଗି ସାଏତାନ୍ ହିଲୁଃକେଦ୍‌ଡେ ଇନ୍‌କୁତାଃଏଡେ ଆୟୁମ୍ କାଜିକେ ରେଃକ୍‌ଇଦିତାଃଏ, ଇନ୍‌କୁଦ ହରା ଗେନାରେ ହେରାକାନ୍ ହିତା ଲେକାଃକ ।^{୧୬} ଏନ୍‌ଲେକା, ଚିମିନ୍ ହଡକଦ ହିତା ହେରାକାନ୍

ଦିରିଅତେ ଲେକାନ୍‌କ ତାନ୍‌କ, ଇନ୍‌କୁଦ କାଜି ଆୟୁମଲ୍‌ଠଗି ରାସ୍‌କାତେ ତେଲ୍ୟାତାନ୍ ହଡ଼କ ତାନ୍‌କ ।^{୧୭} ମେନ୍‌ଦ ଇନ୍‌କୁତାଠରେ ‘ରେହେଦ୍’ କା ତାଇନ୍ ହରାତେ ଇନ୍‌କୁ କାଟିଃ ଘାଡ଼ିଗିକ ତାଇନାଃ, ତାୟମ୍‌ତେ କାଜିରାଃ ହରାତେ ଦୁକୁହାସୁ ଚାହେ ସାସାତି ହିଜୁଃରେ ଇମ୍‌ତାଗିକ ରୁହାଡ଼କଆଃ ।^{୧୮} ଜେତାଏ କାଜି ଆୟୁମାଃଏ ମେନ୍‌ଦ ସାଂସାର୍‌ରେୟାଃ ଉଡ଼ୁ ଆତଃ ପୁରାଃ ମେନାଃତେୟାଃରାଃ ହାୟା, କାନାଜିକେ ହାରାତପାଏୟା ଆତଃ ଇନିଃ କାଏ ଜଅଃ’ଆ, ଇନିଃ ଜାନୁମ୍ ଆଲାରେ ଉୟୁଗାକାନ୍ ହିତା ଲେକାନ୍‌ନିଃ ତାନିଃ, ଇନିଃ ଜେତାନ୍ ଜ କାଏ ଜଅଃ’ଆ ।^{୧୯} ନେ ଲେକାନ୍ ହଡ଼କଦ ଜାନୁମ୍ ଆଲାରେ ହେରାକାନ୍ ହିତାଲେକାନ୍‌କତାନ୍‌କ ।^{୨୦} ଆତଃ ବୁଗିନ୍ ଅତେରେ ହେରାକାନ୍ ହିତାଲେକା ଚିମିନ୍ ହଡ଼କ ସୁକୁକାଜି ଆୟୁମ୍‌କେଦ୍‌ତେ ମାନାତିଙ୍ଗ୍‌ୟାଃକ, ଆତଃ ମିଆଁଦ୍‌ନିଃ ତିରିଶ, ଏଟାଠନିଃ ଷାଠେ, ଆତଃ ମିଆଁଦ୍‌ନିଃ ମିଦ୍‌ଶାଅ ଗୁନାକ, ଜ ଆଃ ।”

ଦିମିରେୟାଃ ଜନ୍‌କା କାଜି
(ଲୁକ ୮:୧୭-୧୮)

^{୧୯} ✧ ଆତଃଠଗି ଯୀଶୁ କାଜିୟାଦ୍‌କଆଏ, “ତିୟାଃ ଜେତାଏ ହଡ଼ ଦିମି ଜୁଲ୍‌କେଦ୍‌ତେ ‘ତାଞ୍ଜାତେ’ ଚାଏ ପାର୍‌କମ୍ ଲାତାର୍‌ରେ ଦହୟାଏ ? ଏନାକେଦ୍ ପାଖା ଚାଏ ଦିର୍କା ତେତାନ୍‌ରେ ଦହୟାଏ ।^{୨୨} ✧ ଅକ ସବେନ୍ ଉକୁଆକାନ୍‌ତେୟାଃ ଏନା ମାସ୍‌ଲିତେ ଆଉଃଆ, ଆତଃ ଅକ ସବେନାଃ ଦାନାଙ୍ଗ୍‌ଆଁକାନା ଏନା ଉଦୁବଃଆ ।^{୨୩} ଲୁତୁର୍ ତାପେଆଃ ଆୟୁମ୍ ନାଗେନ୍ତେ ମେନାଃରେଦ୍, ଆୟୁମେପେ ।”

^{୨୪} ✧ ଆତଃଠଗି ଇନିଃ କାଜିୟାଦ୍‌କଆଏ, “ଆପେ ଆୟୁମେତେୟାଃ ବୁଗିଲେକା ଆୟୁମ୍‌ଉରୁମେପେ, ଆପେ ସଙ୍ଗେ ତାମ୍‌ରେଗି ଆପେ ନାଗେନ୍ତେ ସୋଙ୍ଗଃଆ, ଆତଃ ଏନାଏତେ ଆଦ୍‌କାପେ ନାମେଆଁ ।

^{୨୫} ✧ ତିୟାଃଚି, ଅକଏତାଃ ମେନାଃ ଇନିଃଦ୍ ଆତଃଠଗି ନାମେଆଁ, ଆତଃ ଜେତାଏତାଃରେ ବାନଃଆ, ଇନିଃତାଃଏତେ ଅକ୍‌ନାଃ ମେନାଃ ଏନାହଗି ଇଦିୟାଆ ।”

ହାରାତାନ୍ ହିତାରେୟାଃ ଜନ୍‌କା କାଜି

✧ ୪:୨୧ ୪:୨୧ ମାଥୁର ୫:୧୫; ଲୁକ ୧୧:୩୩. ✧ ୪:୨୨ ୪:୨୨ ମାଥୁର ୧୦:୨୬; ଲୁକ ୧୨:୨. ✧ ୪:୨୪ ୪:୨୪ ମାଥୁର ୭:୨; ଲୁକ ୭:୩୮. ✧ ୪:୨୫ ୪:୨୫ ମାଥୁର ୧୩:୧୨; ୨୫:୨୯; ଲୁକ ୧୯:୨୬.

୨୭ ଆଡ଼ଃଗି ଯୀଶୁ କୁଲିକେଦକଥାଏ, “ପାର୍ମେଶ୍ୱାରୀଆଃ ରାଉଜ୍ ନେ'ଲେକାଗିଆଃ, ମିଆଁଦ୍ ହଡ଼ ଆୟାଃ ଅତେରେ ହିତା ହେରକେଦାଏ । ୨୭ ଆଡ଼ଃ ଇନିଃ ନିଦାରେ ଦୁଡ଼ମ୍ବାଏ, ସିଙ୍ଗିରେ ବିରିଦାଏ, ଆଡ଼ଃ ଇନିୟାଃ କା ସାରିତେ ହିତା ଅମନଆଃ ଆଡ଼ଃ ହାରାଅଆଃ । ୨୮ ଅତେଦ ଆୟାଃତେଗି ଜ'ଏମାଃଏ, ସିଦା ଅମନେୟାଏ, ଏଡ୍ରେ ଗେଲେୟାଏ, ଏଡ୍ରେ ଗେଲେରେ ଜାଙ୍ଗ୍‌ଅଃଆ । ୨୯ ଜ ଜାଙ୍ଗ୍‌ୟାନ୍ତି ଏନ୍ ହଡ଼, ଇରୋଃ ଦିପିଲି ସେଟେରୟାନା ମେଡ୍ରେ, ଦାଡ଼ରମ୍ ସାବେଥାଏ ।

**ମାନିଜାଙ୍ଗ୍‌ରେଆଃ ଜନ୍‌କା କାଜି
(ମାଥୂଉ ୧୩:୩୧-୩୨, ୩୪; ଲୁକ ୧୩:୧୮-୧୯)**

୩୦ “ଆଡ଼ଃଗି ଯୀଶୁ କୁଲିକେଦକଥାଏ, ପାର୍ମେଶ୍ୱାରୀଆଃ ରାଉଜ୍ ଚିନାଃଲଃବୁ ଜକାଏୟା ଚାଏ ଅକ ଜନ୍‌କା କାଜିତେ ଏନାବୁ ଉଦୁବେୟା । ୩୧ ଏନାଦ ମିଆଁଦ୍ ମାନିଜାଙ୍ଗ୍ ଲେକା, ଅତେରେ ହେରତାନ୍ ସାମାଏରେ ଅତେରାଃ ସବେନ୍ ହିତାଜାଙ୍ଗ୍ ଏତେ ହୁଡ଼ିଙ୍ଗିଆଁ, ୩୨ ମେନ୍‌ଦ ଅତେରେ ହେରୟାନ୍ତି ଏନାରେୟାଃ କତକ ଏଟାଃ ଆଡ଼ଃଦାରୁକଏତେ ପୁରାଃ ମାରାଙ୍ଗ୍ ହାରାସାଲାଙ୍ଗିଅଃଆ, ଆଡ଼ଃ ସିର୍ମାରେନ୍ ଚେଣ୍ଟେକ ଏନାରେୟାଃ ଉମ୍‌ଲୁରେକ ଅକାୟା ।”

୩୩ ଯୀଶୁ ଇନ୍‌କୁକେ ଆଟ୍‌କାରୁଉରୁମ୍ ଦାଡ଼ିଲେକା ପୁରାଃ ନେ'ଲେକାନ୍ ଜନ୍‌କା କାଜିକ କାଜିକେଦକଥାଏ । ୩୪ ବେଗାର୍ ଜନ୍‌କା କାଜିତେ ଇନିଃ ଇନ୍‌କୁକେ ଜେଡ଼ନାଃ କାଏ କାଜିୟାଦକଥା, ମେନ୍‌ଦ ଏସ୍‌କାରରେ ଇନିଃ ଆୟାଃ ଚେଲାକକେ ସବେନାଃରାଃ ମୁଣ୍ଡି ଉଦୁବାକ ତାଇକେନାଏ ।

**ୟୀଶୁ ମାରାଙ୍ଗ୍‌ହୟକେ ହାପାଉତାରକେଦାଏ
(ମାଥୂଉ ୮:୨୩-୨୭; ଲୁକ ୮:୨୨-୨୫)**

୩୫ ଏନ୍ ହୁଲାଙ୍ଗ୍, ଆୟୁଦ୍‌ୟାନ୍ତି ଯୀଶୁ ଚେଲାକକେ କାଜିୟାଦକଥାଏ, “ଦଲାବୁ, ଦରେୟା ହାନ୍ ପାରମ୍‌ତେବୁଆ ।” ୩୬ ଆଡ଼ଃ ଚେଲାକ ଗାଦେଲ୍ ହଡ଼କକେ ବାଗିକେଦ୍‌ତେ ଲାଉକାରେ ଦୁଦ୍‌ୟାନାକ, ମେନ୍‌ଦ ଯୀଶୁ ସିଦାରେ ଦୁବାକାନ୍ ତାଇକେନାଏ, ଏଡ୍ରେ ଇନ୍‌କୁ ଲାଉକାକେ ଚାଲାଅକେଦାଃକ, ଏନ୍ତାଃରେ ଏଟାଃ ଲାଉକାକହ ତାଇକେନା । ୩୭ ଇମ୍‌ତାଙ୍ଗି

ଦୁଦୁଗାରହୟ ବିରିଦୟାନା ଆଡ଼େ ଲାଉକାରେ ଆଲ୍‌ପୁଙ୍ଗ* ରାକାବ୍‌ୟାନା, ଏନାତେ ଲାଉକାରେ ଦାଆଃ ପେରେଜିଃତାନ୍ ତାଇକେନା । ୩୮ ଇମ୍‌ତା ଯୀଶୁ ଲାଉକାରେୟାଃ ତାୟମ୍‌ସାଃରେ ଉଠୁଙ୍ଗିକେଦ୍‌ତେ ଦୁଡ଼ମ୍‌ନାକାନାଏ ତାଇକେନା । ତେଲାଇ ଇନିଃକେ ବିରିଦିତାନ୍‌ଲଃ କାଜିକିୟାଃକ, “ହେ ଗୁରୁ, ତୁବିଃଗ୍ ଗଜଃତାନାଲେ, କାମ୍‌ଚି ପାହାମ୍‌ତାନା ?”

୩୯ ଯୀଶୁ ବିରିଦ୍‌ତିକ୍‌ୟାନ୍‌ଚି ହୟକେ ମାରାଙ୍ଗମଚାକିୟା ଆଡ଼େ ଆଲ୍‌ପୁଙ୍ଗକେ କାଜିକେଦା, “ହାପାଅଃମେଁ,” ଆଡ଼େ ଏନା ରୁଡ଼ୟାନା, ଆଡ଼େ ପୁରା ସିଃସଏଃୟାନା† । ୪୦ ଏନ୍ତେ ଯୀଶୁ ତେଲାଇକେ କାଜିୟାଦକଆଏ, “ଚିନାଃ ମେନ୍ତେପେ ବରତାନା ? ନାହାଁଃ, ଜାକେଦ୍ ଆପେୟାଃ ବିଶ୍ୱାସ୍ ବାନଃଆଚି ?”

୪୧ ଏନାତେ ଇନ୍‌କୁ ପୁରାଃଗି ବରକେଦାଃକ, ଆଡ଼େ ମେପେନ୍‌ୟାନାକ, “ନିଃଦ ଅକଏ ତାନିଃ ? ହୟ, ଆଡ଼େ ଦରେୟା ହୁଁ ନିୟାଃ କାଜିକ ମାନାତିଙ୍ଗତାନା ।”

୫

ବଙ୍ଗା ଏସେରାକାନ୍‌ନିଃକେ ଯୀଶୁ ବୁଚି ତାନା
(ମାଥୂଉ ୮:୨୮-୩୪; ଲୁକା ୮:୨୬-୩୯)

୧ ଏନ୍ତେ ଯୀଶୁ ଆୟାଃ ତେଲାଇଲଃ ଗାଲିଲ୍ ଦରେୟା ସେନ୍‌ପାରମ୍‌କେଦ୍‌ତେ ଗେରାସିମିକଆଃ ପାର୍‌ଗାନ୍‌ତେ ତେବାଃୟାନାକ । ୨ ଇନିଃ ଲାଉକାଏତେ ଆଡ଼ଗୁୟାନ୍‌ଚି, ସତ୍‌ରା ଆମ୍‌ତେ ଏସେରାକାନ୍ ମିହୁଡ୍ ହଡ୍ ତପାଠାୟାଦ୍‌ଏତେ ଅଡ଼ଙ୍ଗକେଦ୍‌ତେ ସେନ୍‌ଦାରମ୍‌କିୟାଏ । ୩ ଇନିଃ ତପା ଠାୟାଦ୍‌ରେ ତାଇନଃତାନାଏ ତାଇକେନା, ଇନିଃକେ ଜେତାଏ କାକ ତଲ୍ ଦାଡ଼ିତାଇକେନା, ସିକ୍‌ଡିତେହୁଁ କାହାଗି । ୪ ପୁରାଃସା ଇନିୟାଃ କାଟା ତିଃଇକ ସିକ୍‌ଡିତେ ତଲ୍‌କାନ୍ ତାଇକେନାଏ, ମେନ୍‌ଦ ସବେନ୍ ଇମ୍‌ତା ଇନିଃ ସିକ୍‌ଡି ଆଡ଼େ ବେଡ଼ିକକେ ଟଟାଃକେଦାଏ । ଇନିଃତାଃରେ ପୁରାଃ ପେଡ଼େଃ ତାଇକେନା ଆଡ଼େ ଜେତାଏ ହୁଁ ଇନିଃକେ କାକ କାରୁ ଦାଡ଼ିତାଇକେନା । ୫ ନିଦା ଆଡ଼େ

* ୪:୩୭ ୪:୩୭ ଆଲ୍‌ପୁଙ୍ଗ † ୪:୩୯ ୪:୩୯ ଆମ୍‌ସା

ସିଙ୍ଗି ତପା ଠାୟାଦକରେ, ବୁରୁରେ କାଉରିତାନ୍ ଆଡ଼ଠ ଦିରିତେ କଟେୟତାନାଏ ତାଇକେନା ।

^୬ ସାଙ୍ଗିନ୍ଏତେ ଯୀଶୁକେ ନେଲ୍‌ତାଇଲଃ ନିର୍ଦ୍ଦାରମ୍‌କେଦ୍‌ତେ ଆୟାଃ ଆୟାର୍‌ରେ ଅମ୍ବାଃ ଇକ୍‌ଡ଼ମ୍ ଯାନାଏ । ^୭ ଆଡ଼ଠ କାଉରିତାନ୍‌ଲଃ କାଜିକେଦାଏ, “ଏ, ସାଲାଙ୍ଗିଡ଼ତାର୍ ପାର୍‌ମେଶ୍‌ବାର୍‌ଆଃ ହନ୍ ଯୀଶୁ, ଆଇଁୟାଃଲଃ ଆମାଃ ଚିକାନ୍ କାମି ମେନାଃ ? ପାର୍‌ମେଶ୍‌ବାର୍‌ରାଃ ନୁଡୁମ୍‌ତେ କର୍‌ମେ ତାନାଇଙ୍ଗ୍, ଆଲମ୍ ସାସାତିଆଁ ।” ^୮ ଚିୟାଃଚି “ଏ, ସଡ଼ରା ଆମ୍ବା, ନେ ହଡ଼ଏତେ ଅଡ଼ଙ୍‌ଅଃମେ” ମେନ୍ତେ ଯୀଶୁ କାଜିକାଇ ତାଇକେନାଏ ।

^୯ ଏନ୍ତେ ଯୀଶୁ ଇନିଃକେ କୁଲିକିୟା, “ଆମାଃ ନୁଡୁମ୍ ଚିକନାଃ ? ଆଇଁୟାଃ ନୁଡୁମ୍ ଫାଉଦ୍, ଆଲେ ପୁରାଃଗି ମେନାଲେୟା” ମେନ୍ତେ କାଜିରୁହାଡ଼କିୟା । ^{୧୦} ଆଡ଼ଠ ଇନିଃ ଯୀଶୁକେ, ନେ ଦିଶୁମ୍‌ଏତେ ଆଲମ୍‌ଗି ହାର୍ ଅଡ଼ଙ୍‌ଲେୟା, ମେନ୍ତେ ପୁରାଃଗି ବିକ୍ରିତାନ୍‌ଲଃ କାଜିଗହାରକିୟାଏ ।

^{୧୧} ବୁରୁଗେନା ଜାପାଃରେ ସୁକୁରିକଆଃ ମାରାଙ୍ଗ୍ ଗୋଟ୍ ଆଡ଼ିଙ୍ଗ୍‌ତାନ୍‌କ ତାଇକେନା । ^{୧୨} ଆଡ଼ଠ, ବଙ୍ଗାକ ବିକ୍ରିକେଦ୍‌ତେ କାଜିକିୟାଃକ, “ଆଲେକେ ଏନ୍ ସୁକୁରିକରେ ବଲଃ ନାଗେନ୍ତେ କୁଲ୍‌ତାଲେମେ ।” ^{୧୩} ଯୀଶୁ ଇନିକୁକେ ସେନ୍‌ଇଚିକେଦ୍‌କଆ, ଆଡ଼ଠ ଏନ୍ ସଡ଼ରା ଆମ୍ବାକ ଏନ୍ ହଡ଼ଏତେ ଅଡ଼ଙ୍‌କେଦ୍‌ତେ ସୁକୁରିକରେକ ବଲୟାନା, ଆଡ଼ଠ ଏନ୍ତାଃରେ ଦୁଇ ହାଜାର୍ ଲେକା ସୁକୁରିକ ଆଡ଼ିଙ୍ଗ୍ ତାଇକେନା, ଇନିକୁ ଦରେୟାରେକ ନିର୍ ଭୁଷ୍‌ମାଅୟାନା ଆଡ଼ଠ ଭୁବିଃଗ୍ ଗଏଃୟାନାକ ।

^{୧୪} ସୁକୁରି ଗୁପିତାନ୍‌କ ନିର୍‌ୟାନାକ ଆଡ଼ଠ ସାହାର୍ ଆଡ଼ଠ ଟଲାକରେ ନେ କାଜିକ ଉଦୁବ୍‌କେଦାଃ, ଏନ୍ତେ ଚିକନାଃ ଚିକାୟାନା ମେନ୍ତେ ହଡ଼କ ନେଲ୍ ନାଗେନ୍ତେ ଅଡ଼ଙ୍‌ୟାନାକ । ^{୧୫} ଆଡ଼ଠ ଇନିକୁ ଯୀଶୁତାଃ ତେବାଃୟାନ୍‌ଚି ବଙ୍ଗା ଏସେରକାନ୍ ହଡ଼କେ ଇନିୟାଃ କାଟାସୁବାରେ ବୁଗିନ୍‌ମନ୍‌ତେ ଦୁବାକାନ୍, ଆଡ଼ଠ ଲିଜାଃ ଭୁସିଙ୍ଗ୍‌ଆଁକାନ୍ ନେଲ୍‌କିଃତେ ବରକେଦାଃକ । ^{୧୬} ନେ ସବେନ୍ ନେଲାକାଦ୍ ହଡ଼କ, ବଙ୍ଗା ଏସେରକାନ୍ ଏନ୍ ହଡ଼ ଚିଲ୍‌କା ବୁଗିୟାନାଏ ଆଡ଼ଠ ସୁକୁରିକ ଚିଲ୍‌କାୟାନା ଏନା ସବେନ୍ ହଡ଼କକେ ଉଦୁବାଦ୍‌କଆକ ।

୧୭ ଏନ୍ତେ ଇନ୍କୁ ଯୀଶୁକେ, ଆଲେୟାଃ ସିମ୍ନାଏତେ, ଅତଙ୍ଗଅଃମେ ମେନ୍ତେକ ବିନ୍ତିକିୟା ।

୧୮ ଏନ୍ତେ ଯୀଶୁ ଲାଉକାରେ ରାକାବତାନ୍ ଇମତା, ବଙ୍ଗା ଏସେର୍ଏତେ ବୁଗିକାନ୍ ହଡ, ଯୀଶୁକେ “ଆମାଃଲଃ ତାଇନ୍ ଚିକାଆଇଙ୍ଗମେ” ମେନ୍ତେ ବିନ୍ତିକିୟାଏ ।

୧୯ ମେନ୍ଦ ଯୀଶୁ “କାହାଗି, ଆମାଃ ଅଡ଼ାଃତେ ରୁହାଡ଼ମେଁ ଆଡ଼ଃ ଗମକେ ଆମାଃ ନାଗେନ୍ତେ ଚିନାଃ ରିକାକେଦାଃଏ, ଆଡ଼ଃ ଚିଲ୍ଲକା ଆମ୍ବକେ ଦାୟାକାଦମେୟା ଏନ୍ ସବେନାଃ ଆମାଃ ଅଡ଼ାଃରେନ୍କକେ ଉଦୁବାକମେ” ମେନ୍ତେ କାଜିକିୟା ।

୨୦ ଏନ୍ତେ ଏନ୍ ହଡ ରୁହାଡ଼ୟାନାଏ ଆଡ଼ଃ ଆୟାଃ ନାଗେନ୍ତେ ଯୀଶୁ ଚିନାଃ ରିକାକେଦାଃଏ ଏନା ସବେନ୍ ଦେକାପଲ୍ଲୀ*ରେ ଉଦୁବ୍ ଏଚେଦକେଦାଏ, ଆଡ଼ଃ ଏନା ଆୟୁମ୍ତାନକ ଆକ୍ଦାଦାଅୟାନା ।

**ଗଏଃକାନ୍ ହନ୍କୁଡ଼ି ଆଡ଼ଃ ଦୁକୁତାନ୍ କୁଡ଼ି
(ମାଥ୍ ୯:୧୮-୨୬; ଲୁକ ୮:୪୦-୫୬)**

୨୧ ଯୀଶୁ ଲାଉକାରେ ଦରେୟାରାଃ ହାନ୍ ପାରମ୍ଏତେ ନେ ପାରମ୍ତେ ରୁହାଡ଼ୟାନଚି, ଏନ୍ତାଃରେ ଗାଦେଲ୍ ହଡକ ହୁଣ୍ଡିୟାନା, ଆଡ଼ଃ ଯୀଶୁ ଦରେୟା ଗେନାରେ ତାଇକେନାଏ । ୨୨ ଏନ୍ତେ ଯାଇରସ ନୁଡୁମ୍ ମିଆଁଦ୍ ସାମାଜ୍ଅଡ଼ାଃରେନ୍ ଆଗୁଆଇ ହଡ ହିଜୁଃୟାନାଏ, ଆଡ଼ଃ ଯୀଶୁକେ ନେଲ୍କେଦ୍ତେ ଆୟାଃ କାଟାସୁବାରେ ଉୟୁଃୟାନା, ୨୩ ପୁରାଃଗି ବିନ୍ତିତାନ୍ଲଃ କାଜିକେଦା, “ହନ୍ତିଙ୍ଗୁଡ଼ି ଦୁକୁତେ ଗଜଃ ଲେକାକାନାଏ, ଇନିଃ ଚିଲ୍ଲକା ବାଞ୍ଚାଅଃଆଏ, ଏନାମେନ୍ତେ ହିଜୁଃମେ, ଆଡ଼ଃ ଇନିୟାଃ ଚେତାନ୍ରେ ତିଃଇ ଦହେମେ ।”

୨୪ ଏନ୍ତେ ଯୀଶୁ ଇନିଃଲଃ ସେନଃୟାନାଏ ଆଡ଼ଃ ଗାଦେଲ୍ ହଡକ ଉପୁଦୁରଠେପ୍ସାକେଦ୍ତେ ଜୁରୁବିହୁର୍ ତାନ୍ଲଃ ଦୟା ଦୟାକ ଅତଙ୍ଗକିୟା ।

୨୫ ଆଡ଼ଃ ଏନ୍ତାଃରେ ବାରା ବାରାଷ୍ପଏତେ “ମାୟୋମ୍ଲିଙ୍ଗି” ଦୁକୁରେ ଦୁକୁତାନ୍ ମିଆଁଦ୍ କୁଡ଼ି ତାଇକେନାଏ । ୨୬ ଇନିଃ ପୁରାଃ ବାଇଦକତାଃରେ ରାନ୍ତୁଆକାନ୍ ତାଇକେନାଏ, ଆଡ଼ଃ ଆୟାଃ ସବେନ୍ ତାଇକେନ୍ତେୟାଃ ଇନ୍କୁଆଃରେ ଚାବାକେଦାଏ, ଏନ୍ରେୟ କାଏ

* ୫:୨୦ ୫:୨୦ ଗ୍ରୀକ୍ ଜାଗାର୍ତେ ନେଆଁରାଃ ମୁଣ୍ଡି “ଦାଶୁଠୁ ସାହାର୍”

ବୁଗିୟାନା, ମେନ୍ଦ, ଦୁକୁତାୟାଃ ଆଡ଼ଃଗି ସାର୍‌ସାଅୟାନା† ।
 ୨୭ ଇନିଃ ଯୀଶୁଆଃ ବିଷାଏ ଆୟୁମ୍‌କେଦ୍‌ଚି ଗାଦେଲ୍ ହଡ଼କଆଃ
 ଆଲାରେ ଇନିୟାଃ ଦୟାହରା ଏତେ ଲିଜାଃରାଃ ଆର୍‌ରା ଜୁଚିଦ୍ ନାଙ୍ଗ୍
 ହିଜୁଃୟାନା, ୨୮ ଚିୟାଃଚି ଇନିଃ ଆୟାଃ ମନ୍‌ରେ “ଇନିୟାଃ ଲିଜାଃ
 ଏସ୍‌କାର୍ ଜୁଚିଦ୍‌ତାରେଦ୍ ଆଇଙ୍ଗ୍ ବୁଗିକଆଇଙ୍ଗ୍” ମେନ୍ତେ ଉଡ଼ଃତାନ୍
 ତାଇକେନାଏ ।

୨୯ ଏନ୍ତେ ଇନିଃ ଯୀଶୁଆଃ ଲିଜାଃ ଆର୍‌ରାକେ ଜୁଚିଦ୍‌କେଦାଏ
 ଆଡ଼ଃ, ଇମ୍‌ତାଙ୍ଗ୍‌ଗି ଇନିଃ ମାୟୋମ୍ ଲିଙ୍ଗ୍ ଦୁକୁଏତେ ବୁଗିୟାନାଏ
 । ଆଡ଼ଃ ଦୁକୁଏତେ ବୁଗିୟାନାଇଙ୍ଗ୍ ମେନ୍ତେ ଆୟାଃ ହଡ଼ମ୍‌ରେ
 ଆର୍‌କାର୍‌କେଦା । ୩୦ ଇମ୍‌ତାଙ୍ଗ୍‌ଗି ଯୀଶୁ, “ଆଇଙ୍ଗ୍‌ଏତେ ପେଡ଼େଃ
 ଅଡ଼ଙ୍ଗ୍‌ୟାନା” ମେନ୍ତେ ଜୀଉରେ ସାରିଆର୍‌କାର୍‌କେଦାଏ, ଆଡ଼ଃ
 ଗାଦେଲ୍ ହଡ଼କକେ ହେତାରୁହାଡ଼କେଦ୍‌ତେ, “ଅକଏ, ଆଇଁୟାଃ
 ଲିଜାଃ ଜୁଚିଦ୍‌କେଦାଏ ?” ମେନ୍ତେ କୁଲିକେଦକଆ ।

୩୧ ଆଡ଼ଃ ଚେଲା ତାୟାଃକ ଯୀଶୁକେ କାଜିକିୟାଃକ, “ଗାଦେଲ୍
 ହଡ଼କ ଆମାଃ ଚେତାନ୍‌ରେ ଉୟୁଗଃତାନାକ, ଏନାଦ୍ ନେଲ୍‌କତାନାମ୍,
 ଆଡ଼ଃ ‘ଅକଏ ଜୁଚିଦ୍‌କିଦିୟାଏ,’ ମେନ୍ତେ ଚିନାଃମ୍ କୁଲିତାନା ?”

୩୨ ମେନ୍ଦ୍ ଜୁଚିଦ୍‌କେଦ୍‌ନିଃକେ ଯୀଶୁ ନେଲ୍‌ନାମି ନାଗେନ୍ତେ
 ହେତାବାଡ଼ାକେଦାଏ । ୩୩ ଏନ୍ କୁଡ଼ି ଆଇଁୟାଃ ଚିକ୍‌ନାଃ
 ଚିକାୟାନା ନେଆଁ ଆର୍‌କାର୍‌କେଦ୍‌ତେ, ବରତେ ଏକ୍‌ଲାଅଃତାନ୍‌ଲଃ
 ହିଜୁଃୟାନାଏ ଆଡ଼ଃ ଇକ୍‌ଡ଼ମ୍ ତାନ୍‌ଲଃ ସବେନାଃ ସାର୍‌ତିଗି ଯୀଶୁକେ
 ଉଦ୍‌ବକିୟା । ୩୪ ଯୀଶୁ କାଜିକିୟାଏ, “ଏ ମାଇ, ବିଶ୍ୱାସ୍ ତାମାଃ
 ବୁଗିୟାକାଦ୍‌ମେୟାଏ, ତୁ ସୁକୁ ଜୀଉତେ ସେନଃମେ, ଆଡ଼ଃ ଆମାଃ
 ଦୁକୁଏତେ ବୁଗିୟାକାନ୍ ତାଇନଃମେ ।”

୩୫ ଯୀଶୁ ଏନା କାଜିତାନ୍ ଇମ୍‌ତାଗି, ସାମାଜ୍ ଅଡ଼ାଃ ଚାଲାଅନିୟାଃ
 ଅଡ଼ାଃଏତେ କାଜି ଆଉଝାକାଦ୍ ହଡ଼ ଯାଇରସକେ କାଜିକିୟାଏ,
 “ହନ୍‌ମେକୁଡ଼ି ଗଏଃୟାନାଏ, ଗୁରୁକେ ଆଡ଼ଃ ଆଲ୍‌ମେ ଦୁକୁଇୟା ।”

୩୬ ଯୀଶୁ ଏନ୍‌କାଜି ଆୟୁମ୍‌କେଦ୍‌ତେ କା ଆୟୁମ୍‌ତାନ୍
 ଲେକା ସାମାଜ୍‌ଅଡ଼ାଃରେନ୍ ଆଗୁଆଇକେ କାଜିକିୟା, “ଆଲ୍‌ମ୍
 ବରଏୟା, ବିଶ୍ୱାସ୍‌ରେଗି ତାଇନଃମେ ।” ୩୭ ଆଡ଼ଃ ଯୀଶୁ,
 ପାଡ଼ରାସ୍, ଯାକୁବ୍, ଆଡ଼ଃ ଯୋହାନ୍, ଯାକୁବ୍‌ଆଃ ହାଗାତେକେ

† ୫:୨୭ ୫:୨୭ ବାଡ଼ାଅୟାନା

ବାଗିକେଦ୍‌ରେ ଆଡ଼େ ଜେଡାଏକକେ କାଏ ସେନ୍ ଇତିକେଦ୍‌କଆ । ୩୮ ଯାଇରସଆ ଅଡ଼ାରେ ସେଟେରୟାନ୍ତି, ଯିଶୁ ଗାଦେଲ୍ ହଡ଼କ ହାଲାଗୁଲାତାନ୍‌ଲି, ରାଆଡ଼ାନ୍ ଆଡ଼େ ଏୟାନ୍‌ତାନ୍ ନେଲ୍‌କେଦ୍‌କଆ । ୩୯ ଇନିଃ ଅଡ଼ାରେ ବଲୟାନ୍‌ଏ, ଆଡ଼େ ଇନ୍‌କୁକେ କାଜିୟାଦ୍‌କଆ, “ତିନାଃ ମେଡ୍‌ରେ ହାଲାଗୁଲାଏତାନା ଆଡ଼େ ରାଆଏତାନା ? ଏନ୍ ହନ୍‌ଦ କାଏ ଗଜାକାନା ମେନ୍‌ଦ ଦୁଡ଼ୁତାନାଏ ।”

୪୦ ଏଡ୍ରେ ଇନ୍‌କୁ ଇନିଃକେ ଲାୟାକିୟାଃକ । ମେନ୍‌ଦ ଯିଶୁ ସବେନ୍ ହଡ଼କକେ ଏନ୍ତାଏତେ ଅଡ଼ାକେଦ୍‌କତି, କୁଡ଼ିହନ୍‌ରାଃ ଏକ୍ଷାଆପୁକିନ୍ ଆଡ଼େ ଆୟାଃଲିଃ ତାଇକାନ୍ ଚେଲାଇଲିଃ, କୁଡ଼ିହନ୍ ଗିତିଜାକାନ୍‌ତାଃ ସେନ୍ ବଲୟାନ୍‌କ । ୪୧ ଆଡ଼େ ଇନିୟାଃ ତିଃଇ ସାଦ୍‌କେଦ୍‌ରେ “ଚାଲିଆକୁମ୍” ମେନ୍‌କିୟାଏ, ନେ କାଜିରେୟାଃ ମୁଣ୍ଡି ନେଆଁ ତାନାଃ, “ଏ ମାଇ ବିରିଦ୍‌ମେ ।”

୪୨ ଇମ୍‌ତାଗି ଏନ୍ କୁଡ଼ିହନ୍ ବିରିଦ୍‌ୟାନ୍‌ଏ ଆଡ଼େ ସେସେନ୍ ବାଡ଼ାକେଦାଏ, ତିୟାଃତି ଇନିଃଦ ବାରା ବାରାଷ୍‌ରେନ୍ ତାଇକେନାଏ । ନେଆଁ ନେଲ୍‌କେଦ୍‌ରେ ସବେନ୍‌କ ପୁରାଃଗି ଆକ୍‌ଦାୟାନ୍‌କ । ୪୩ ମେନ୍‌ଦ ଯିଶୁ “ନେ କାଜି ଜେଡାଏତାଃରେ ଆଲ୍‌ପେ ଉଦୁବେୟା,” ମେଡ୍ରେ କାଜିୟାଦ୍‌କଆଏ, ଆଡ଼େ “କୁଡ଼ିହନ୍‌କେ ଜେଡ଼ନାଃ ଜଜମ୍ ନାକ୍‌ ଏମାଇପେ” ମେଡାଦ୍‌କଆଏ ।



ୟିଶୁକେ ନାଜ୍‌ରେଡ୍‌ରେ କାକ ବିଶ୍ୱାସ୍‌କିୟା

(ମାଥ୍‌ଉ ୧୩:୫୩-୫୮; ଲୁକ ୪:୧୭-୩୦)

୧ ଯିଶୁ ଏନ୍ତାଏତେ ଅଡ଼ାୟାନ୍‌କ । ଆଡ଼େ ଚେଲାଇଲିଃ ଆୟାଃ ସାହାର୍‌ରେ ହିଜୁଃୟାନ୍‌ଏ । ୨ ରୁଡ଼ୁ ହୁଲାକ୍‌ ସାମାଜ୍ ଅଡ଼ାରେ ଇନିଃ ଇଡୁ ଏଟେଦ୍‌କେଦାଏ । ଏନ୍ତାଃରେନ୍ ପୁରାଃ ହଡ଼କ ଇନିୟାଃ କାଜି ଆୟାନ୍‌କେଦ୍‌ରେ ଆକ୍‌ଦାୟାନ୍‌କ, ଆଡ଼େକ ମେନ୍‌କେଦାଃ, “ଇନିଃ ନେ ସବେନ୍‌କାଜି ଅକ୍‌ତାଏତେ ନାମାକାଦା ? ଇନିଃ ଅକ୍‌ତାଏତେ ନେ ସେଣ୍ ଆଡ଼େ ପେଡ୍‌ୟାନ୍ କାମିକରେୟାଃ ପେଡ୍‌ୟାନ୍ ନାମାକାଦାଏ ? ନିଃ ତିଲ୍‌କା ନେ ଲେକା ପେଡ୍‌ୟାନ୍ କାମିକ କାମିତାନାଏ ? ୩ ତିୟାଃ ନିଃ ଏନ୍ ବାଡ଼ାଇ ନାହାଁଲିଃ ? ତିୟାଃ

ନିଃ ମାରିୟାମ୍‌ଆଃ ହନ୍ତେକତା ନାହାଁଲିଃ ? ଆତଃ ଯାକୁବ୍, ଯୋସି, ଶିମୋନ୍ ଆତଃ ଯିହୁଦା ନେ ସବେନ୍‌କ ଆୟାଃ ହାଗାକ କା'ଚି ତାନକ ? ଆତଃ ଇନିୟାଃ ମିଶିକ ଆବୁଲଃଚି ବାଙ୍ଗକଆ ?” ଆତଃ, ଇନକୁ ଯୀଶୁକେ କାକ ବିଶ୍ୱାସକିୟା ।

୪ ✨ୟୀଶୁ ଇନକୁକେ ମେତାଦକଆ, “ନାବୀ ଆୟାଃ ଦିଶୁମ୍ ଆତଃ ଆୟାଃ କୁଟୁମ୍, ଆତଃ ଆୟାଃ ଅଡ଼ାଃରେନ୍‌କକେ ବାଗିକେଦ୍‌ତେ ସବେନ୍‌ତାଃରେ ମାଇନଃଆଏ ।”

୫ ଯୀଶୁ ଚିମିନ୍ ଦୁକୁତାନକକେ ତିଃଇତେ ଜୁଚିଦକେଦ୍‌ତେ ବୁଗିକେଦକଆଏ, ଏନା ବାଗିକେଦ୍‌ତେ ଆତଃ ଏନ୍ତାଃରେ ଇନିଃ ଜେତାନ୍ ଆକ୍‌ଦାନ୍‌ଆ କାମିକ କାଏ ଚିକା ଦାଡ଼ିକେଦାଃ ।

୬ ଆତଃ ଯୀଶୁ ଇନକୁଆଃ କା ବିଶ୍ୱାସ୍‌ତେୟାଃ ନେଲକେଦ୍‌ତେ ଆକ୍‌ଦାନ୍‌ଆୟାନା । ଏନ୍ତେ ଯୀଶୁ ହପର୍‌ଜାପାଃ ହାଡୁ ହାଡୁ ସେନ୍‌କେଦ୍‌ତେ ଇଡୁତାନାଏ ତାଇକେନା ।

**ୟୀଶୁ ଗେଲ୍‌ବାର୍ ଚେଲ୍‌କକେ କୁଲ୍‌କତାନାଏ
(ମାଥୂଞ୍ ୧୦:୫-୧୫; ଲୁକ ୯:୧-୬)**

୭ ଏନ୍ତେ ଗେଲ୍‌ବାର୍ ଚେଲ୍‌କକେ କେଡ଼ାକେଦ୍‌ତେ, ବାବାରହଡ଼ଲେକା କୁଲ୍‌କେଦକଆଏ । ଆତଃ ସଡ଼ରା ଆମ୍‌ା ହାର୍‌ଅଡ଼ଙ୍ଗ୍ ନାଗେନ୍ତେ ଇନକୁକେ ଆକ୍‌ତେୟାର୍ ଏମାଦକଆଏ । ୮ ଆତଃ ଯୀଶୁ ଚିର୍ଗାଲ୍‌କେଦକଆଏ, “ହରାସେନ୍ ନାଗେନ୍ତେ ସଟା ବାଗିକେଦ୍‌ତେ ଆତଃ ଜେଡ଼ନାଃ ଆଲ୍‌ପେ ଇଦିୟା, ହଲଙ୍ଗ୍ ଚି ଆଇଲା, ମାୟାଙ୍ଗ୍‌ରେ ଟାକା ପାଏସା ହ୍ୱ କାହାଗି । ୯ କାଟାରେ ଖାରପା ତୁସିଙ୍ଗ୍‌ୟେନ୍‌ପେ ମେନ୍‌ଦ ବାରିଆ ତୁସିଙ୍ଗ୍ ଲିଜାଃ ଆଲ୍‌ପେ ସାବେୟା । ୧୦ ଆତଃ ଇନିଃ ମେତାଦକଆଏ, ଜେତା ଅଡ଼ାଃରେ ଦାରମ୍‌ପେରେ, ଏନ୍ ସାହାର୍‌ଏତେ ଆଉରିପେ ଅଡ଼ଙ୍ଗ୍‌ଆଃ ଜାକେଦ୍ ଏନ୍ ଅଡ଼ାଃରେଗି ତାଇନ୍‌କାନ୍‌ପେ । ୧୧ ✨ଜାହାନ୍ ଠାୟାଦ୍‌ରେନ୍‌କ କାକ ସୁକୁଆପେରେ, ଆତଃ ଆପେୟାଃ କାଜି କାକ ଆୟୁମ୍‌ରେଦ୍, ଏନ୍ତାଃଏତେ ସେନଃତାନଲଃ, ଆପେୟାଃ କାଟା ତାଲ୍‌କାରେୟାଃ ଧୁଡ଼ି ଇନକୁଆଃ ବିରୁଧ୍‌ରେଆଃ ଗାଞ୍ଜା ନାଗେନ୍ତେ କଟା ବାଗିତାପେ ।”

✨ ୭:୪ ୭:୪ ଯୋହାନ୍ ୪:୪୪. ✨ ୭:୧୧ ୭:୧୧ ପ୍ରେରିଡ଼ ୧୩:୫୧. ✨ ୭:୧୧ ୭:୧୧ ଲୁକ ୧୦:୪-୧୧.

୧୨ ଇନ୍‌କୁ ସେନଃୟାନାକ ଆତଃ ହତକକେ ହେୟାତିଙ୍ଗ ଲାଗାତିୟାଃ ମେନ୍ତେ ଉଦୁବକେଦାକ । ୧୩ ☆ଇନ୍‌କୁ ପୁରାଃ ବଙ୍ଗାକକେ ହତକତାଃଏତେ ହାରଅତଙ୍ଗ କେଦକଆକ ଆତଃ ପୁରାଃ ଦୁକୁହାସୁତାନ୍ ହତକକେ ସୁନ୍ନୁମ୍ ଗସଃକେଦ୍‌ତେ ବୁଗିକେଦକଆକ ।

ଯୋହାନ୍ ତ୍ୱବାକରାଃ ଗନ୍‌ଏଃ
(ମାଥୁର ୧୪:୧-୧୨; ଲୁକ ୯:୭-୯)

୧୪ ☆ୟାଶୁଆଃ ନୁତୁମ୍ ସବେନ୍‌ସାଃରେ ନିତିରୁୟାନ୍ତେ*, ହେରୋଦ୍‌ † ରାଜା ଇନିୟାଃ ବିଷାଏ ଆୟୁମ୍‌କେଦା । ଚିମିନ୍ ହତକ କାଜିତାଇକେନାକ, “ବାପ୍ତିସ୍ତା ଏମଃନିଃ ଯୋହାନ୍ ଗଜାକାନ୍‌ଏତେ ଜୀଉବିରିଦାକାନାଏ, ଏନା ମେନ୍ତେଗି ଆକ୍‌ଦାନ୍‌ଆ କାମିକ ଇନିୟାଃ ହରାତେ ହବାଅଃତାନା ।”

୧୫ ମେନ୍‌ଦ ଏଟାଃକ କାଜିକେଦାଃକ, “ଇନିଃ ଏଲିୟ ତାନିଃ, ଆତଃ ଚିମିନ୍ ହତକ କାଜିକେଦାଃକ, ଇନିଃ ସିଦାରେନ୍ ନାବୀକଏତେ ମିଆଁଦ୍ ନାବୀ ତାନିଃ ।”

୧୬ ମେନ୍‌ଦ ହେରୋଦ୍ ନେଆଁକ ଆୟୁମ୍‌କେଦ୍‌ତେ ମେନ୍‌କେଦାଏ, “ଆଇଙ୍ଗ୍ ବହଃ ଖାଣ୍ଡୁଅକାନ୍ ଯୋହାନ୍ ଗଜାକାନ୍ କଏତେ ଜୀଉବିରିଦୟାନାଏ ।” ୧୭ ☆ନେ ହେରୋଦ୍‌ଗି ଯୋହାନ୍‌କେ ସାସାବରାଃ ହୁକୁମ୍ ଏମାକାଦ୍ ତାଇକେନାଏ, ଆତଃ ଇନିଃକେ ତଲ୍‌କିଃତେ ଜେହେଲ୍‌କିୟାଏ, ହେରୋଦ୍ ନେଆଁ ରିକାକେଦାଏ, ଚିୟାଃତି ହେରୋଦ୍ ଆୟାଃ ହାଗାତେ ଫିଲିପ୍‌ରାଃ କୁଡିତେ ହେରୋଦିୟାଃକେ ମାଣ୍ଡୁଅକାଇ ତାଇକେନା । ୧୮ ଚିୟାଃତି “ହାଗାମାଃ କୁଡିକେ ଦହତେୟାଃ ଆଇନ୍ ଲେକାତେ ଆମାଃ ନାଙ୍ଗ୍ କା ଠାଉକାଃ” ମେନ୍ତେ ଯୋହାନ୍ ହେରୋଦ୍‌କେ କାଜିକାଇ ତାଇକେନା ।

୧୯ ଏନାତେ, ହେରୋଦିୟାଃ ଇନିଃକେ ଖ୍ୱତେ ଗଗଏଃ ସାନାଙ୍ଗ୍ ତାଇକେନାଏ, ମେନ୍‌ଦ ହେରୋଦିଆ କାଏ ଦାଡିତାଇକେନା । ୨୦ ଚିୟାଃତି, ହେରୋଦ୍ ଯୋହାନ୍‌କେ ମିଆଁଦ୍ ଧାର୍‌ମାନ୍ ଆତଃ ପାବିତାର୍ ହତ୍ ତାନିଃ ମେନ୍ତେ ସାରିକେଦ୍‌ତେ ବରଆଇତାନ୍ ତାଇକେନାଏ ଆତଃ ଇନିଃକେ ଜେହେଲ୍‌ରେ ଜୀହିଦ୍‌ଗି ମାଣ୍ଡୁଅକାଇ

☆ ୭:୧୩ ୭:୧୩ ଯାକୁବ ୫:୧୪. ☆ ୭:୧୪ ୭:୧୪ ମାଥୁର ୧୭:୧୪; ମାର୍ଚ୍ଚ ୮:୨୮; ଲୁକ ୯:୧୯. * ୭:୧୪ ୭:୧୪ ବିଷ୍ଣାଡ୍ † ୭:୧୪ ୭:୧୪ ଗାଲିଲ୍‌ରେନ୍ ହାକିମ୍ ☆ ୭:୧୭ ୭:୧୭ ଲୁକ ୩:୧୯,୨୦.

ତାଇକେନାଏ । ଆତ୍ମା ଇନିୟାଃ କାଜିକ ଆୟୁମ୍‌କେଦ୍‌ତେ ପୁରାଃଗି ଦାନ୍‌ରାଅଃ ତାଇକେନ୍‌ରେୟ ଇନିୟାଃ କାଜିକ ରାସ୍‌କାତେ ଆୟୁମ୍ ତାଇକେନା ।

୨୧ ଚୁଣ୍ଡୁର ହେରୋଦିଆ ନାଗେନ୍ତେ ନେଡା ସେଚେର୍‌ୟାନା, ହେରୋଦ୍ ଆୟାଃ ଜାନାମ୍ ହୁଲାଙ୍‌କେ ମାନାଅ ନାଗେନ୍ତେ, ଆୟାଃ ମାପରାଙ୍‌ ଦାର୍‌ବାର୍ ହଡକ, ପାଲ୍‌ଟାନକଆଃ ସାର୍‌ଦାର୍‌କ, ଆତ୍ମା ଗାଲିଲ୍‌ରେନ୍ ମାପରାଙ୍‌ ହଡକଆଃ ନାଗେନ୍ତେ ନୁବାର୍‌ରେୟାଃ ମାରାଙ୍‌ ଜଜମାଃ ବାଇକେଦାଏ । ୨୨ ହେରୋଦିୟାଃରାଃ ହନ୍ତେକୁଡି ଜମେଅଡ଼ାଃରେ ବଲକେଦ୍‌ତେ ସୁସୁନ୍‌କେଦାଏ, ଆତ୍ମା ହେରୋଦ୍‌ତାଃ ହିଜୁଆକାନ୍ ସବେନ୍ ନେଅଁତା ହଡକକେ ରାସ୍‌କା କେଦକଆଏ । ଏନ୍ତେ ରାଜା ହେରୋଦ୍ ହନ୍ତେକୁଡିକେ କାଜିକିୟାଏ “ଆମ୍ ସୁକୁଃତେଆଃ ଜେଡ୍‌ନାଃମ୍ ଆସିଙ୍‌ରେହିଁ, ଏନାଇଙ୍‌ ଏମାମେୟାଁ ।” ୨୩ “ଜାହାନାଃଗି ଆସିଙ୍‌ମେ, ରାଇଜ୍‌ରାଃ ତାରାହାଟିଙ୍‌ ମେନେରେୟଗି ଆଇଙ୍‌ ଏମାମେୟାଁ” ମେନ୍ତେ ରାଜା ଇନିଃତାଃରେ କିରିୟାକେଦାଏ ।

୨୪ ଆତ୍ମା ଏନ୍ କୁଡିହନ୍ ଅଡଙ୍‌ୟାନ୍‌ତେ, ଚିକାନାଃଇଙ୍‌ ଆସିୟା ମେନ୍ତେ ଏଙ୍‌ଗାତେକେ କୁଲିକିୟାଏ ? ଆୟାଃ ଏଙ୍‌ଗାତେ କାଜିରୁହାଡ୍‌କିୟା “ବାପ୍ରିସ୍‌ଲା ଏମାଃନିଃ ଯୋହାନ୍‌ଆଃ ବହଃ ।”

୨୫ ଏନ୍ କୁଡିହନ୍ ଜାଲ୍‌ଦିଗି ହିଜୁଃ ରୁହାଡ୍‌କେଦ୍‌ତେ ରାଜାକେ କାଜିକିୟାଏ, “ନାହାଁଃଗି ନେତାଃରେ, ବାପ୍ରିସ୍‌ଲା ଏମାଃନିଃ ଯୋହାନ୍‌ରାଃ ବହଃ ମିଆଁଦ୍ ଆଡିରେ ଏମାଇଙ୍‌ମେ ।”

୨୬ ଏନ୍ କାଜି ହରାତେ ରାଜା ପୁରାଃଗି ହୁଡିଙ୍‌ଜାଉୟାନା, ମେନ୍‌ଦ ନେଅଁତାକାନ୍‌କଆଃ ସାମ୍‌ନାଙ୍‌ରେ କିରିୟାକାଦ୍ ହରାତେ ଇନିଃ ଆୟାଃ ଆନାସିକେ ବାନଃ ମେନ୍ତେ ମାନା କାଏ ଦାଡିକେନା । ୨୭ ଏନା ମେନ୍ତେ ରାଜା ଇମ୍‌ତାଗି ମିଆଁଦ୍ ସିପାଇକେ, ଯୋହାନ୍‌ଆଃ ବହଃ ଆଡିରେ ଆଉ ନାଗେନ୍ତେ କୁଲିକିୟାଏ, ଇନିଃଦ୍ ସେନଃୟାନ୍ତେ, ଜେହେଲ୍‌ରେ ଯୋହାନ୍‌ରାଃ ବହଃକେ ମାଆଃକେଦାଏ, ୨୮ ଏନ୍ତେ ଇନିୟାଃ ବହଃ ମିଆଁଦ୍ ଆଡିରେକ ଆଉକେଦା ଆତ୍ମା ହନ୍ତେକୁଡିକେକ ଏମ୍‌କିୟା, ଏନ୍ତେ କୁଡିହନ୍ ଏଙ୍‌ଗାତେକେ ଏନା ଏମ୍‌କିୟାଏ । ୨୯ ଯୋହାନ୍‌ଆଃ ଚେଲକ

ଏନା ଆୟୁର୍ବେଦକେଦେକ ହିନ୍ଦୁଃୟାନା ଆଡ଼ଃ ଆୟାଃ ହଡ଼଼ମକେ
ଇଦିକେଦେତେ ତପାଗାଡ଼ାରେକ ତପାକେଦା ।

**ୟାଶୁ ଗାଦେଲ୍ ହଡ଼କକେ ଜମେୟାଃ ଏମାକତାନାଏ
(ମାଥୁଉ ୧୪:୧୩-୨୧; ଲୁକ ୯:୧୦-୧୭; ଯୋହାନ୍ ୬:୧-୧୪)**

୩୦ ପ୍ରେରିତକ ଯାଶୁତାଃରେକ ହୁଣ୍ଡିୟାନା, ଆଡ଼ଃ ଆକ କାମିକାଦ୍
ସବେନାଃ, ହଡ଼କକେ ଇତୁତେଆଃକ ଇନିଃକେ ଉଦୁବକିୟାକ ।
୩୧ ଏନ୍ତେ ପୁରାଃ ହଡ଼କ ହିନ୍ଦୁଃ ସେନଃତାନ୍‌କ ତାଇକେନା, ଆଡ଼ଃ
କୁଲାନାନ୍ ତେଲ୍ଲାଇ ଜଜମ୍ ନାଗେନ୍ତେ ସାମାଏ କାକ ନାମକେଦାଃ,
ଏନାମେନ୍ତେ ଯାଶୁ ମେତାଦକଆଏ, “ଦଲ୍ଲା ଜାହାନ୍ ସିଃସଏଃ
ଠାୟାଦ୍‌ତେବୁଆଃ, ଅକ୍‌ତାଃରେ ଆବୁ ହୁଡ଼ିଙ୍ଗ୍‌ଲେକା ରୁଡ଼ନୁବୁ
ଦାଡ଼ିୟାଃ ।” ୩୨ ଏନ୍ତେ ଇନ୍‌କୁ ଲାଉକାରେ ଦେଏଃୟାନ୍ତେ ମିଆଁଦ୍
ସିଃସଏଃ ଠାୟାଦ୍‌ତେ ସେନଃୟାନାକ ।

୩୩ ମେନ୍‌ଦ, ହଡ଼କ ଇନ୍‌କୁକେ ସେନଃତାନ୍‌କ ନେଲ୍‌କେଦକଆ
ଆଡ଼ଃ ଇନ୍‌କୁକେ ନେଲ୍‌ଉରୁମ୍ କେଦକଆକ, ଆଡ଼ଃ ସବେନ୍
ସାହାରକଏତେ ହଡ଼କ ସେସେନ୍‌ତେଗି ଏନ୍ ଠାୟାଦ୍‌ତେ ସିଦାରେଗି
ତେବାଃୟାନାକ । ୩୪ ✧ ଯାଶୁ ଲାଉକାଏତେ ଆଡ଼ଗୁୟାନ୍‌ତି ଗାଦେଲ୍
ହଡ଼କକେ ନେଲ୍‌କେଦ୍‌ତେ ଜୀଉରେ ବିଲ୍‌କାଆୟାନାଏ‡, ତିୟାଃତି
ଇନ୍‌କୁଦ ଗୁପିନିଃ ବାଙ୍ଗାଲ ମିଣ୍ଡିକ ଲେକାକ ତାଇକେନା, ଏନ୍ତାଃରେ
ଇନିଃ ଇନ୍‌କୁକେ ଇତୁ ଏଟେଦକେଦଆଏ । ୩୫ ଆଡ଼ଃ ସିଙ୍ଗି
ହାସୁରଃତାନ୍‌ରେ, ତେଲ୍ଲାଇ ଯାଶୁତାଃ ସେନ୍‌କେଦ୍‌ତେକ କାଜିକିୟା,
“ନେ ଠାୟାଦ୍ ସିଃସଏଃଗିୟା, ଆଡ଼ଃ ସିଙ୍ଗିଅଃ ସେନଃୟାନା ।
୩୬ ଏନାମେନ୍ତେ ଜାପାଃ ହାତୁ ଆଡ଼ଃ ଟଲ୍ଲାଇକେତେ ସେନ୍‌କେଦ୍‌ତେ
ଜୁମ୍‌ମାଃକ କିରିଙ୍ଗ୍ ଜମେକା ମେନ୍ତେ ଏନ୍ ହଡ଼କକେ ବିଦାତାକମେ
।”

୩୭ ଯାଶୁ କାଜିରୁହାଡ଼ାଦକଆଏ, “ଆପେଗି ଇନ୍‌କୁକେ ଜାହାନାଃ
ଜମେୟାଃ ଏମାକପେ,” ଇନ୍‌କୁଦ ଇନିଃକେ କାଜିକିୟାକ, “ଆଲେଗି
ତି ୨୦୦ ରୁପାୟା ସିକାଃତେ ହଲ୍‌ଙ୍ଗ୍ କିରିଙ୍ଗ୍‌କେଦ୍‌ତେ ଜମେୟାଃଲେ
ଏମାକଆ ?”

✧ ୭:୩୪ ୭:୩୪ ମାଥୁଉ ୯:୩୬. ‡ ୭:୩୫ ୭:୩୫ ଦାୟାତେ ପେରେଃୟାନାଏ § ୭:୩୭
6:37 ମୁସିଙ୍ଗ୍‌ରାଃ ନାଲ୍

୩୮ ଏନ୍ତେ ଯୀଶୁ ଇନକୁକେ କୁଲିକେଦକଆଏ, “ଆପେତାଃରେ ଚିମିନ୍ ହଲଙ୍ଗ୍ ମେନାଃ ? ତୁ, ନେଲାଇଲେପେ,” ଇନକୁଦ ନାମକେଦ୍‌ଚି ଇନିଃକେକ ଉଦୁବ୍‌କିୟା, “ମଣେୟା ହଲଙ୍ଗ୍ ଆତଃ ବାରିଆ ହାକୁ ।”

୩୯ ଏନ୍ତେ ଯୀଶୁ ଚେଲାଇକେ “ହାରିୟାର ତାସାଦ୍‌ରେ ସବେନ୍ ହଡକକେ ପାନ୍ତିପାନ୍ତି ଦୁବ୍‌କୁପେ” ମେନ୍ତେ ଆରୁକେଦକଆ । ୪୦ ଆତଃ ହଡକ ମିଆଁଦ୍ ପାନ୍ତିରେ ଶାଅ ଶାଅ ଆତଃ ମିଆଁଦ୍ ପାନ୍ତିରେ ପାଚାଗ୍ ପାଚାଗ୍ ଲେକାକ ଦୁବ୍‌ୟାନା । ୪୧ ଆତଃ, ଯୀଶୁ ଏନ୍ ମଣେୟା ହଲଙ୍ଗ୍ ଆତଃ ବାରିଆ ହାକୁ ସାବ୍‌କେଦ୍‌ତେ ସିମାସାଃ ସାଙ୍ଗିଲ୍‌ରାକାବ୍‌ତାନଲଃ ଆଶିଷ୍‌କେଦାଏ ଆତଃ ହଲଙ୍ଗ୍ କେତାଃକେଦ୍‌ତେ ଚେଲାଇକେ ଏମାଦକଆଏ ଆତଃ ହାକୁକେହ୍ ଇନକୁ ହାଚିଙ୍‌କେଦାଃକ । ୪୨ ସବେନ୍‌କ ଜମ୍‌କେଦ୍‌ତେ ବି'ୟାନାକ । ୪୩ ଏନ୍ତେ ଚେଲାଇ ଜମ୍ ସାରେଜାକାନ ହଲଙ୍ଗ୍ ଆତଃ ହାକୁ ବାରା ଚୁଙ୍ଗିକ ହାଲାଙ୍ଗ୍ ପେରେଃକେଦାଃକ । ୪୪ ଜମ୍‌କେନ୍‌କଦ, ପାଞ୍ଚ ହାଜାର କଡ଼ାକ ତାଇକେନାକ ।

ଯୀଶୁ ଦାଆଃ ଚେତାନରେ ସେସେନ୍‌ତାନାଏ (ମାଥୁଉ ୧୪:୨୨-୩୩; ଯୋହାନ ୬:୧୫-୨୧)

୪୫ ଇମ୍‌ତାଗି ଯୀଶୁ ଚେଲାଇକେ ଲାଉକାରେ ଦୁବ୍‌କେଦ୍‌ତେ ଦରେୟା ହାନ୍ ପାରମ୍ ବେଥ୍‌ସାଇଦାତେ କୁଲ୍ ଆୟାରକେଦକଆ । ଇମ୍‌ତାଲଃ ଇନିଃ ଗାଦେଲ୍ ହଡକକେ ବିଦାକେଦକଆ । ୪୬ ଇନିଃ ଗାଦେଲ୍ ହଡକକେ ବିଦାକେଦ୍‌ତେ, ବିନ୍ତି ନାଗେନ୍ତେ ବୁରୁତେ ରାକାବ୍‌ୟାନା ।

୪୭ ଆତଃ ସିଙ୍ଗିହାସୁର୍‌ତାନରେ ଲାଉକା ଥାଲା ଦରେୟାରେ ତାଇକେନା, ଇମ୍‌ତାଦ ଯୀଶୁ ଏସ୍‌କାର୍‌ଗି ଅତେରେ ତାଇକେନାଏ । ୪୮ ସାମ୍‌ନାଙ୍ଗ୍‌ରାଃ ମାରାଙ୍ଗ୍‌ହୟତେ ଚେଲାଇ ଦୁକୁତେ ଲାଉକାକେ ଇଦିତାନ୍ ନେଲ୍‌କେଦ୍‌ତେ, ଇନିଃ ସେତାଃ ନିଦାରେୟାଃ ଉପୁନ୍ ଘାଡ଼ି ଇମ୍‌ତାକରେ ଯୀଶୁ ଦରେୟାରେ ସେସେନ୍‌କେଦ୍‌ତେ ଇନକୁତାଃତେ ହିଙ୍ଗୁଃକେଦ୍‌ତେ ସେନ୍‌ପାରମ୍‌କତାନାଏ ତାଇକେନା । ୪୯ ମେନ୍‌ଦ ଇନକୁ ଦରେୟା ଚେତାନରେ ଇନିଃକେ ସେସେନ୍‌ତାନକ ନେଲ୍‌କିଃତେ ବରକେଦାକ ଆତଃ “ବଙ୍ଗା ତାନିଃ” ମେନ୍ତେକ

କାଉରିକେଦା । ^{୫୦} ସବେନ୍ କ ଇନିଃକେ ନେଲ୍‌କିଃତେ ବରତେକ ଆର୍‌ଆରାଅୟାନା ।

ଇମ୍‌ତାଗି ଯୀଶୁ ଇନ୍‌କୁକେ ମେତାଦ୍‌କଆ, “ଜୀଉରେ କେଟେଜେପେ, ଆଇଙ୍ଗ୍ ଡାନିଙ୍ଗ୍ ଆଲ୍‌ପେ ବରଏୟା ।” ^{୫୧} ଏନ୍ତେ ଇନ୍‌କୁଲଃ ଲାଉକାରେ ଦେଏଃୟାନ୍‌ଟି ହୟ ସାଲ୍‌ସାନ୍ତ୍‌ୟାନା, ଚେଲାକଦ ପୁରାଃଗି ଆକ୍‌ଦାନ୍‌ଆୟାନାକ, ^{୫୨} ଇନ୍‌କୁ ପାଞ୍ଚ ହାଜାର୍ ହଡକକେ ଜମେୟାଃ ହାଟିଙ୍ଗ୍ କାଜିରାଃ ହରାତେ କାକ ସେଣ୍‌ୟାନା, ଚିୟାଃଟି ଆକଆଃ ମନ୍ କେଟେଦ୍ ତାଇକେନା ।

**ୟୀଶୁ ଗିନେସରେଡ୍‌ରେ ଦୁକୁହାସୁତାନକକେ ବୁଗିକତାନାଏ
(ମାଥୁଉ ୧୪:୩୪-୩୬)**

^{୫୩} ଯୀଶୁ ଆଡ଼ଃ ଆୟାଃ ଚେଲାକ ଦରେୟା ପାରମ୍‌କେଦ୍‌ଟି ଗିନେସରେଡ୍ ନୁଡୁମ୍ ପାରଗାନ୍‌ତେକ ସେଟେରୟାନା, ଆଡ଼ଃ ଲାଉକାକେ ତଲ୍‌କେଦାକ । ^{୫୪} ଇନ୍‌କୁ ଲାଉକାଏତେ ଆଡ଼ଗୁୟାନ୍‌ ତରସା, ଏନ୍ତାଃରେନ୍ ହଡକ ଯୀଶୁକେ ନେଲ୍‌ଉରୁମ୍‌କିୟାକ । ^{୫୫} ହଡକ ନେତେହେନ୍ତେକ ନିର୍‌ବାଡାକେଦା ଆଡ଼ଃ ଇନିଃ ଏନ୍ତାଃରିୟା ମେନ୍ତେ ଇନ୍‌କୁ ସାରିକେଦ୍‌ଟି ଦୁକୁହାସୁତାନକକେ ପାରକମକରେ ଇନିଃତାଃତେକ ଗଅଃ ଆଉକେଦ୍‌କଆ । ^{୫୬} ଆଡ଼ଃ ଯୀଶୁ ସବେନ୍ ହାଡୁ, ଟଲା, ସାହାରତେ ବଲଃତାଇକେନ୍‌ଲଃଟି, ହଡକ ଦୁକୁହାସୁତାନକକେ ପିଟ୍ ଠାୟାଦତେକ ଆଉକେଦ୍‌କଆ, ଆଡ଼ଃ ଲିଜାଃରେୟାଃ ଆର୍‌ରାକେ ଜୁଟିଦ୍‌ତାକାକ ମେନ୍ତେ ଇନିଃକେକ ବିନ୍ତି ତାଇକେନା, ଆଡ଼ଃ ଜୁଟିଦ୍‌କେଦ୍ ସବେନ୍‌କ ବୁଗିୟାନା ।



**ହାଡାମ୍‌ହଡକଆଃ ଇନିଡୁ
(ମାଥୁଉ ୧୫:୧-୯)**

^୧ ଚିମିନ୍ ଫୀରୁଶୀକ ଆଡ଼ଃ ଯୀରୁଶାଲେମ୍‌ଏତେ ହିଜୁଃଲେନ୍ ଚିମିନ୍ ଆଇନ୍ ଇଡୁକ ଯୀଶୁତାଃରେକ ହୁଣ୍ଡିୟାନା । ^୨ ଆଡ଼ଃ ଇନ୍‌କୁ ଯୀଶୁଆଃ ଚିମିନ୍ ଚେଲାକକେ ଯିହୁଦୀକଆଃ ରିତିରିଖାଜ୍ ଲେକାତେ ସଡରାକେଦ୍‌ତେ କା ଆବୁଙ୍ଗ୍ ତିଃଇତେ ଜମ୍‌ତାନକ ନେଲ୍‌କେଦ୍‌କଆ ।

୩ ଚିନ୍ତାଧରା ଫାରୁଶୀକ ଆତ୍ମ ସବେନ୍ ଯିହୁଦୀକ ପ୍ରାଚିନ୍ ହତ୍ତକଆଃ ରିତିରିଖାନ୍ ଲେକା ଡିଃଇ ବୁଗିଲେକାତେ କା ଆବୁଙ୍ଗ୍ ଜାକେଦ୍ କାକ ଜଜମାଃ । ୪ ଆତ୍ମ ପିର୍ବତେ ରୁହାଡ୍‌କେଦ୍‌ତେ ଦାଆଃତେ ଆଉରି ଆବୁଙ୍ଗ୍ ଜାକେଦ୍ କାକ ଜଜମାଃ । ଆତ୍ମ ନେ'ଲେକାନ୍ ରିତିରିଖାନ୍ ମାନାତିଙ୍ଗ୍ ତାଇକେନାକ, ତାଞ୍ଜାକ, ଚାଟୁକ, ପାର୍‌କମ୍‌କ*, ଆତ୍ମ ତାମ୍ବାତେ ବାଇୟାକାନ୍ ବାର୍ତ୍ତାନ୍‌କକେ ଦାଆଃତେ ଆବୁଙ୍ଗ୍ ଗାସାର୍ ତାଇକେନାକ ।

୫ ଏନାମେନ୍ତେ ଫାରୁଶୀକ ଆତ୍ମ ଆଇନ୍ ଇତୁକ ଯୀଶୁକେ କୁଲିକିୟାକ, “ଚିନାଃମେନ୍ତେ ଆମାଃ ଚେଲାକ ଡିଃଇ ବେଗାର୍ ଆବୁଙ୍ଗ୍‌କେଦ୍‌ତେ ସତ୍‌ରାଗି ଜଜମକ ଦୁବାଃ ଆତ୍ମ ଆବୁଆଃ ପ୍ରାଚିନ୍‌କଆଃ ରିତିରିଖାନ୍‌କ କାକ ମାନାତିଙ୍ଗ୍‌ତାନା ?”

୬ ଯୀଶୁ କାଜିରୁହାଡ୍‌କେଦ୍‌କଆଏ, “ଆପେ ବେଦାହତ୍ତକ ତାନ୍‌ପେ, ଯିଶାୟ ଆପେୟାଃ ବିଷାଏରେ ସାର୍‌ତିଗି ଆୟାର୍‌କାଜି କାଜିକାଦା, ନେଆଁଦ୍ ଅଲ୍‌କାନା,

“ପାର୍‌ମେଶ୍ୱାର୍ କାଜିକେଦାଏ, ‘ନେ ହତ୍ତକ ମଚାତେକ ମାଇନିଙ୍ଗ୍‌ତାନା,

ମେନ୍‌ଦ୍ ଆକଆଃ ମନ୍ ଆଇଙ୍ଗ୍‌ତାଃଏତେ ସାଙ୍ଗିନ୍‌ରେଆ ।

୭ ଆଇଙ୍ଗ୍‌କେ ସାମାଗିକ ସେଞ୍ଜାଇଙ୍ଗ୍‌ୟା;

ଆତ୍ମ ଇନ୍‌କୁଦ୍ ନେୟାଁ ଧାରାମ୍‌ରେୟାଃ କାଜି ତାନାଃ ମେନ୍ତେ ହତ୍ତକଆଃ ଆନାରୁକ ଇତୁକତାନା ।’

୮ “ଆପେ ପାର୍‌ମେଶ୍ୱାର୍‌ରାଃ ଆନ୍‌ଚୁକ ଦୟା କୁଣ୍ଡାମ୍‌କେଦ୍‌ତେ ହତ୍ତକଆଃ ରିତିରିଖାନ୍ ମାନାତିଙ୍ଗ୍ ତାନାପେ ।”

୯ ଯୀଶୁ ଆତ୍ମାଧି କାଜିୟାଦ୍‌କଆଏ, “ପାର୍‌ମେଶ୍ୱାର୍‌ରାଃ ଆନ୍‌ଚୁକେ କା ମାନାତିଙ୍ଗ୍‌କେଦ୍‌ତେ ଆପେୟାଃ ରିତିରିଖାନ୍‌କେ ମାନାତିଙ୍ଗ୍ ନାଗେନ୍ତେ ଆପେ ଆପେୟାଃ ହରାପେ ନାମାକାଦାଃ । ୧୦ ମୁଣା ଆନ୍‌ଚୁରେ କାଜିୟାକାଦାଏ, ‘ଏଙ୍ଗା ଆପୁ କିନ୍‌କେ ମାନାତିଙ୍ଗ୍‌କିନ୍‌ମେ’ ଆତ୍ମ ‘ଜେତାଏ ଏଙ୍ଗାତେକେ ଚାଏ ଆପୁତେକେ ସାର୍‌ପାଅ ରେଦ୍ ଇନିଃ ଗଜଃକାଏ ।’ ୧୧ ମେନ୍‌ଦ୍ ଆପେ କାଜିତାନାପେ, ଜେତାଏ ଆୟାଃ ଆପୁ ଚାଏ ଏଙ୍ଗାକେ କାଜିୟାକିନାଏ, ଆୟାଃତାଃଏତେ

* ୭:୪ 7:4 ଚିମିନ୍ ମାରି ଅନଲ୍‌କରେ ପାର୍‌କମ୍ କା ଅଲ୍‌କାନା

ଅକ୍ନାଃ ନାଗେନ୍ତେ ଆମାଃ ବୁଗିନାଃ ନାମେତେୟାଃ ‘କୁର୍ବାନା’ କାନା, ନେଆଁରାଃ ମୁଣ୍ଡିଦ ନେୟାଁ ପାର୍ମେଶ୍ଵାର ନାଗେନ୍ତେ ଦାନ୍ ଏମାକାନା, ୧୭ ଏନ୍ତେଦ ଆପେ ତାୟମ୍ତେ ଇନିଃକେ ଆୟାଃ ଏଙ୍ଗା ଚାହେ ଆୟାଃ ଆପୁଆଃ ନାଙ୍ ବୁଗିନାଃ ରିକା ନାଗେନ୍ତେ ଆତଃ ଜେଡ୍‌ନାଃ କାପେ ରିକାଟିକାଇତାନା । ୧୮ ଆତଃ ନେ ଲେକାତେ ଆପେୟାଃ ରିତିରିଝାଜ୍‌ତେ ପାର୍ମେଶ୍ଵାରାଃ କାଜିପେ ଫାଦାଆତମେତାନା† । ଆତଃ ନେ ଲେକାନ୍ କାମିକ ପୁରାଃପେ କାମିତାନା ।”

ହଡ୍‌କେ ଅକ୍ନାଃ ସତ୍‌ରାଇୟାଏ (ମାଥୁର ୧୫:୧୦-୨୦)

୧୫ ଏନ୍ତେ ଯୀଶୁ ଗାଦେଲ୍ ହଡ୍‌କକେ କେଡାକେଦ୍‌କଆଏ ଆତଃ ମେତାଦ୍‌କଆଏ, “ଆୟୁମେପେ ଆତଃ ଆର୍‌କାର୍ ଉରୁମେପେ । ୧୬ ହଡ୍‌ରେ ବାହାରିଏତେ ବଲଃତେୟାଃ ଜେଡ୍‌ନାଃ ଇନିଃକେ କାଏ ସତ୍‌ରା ଦାଡ୍‌ୟାଇଆ, ମେନ୍‌ଦ ଇନିଃତେ ଅକ୍ନାଃ ଅତଙ୍‌ଅଃଆ ଏନା ଆଇଃକ୍‌କେ ସତ୍‌ରାଇୟାଏ ।” ୧୭ ଆୟୁମ୍ ନାଗେନ୍ତେ ଲୁଡ୍‌ର୍ ମେନାଃନିଃ ଆୟୁମ୍‌ଜମେକାଏ †

୧୭ ଆତଃ ଇନିଃ ଗାଦେଲ୍ ହଡ୍‌କସାଃଏତେ ଫାର୍‌କାକେଦ୍‌ତେ ଅତଃରେ ବଲୟାନ୍‌ତି, ତେଲାତାୟାଃକ ଏନ୍ ଜନ୍‌କା କାଜିରାଃ ମୁଣ୍ଡିକ କୁଲିକୟାଃ । ୧୮ ଇନିଃ କାଜିରୁହାଡାଦ୍‌କଆଏ, “ଚିୟାଃ ଆପେୟାଗି ଡଣ୍ଡିଗିୟାପେ ? ବାହାରିଏତେ ହଡ୍‌ରେ ବଲଃତେୟାଃ ଇନିଃକେ କାଏ ସତ୍‌ରା ଦାଡ୍‌ୟାଇଆ । ୧୯ ଚିୟାଃଟି ଏନା ମନ୍‌ରେ କାହାଗି, ମେନ୍‌ଦ ଲାହିଦ୍‌ରେ ବଲଃଆ, ଆତଃ ହଡ୍‌ଏତେ ଅତଙ୍‌ ଏଣ୍ଡାଗଆଃ, ନେୟାଁ ଚିୟାଃ କାପେ ଆର୍‌କାରେତାନା ।” ନେ କାଜିରେ, ସବେନ୍ ଜଜମାଃ ଫାର୍‌ଟିଗିୟା ମେନ୍ତେ ଯୀଶୁ ଉଦୁବ୍‌କେଦାଏ ।

୨୦ ଆତଃଟି ଇନିଃ ମେତାଦ୍‌କଆଏ, “ଅକ୍ନାଃ ହଡ୍‌ରାଃ ବିଚାର୍‌ଏତେ ଅତଙ୍‌ଅଃଆ, ଏନା ହଡ୍‌କେ ସତ୍‌ରାଇୟାଏ । ୨୧ ଚିୟାଃଟି ଭିତାର୍‌ଏତେଗି, ହଡ୍‌କଆଃ ମନ୍‌ଏତେ ଏଡ୍‌କାନ୍ ଉଡ୍‌ଃ ଅତଙ୍‌ଅଃତାନା, ଆପାଙ୍‌ର୍ କାମି, କୁମ୍‌ଡ୍‌ ହଡ୍‌ଗଏଃ, ୨୨ ଆପାଙ୍‌ର୍, ଲାଲାଟ୍, ଏଡ୍‌କାନାଃ, ବେଦା, ନିଲାଜ୍, ହିସ୍‌ଙ୍ଗା, ନିନ୍ଦା, ଫୁଟାନି

† ୭:୧୩ ୭:୧୩ ସାମାଉତାରେତାନା ‡ ୭:୧୭ 7:16 ନେ ବାଚାନ୍ ଚିମିନ୍ ମାରି ଅନଲ୍‌ରେ ବାନଃଆ

ଆତ୍ମା ବାଲୁସେଣା । ୨୩ ନେ ସବେନ୍ ଏଡକାନ୍ କାଜି ମନ୍ଏଡେ ଅଡ଼ଞ୍ଚଅଃତାନା ଆତ୍ମା ହଡକେ ସଡ଼ରାଇଆଏ ।”

**ୟୀଶୁ ମିଆଁଦ୍ ସାଅଁସାର୍ କୁଡ଼ିହନ୍‌କେ ବୁଗି ତାନାଏ
(ମାଥୁର ୧୫:୨୧-୨୮)**

୨୪ ଏନ୍ତେ ଯୀଶୁ ଏନ୍ତାଃକେ ବାଗିକେଦ୍‌ଡେ ସୋର୍ ଦିଶୁମ୍‌ରାଃ ଜାପାଃ ହାତୁଡେ ସେନଃୟାନାଏ । ଇନିଃ ମିଆଁଦ୍ ଅଡ଼ାଃରେ ବଲୟାନାଏ ଆତ୍ମା ଜେତାଏ ଏନ୍ ଅଡ଼ାଃରେ ମେନାଇୟା ଏନା ଆଲକାକ ସାରିକା ମେନ୍ତେ ଇନିଃ ସାନାଙ୍ଗକେଦାଏ, ମେନ୍‌ଦ ଇନିଃ କାଏ ଉକ୍ତ ଦାଡ଼ିୟାନା । ୨୫ ମେନ୍‌ଦ ଇମ୍‌ତାଗି ମିଆଁଦ୍ କୁଡ଼ି, ଯୀଶୁ ହିଜୁଃକାନାଏ ମେନ୍ତେ ଆୟୁମ୍‌କେଦ୍‌ଡେ ହିଜୁଃୟାନାଏ ଆତ୍ମା ଯୀଶୁଆଃ କାଟାସୁବାରେ ଉୟୁଃୟାନାଏ, ଚିୟାଃଚି ସଡ଼ରା ଆମ୍‌ଦ ଇନିୟାଃ ହନ୍ତେକୁଡ଼ିକେ ଏସେରାକାଇ ତାଇକେନାଏ । ୨୬ ଇନିଃ ସିରିୟା ଦିଶୁମ୍‌ରାଃ ଫୋନେସିୟାରେନ୍ ମିଆଁଦ୍ ସାଅଁସାର୍ କୁଡ଼ି ତାଇକେନାଏ, ଇନିଃ ହନ୍ତେକୁଡ଼ିଏଡେ ବଙ୍ଗାକେ ହାଡ଼ଅଡ଼ଞ୍ଚତାଇମେ ମେନ୍ତେ ଯୀଶୁକେ ବିନ୍ତିକିୟାଏ ।

୨୭ ମେନ୍‌ଦ ଯୀଶୁ ମେତାଇୟାଏ, “ସିଦାଡେ ହନ୍‌କକେ ଜମ୍‌ରିକାକମେ, ଚିୟାଃଚି ହନ୍‌କଆଃ ଜମେୟାଃ ରେଃକକେଦ୍‌ଡେ ସେତାକଆଃ ଆୟାରରେ ହୁଦ୍‌ମାଡେୟାଃ କା ବୁଗିନାଃ ।”

୨୮ ଏନ୍ତେ ଏନ୍ କୁଡ଼ି କାଜିକିୟାଏ, “ହେଗି ପ୍ରାଭୁ, ମେନ୍‌ଦ ମେଜ୍‌ଲାତାରରେ ସେତାକହଗି ହନ୍‌କଆଃ ହଲଙ୍ଗକେଟାଃକ ଜଜମାଃ ।”

୨୯ ଏନ୍ତେ ଯୀଶୁ ଇନିଃକେ କାଜିକିୟାଏ, “ନେ କାଜିରେୟାଃ ନାଗେନ୍ତେ ଜୁ, ଅଡ଼ାଃଡେ ରୁହାଡ଼ମ୍‌ଫେ, ହନ୍‌ମ୍‌ଫେ କୁଡ଼ିତାଃଏଡେ ବଙ୍ଗା ଅଡ଼ଞ୍ଚୟାନା ।”

୩୦ ଏନ୍ କୁଡ଼ି ଅଡ଼ାଃଡେ ରୁହାଡ଼ୟାନ୍ତେ ହନ୍ତେକୁଡ଼ିତାୟାଃକେ ପାର୍‌କମରେ ଗିତିଜାକାନ୍ ନେଲ୍‌କିୟାଏ, ଆତ୍ମା ବଙ୍ଗା ଇନିଃତାଃଏଡେ ଅଡ଼ଞ୍ଚଆଁକାନ୍ ନାମ୍‌କିୟାଃ ।

କାଆୟୁମ୍‌ଦାଡ଼ି ଆତ୍ମା କା ବାଗାଣ୍‌ଦାଡ଼ି ହଡକେ ଯୀଶୁ ବୁଗି ତାନାଏ

୩୧ ଆତ୍ମା ଯୀଶୁ ସୋର୍ ଦିଶୁମ୍‌ଏଡେ ଅଡ଼ଞ୍ଚୟାନ୍‌ଚି, ସିଦୋନ୍ ଦିଶୁମ୍‌ରାଃ ଆଲା ହରା, ଗାଲିଲ୍‌ ଦରେୟା, ଆତ୍ମା ଦେକାପଲ୍ଲା

ସିମ୍ନାସାଃତେ ସେନଃୟାନାଏ । ୩୨ ଚିମିନ୍ ହଡ଼କ ମିଆଁଦ୍ କା ଆୟୁମ୍ ଦାଡ଼ିତାନ୍ ହଡ଼ ଆତଃ କା ବାଖାଁଣ୍ ଦାଡ଼ିତାନ୍ ହଡ଼କେ ଯୀଶୁତାଃତେ ଆଡ଼କିୟାଃକ, ଆତଃ ଆମାଃ ତିଃଇ ଇନିଃରେ ଦହେମେ ମେନ୍ତେକ ବିନ୍ତିକିୟା ।

୩୩ ଆତଃ ଯୀଶୁ ଇନିଃକେ ଗାଦେଲ୍ ହଡ଼କ ଆଲାଏତେ ଗେନାତେ ଏସ୍କାର୍ଗି ଇଦିକିୟାଏ, ଆତଃ ଆୟାଃ ସାର୍ସାର୍ ଇନିୟାଃ ଲୁତୁର୍ରେ ଦହକେଦାଏ, ଆତଃ ବେଏକ୍କେଦ୍ତେ ଇନିୟାଃ ଆଲାଙ୍ଗ୍ କେ ଜୁଚିଦକେଦାଏ । ୩୪ ଆତଃ ସିମ୍ନାସାଃତେ ସାଙ୍ଗିଲ୍ କେଦ୍ତେ, ମାରାଙ୍ଗ୍ ସାହେଁଦ୍ଲଃ ମେନ୍ କେଦାଏ “ଏଫ୍ପାଆଃ” ନେଆଁରାଃ ମୁଣ୍ଡିଦ “ନିଜଃମେଁ” ।

୩୫ ଇମ୍ତାଗି ଇନିୟାଃ ଲୁତୁର୍ଦ ନିନ୍ୟାନା ଆତଃ ଆଲାଙ୍ଗ୍ରେୟାଃ ତନଲ୍ ରାଡ଼ାୟାନା, ଆତଃ ଇନିଃ ବୁଗିଲେକାତେ ବାଖାଁଣ୍ ଦାଡ଼ିକେଦାଏ । ୩୬ ଏନ୍ତେ ଯୀଶୁ ଜେତାଏକକେ ନେ କାଜି କା ଉଦୁବ୍ ନାଗେନ୍ତେ ଇନ୍କୁକେ କାଜିକେଦକଆଏ, ମେନ୍ଦ୍ ଇନିଃ ହଡ଼କକେ ପୁରାଃଗି କାଜିକେଦକରେହ ଇନ୍କୁ ଆତଃଗି ପୁରାଃତେକ ଉଦୁବ୍ ବାଡ଼ାକେଦା । ୩୭ ଆତଃ ଏନା ଆୟୁମ୍ କେଦ୍ ହଡ଼କ ପୁରାଃଗିକ ଆକ୍ଦାଦାଅୟାନା, ଆତଃ କାଜିକେଦାଃକ, “ଇନିଃଦ୍ ସବେନାଃ ବୁଗିଲେକାତେ କାମିୟାକାଦାଏ, କା ଆୟୁମ୍ ଦାଡ଼ିତାନ୍ କକେ ଇନିଃ ଆୟୁମ୍ ରିକାକେଦକଆଏ, ଆତଃ କା ବାଖାଁଣ୍ ଦାଡ଼ିତାନ୍ କକେ ବାଖାଁଣ୍ ନାଗେନ୍ତେ ପେଡ଼େଃ ଏମାକୁତାନାଏ ।”

୮

ୟୀଶୁ ଉପୁନ୍ ହାଜାର୍ ହଡ଼କକେ ଜମେୟାଃ ଏମାକତାନାଏ (ମାଥ୍ ୧୫:୩୨-୩୯)

୧ ଏନ୍ ଦିପିଲିରେ ଆତଃଗି ଗାଦେଲ୍ ହଡ଼କ ହୁଣ୍ଡିୟାନା, ଆତଃ ଜଜମାଃକ ବାନଃ ହରାତେ, ଯୀଶୁ ଚେଲାକକେ ଆୟାଃତାଃତେ ହାକାଅକେଦ୍ତେ କାଜିୟାଦକଆଏ, ୨ “ନେ ଗାଦେଲ୍ ହଡ଼କ ନାଗେନ୍ତେ ଆଇୟାଃ ଜୀଉ ବିଲ୍ କାଅଃତାନା, ଚିୟାଃଗି ଆପି ମାହାଁଏତେ ଆଇୟାଃଲଃ ମେନାକଆ, ଆତଃ ନାହାଁଃ ଇନ୍କୁତାଃରେ ଜମେୟାଃ ଜେଡ୍ନାଃ ବାନଃଆ । ୩ ଇନ୍କୁକେ ସାମାଲାହିଦ୍

ଅତୀତକାଳୀନ କୁଳତାକୁରେ ହରାକରେ ଲାଗାଉତାରଣଆକ*,
ଚିୟାଠି ଇନ୍ଦୁକୁଏତେ ଚିମିନ୍ଦୁକ ସାଜିନ୍ଦୁକଏତେ ହିନ୍ଦୁଆକାନାକ ।”

୪ ଇନିୟାଠ ଚେଲାକ କାଜିରୁହାଡ଼କିୟା, “ଅକଏ ନେ ସିଃସଏଠ
ଠାୟାଦ୍ରେ ନିମିନାଜ୍ ଗାଦେଲ୍ ହଡ଼କ ନାଗେନ୍ତେ ବିୟାଠି
ଜମେୟାଠ ଏମଦାଡ଼ିୟାଏ ?”

୫ ଯୁଗୁ କୁଲିକେଦକଆଏ, “ଆପେତାଠରେ ଚିମିନାଜ୍ ହଲଜ୍
ମେନା ?”

ଇନ୍ଦୁ କାଜିରୁହାଡ଼କିୟା, “ସାଡ଼ୁ ହଲଜ୍ ।”

୬ ଇନିଃ ସବେନ୍ ହଡ଼କକେ ଅତେରେ ଦୁବ୍ପେ ମେତାଦକଆଏ
। ଏନ୍ତେ ଏନ୍ ସାଡ଼ୁ ହଲଜ୍ ଇଦିକେଦତେ ପାରମେଶ୍ଵାରକେ
ଧାନ୍ୟାବାଦ୍ ଏମକିୟାଏ, ଆତଃ ଏନା କେତାଠକେଦତେ ହଡ଼କକେ
ହାଟିଜ୍ଆକ ନାଗେନ୍ତେ ଚେଲାତାୟାଠକକେ ଏମାଦକଆଏ, ଆତଃ
ଇନ୍ଦୁକେ ହାଟିଜ୍ଆଦକଆକ । ୭ ଇନ୍ଦୁକାଠରେ ହୁଡ଼ିଜ୍ଲେକା
ହୁଡ଼ିଜ୍ ହାକୁ ତାଇକେନାକ, ଏନ୍ ହାକୁ ନାଗେନ୍ତେ ପାରମେଶ୍ଵାରକେ
ଧାନ୍ୟାବାଦ୍ ଏମକିୟାଏ, ଆତଃ ଏନାକେ ହାଟିଜ୍ ନାଗେନ୍ତେ
ଚେଲାକକେ କାଜିକେଦକଆଏ । ୮ ଏନା ଜମକେଦତେ ସବେନ୍ଦକ
ବିୟାନାକ, ଆତଃ ସାରେଜାକାନ୍ କେତାଠତେୟାଠକ ସାଡ଼ୁ ଚୁକ୍ତି
ହାଲାଜ୍କେଦାଠକ । ୯ ଏନ୍ତାଠରେ ଉପୁନ୍ ହାଜାର୍ ଲେକା ହଡ଼କ
ତାଇକେନା । ୧୦ ଆତଃ ଇନିଃ ଇନ୍ଦୁକେ ବିଦାକେଦକଚି, ଇମ୍ତାଗି
ୟୁଗୁ ଆୟାଠ ଚେଲାକଲଃ ଲାଉକାରେ ଦେଏଠୟାନାଏ, ଆତଃ
ଦାଲ୍ମାନୁଆ ସିମ୍ନାତେ ସେନଃୟାନା ।

ଫାରୁଶୀକ ମିଆଁଦ୍ ପେଡ଼େଠାଠ କାମି ଯୁଗୁତାଠଏତେକ ନେଲ୍
ସାନାଜ୍ତାନା

(ମାଥୁ ୧୨:୩୮-୪୨; ୧୨:୧-୪)

୧୧ ☆ଆତଃ ଫାରୁଶୀକ ହିନ୍ଦୁକେଦତେ ଯୁଗୁଲଠ
ଏପ୍ପରାଜ୍ଜାଗାର୍ ତାନଲଠ, ଇନିଠକେ ବିତାଅ ନାଗେନ୍ତେ
ଇନିଠ ସିମ୍ନାଏତେ ହିନ୍ଦୁଆକାନାଏ, ନେଆଁ ଉଦୁବ୍ ନାଗେନ୍ତେ
ସିମ୍ନାଏତେ ମିଆଁଦ୍ ଚିହ୍ନାକ ଆସିକିୟା । ୧୨ ☆ୟୁଗୁ ଜୀଉରେ

* ୮:୩ ୮:୩ ଆକଅକଆଠକ ☆ ୮:୧୧ ୮:୧୧ ମାଥୁ ୧୨:୩୮; ଲୁକ ୧୧:୧୭.
☆ ୮:୧୨ ୮:୧୨ ମାଥୁ ୧୨:୩୯; ଲୁକ ୧୧:୨୯.

ମାରାଜ୍ ସାହେଁଦକେଦ୍ତେ କାଜିୟାଦକଆଏ, “ଚିନାଃମେନ୍ତେ ନେ ପାରିୟାରେନ୍ ହଡକ ପେଡେଃରାଃ କାମିକ ରିକା ନାଗେନ୍ତେ କୁଲିତାନା ? ଆଇଜ୍ ସାର୍ଡିଗିଜ୍ କାଜିୟାପେତାନା, ନେ ପାରିୟାରେନ୍ ହଡକଆଃ ନାଗେନ୍ତେ ମିଆଁଦ୍ ଚିହ୍ନାଁହ କା ଏମଃଆ ।”

୧୩ ଇନିଃ ଇନ୍କୁକେ ବାଗିକେଦ୍ତେ, ଲାଉକାରେ ଦେଏଃରୁହାଡ୍‌ୟାନାଏ ଆଡଃ ଦରେୟା ହାନ୍‌ସାଃ ପାରମ୍‌ୟାନାଏ ।

ହେରୋଦ୍ ଆଡଃ ଫାରୁଶୀକଆଃ ରାନୁ
(ମାଥୁଉ ୧୭:୫-୧୨)

୧୪ ଯୀଶୁଆଃ ଚେଲାକ ହଲଜ୍ ଇଦି ନାଜ୍‌କ ରିଡିଜ୍‌କେଦା ଆଡଃ ଲାଉକାରେ ମିଆଁଦ୍‌ଗି ହଲଜ୍ ଆକତାଃରେ ତାଇକେନା, ୧୫ ଯୀଶୁ କେଟେୟାନ୍‌ଗି କାଜିୟାଦକଆଏ, “ନେଲେପେ, ଫାରୁଶୀକଆଃ ଆଡଃ ହେରୋଦ୍‌ଆଃ ହସଡ୍ ଇନିତୁ, ଅକଆଃଟି ରାନୁ† ଲେକାଃ ଏନାଏତେ ଚିର୍ଗାଲାକାନ୍ ତାଇନ୍‌ପେ ।”

୧୬ ଇନ୍କୁଦ୍ ଆକ ଆକରେକ ମେନ୍‌କେଦା, “ଆରୁତାଃରେ ହଲଜ୍‌କ ବାନଆଃ ଏନାମେନ୍ତେ ଇନିଃ ଆରୁକେ କାଜିୟାବୁତାନାଏ ।”

୧୭ ଯୀଶୁ ଇନ୍କୁଆଃ ଜୀଉରାଃ କାଜି ସାରିକେଦ୍ତେ ମେତାଦକଆଏ, “ଆପେତାଃରେ ହଲଜ୍ ବାନଃ ମେନ୍ତେ ଚିକାନାଜ୍ ଆପେଗି ଉଡ଼ୁତାନା ? ନାହାଁଃ ଜାକେଦ୍ କାପେଚି ସାରିକାଦା ଆଡଃ ଆଟ୍‌କାର୍‌ଉରୁମାକାଦା ? ଆପେୟାଃ ମନ୍ ନାହାଁଃ ଜାକେଦ୍‌ଚି କେଟେଦ୍‌ଗିୟା ? ୧୮ ଯମେଦ୍ ମେନାଃତେହ କା ଚିପେ ନେଲେତାନା ? ଆଡଃ ଲୁତୁର୍ ମେନାଃତେହ କା ଚିପେ ଆୟୁମେତାନା ? ଆଡଃ କା ଚିପେ ପାହାମେତାନା ? ୧୯ ମଣେୟାଁ ହଲଜ୍‌କେ କେଟାଃକେଦ୍ତେ ପାଞ୍ଚ ହାଜାର୍ ହଡକକେ ହାଟିଜ୍‌ଆଁଦକଆ, ଜମ୍ ସାରେଜ୍‌କେଟାଃ ଚିମିନ୍ ଟୁଜ୍‌ପେ ହାଲାଜ୍‌କେଦାଃ ?”

ଚେଲାକ କାଜିକିୟାଃ, “ବାରା ଟୁଜ୍ ।”

☆ ୮:୧୫ ୮:୧୫ ଲୁକ ୧୨:୧. † ୮:୧୫ ୮:୧୫ ପାପ୍ / ରାନୁ ହଲଜ୍‌କେ ମିଆଁଆଃଏ
☆ ୮:୧୮ ୮:୧୮ ମାର୍କ ୪:୧୨.

୨୦ ଆତ୍ମ ଆଇଁ “ଉପୁନ ହାଜାର ହତକ ନାଗେନ୍ତେ ସାତୁଠୁ ହଲଇଁ କେତାଃକେଦ୍ ଇମ୍ତାଈ, ସାରେଜାକାନ୍ କେତାଃତେୟାଃ ଚିମିନ୍ ଟୁଈପେ ହାଲାଇଁକେଦାଃ ?”

ଇନ୍କୁଦ କାଜିକିୟାଃ “ସାତ୍ ଟୁଈଲେ ହାଲାଇଁକେଦା ।”

୨୧ ଯୀଶୁ ମେତାଦକଆଏ, “ନାହାଃ ଜାକେଦ୍ ଚି କାପେ ଆଟକାର୍ ଉରୁମେତାନା ?”

ୟୀଶୁ ବେଥସାଇଦାରେନ୍ ମିଆଁଦ୍ କାଏ ନେଲ୍ ଦାଡ଼ିତାନ୍ ହତକେ ବୁଗି ତାନା

୨୨ ଏନ୍ତେ ଇନ୍କୁ ବେଥସାଇଦା ତେବାଃୟାନାକ, ଆତ୍ମ ହତକ ମିଆଁଦ୍ କାଏ ନେଲ୍ ଦାଡ଼ିତାନ୍ ହତକେ ଯୀଶୁତାଃତେକ ଆଉକିୟା ଆତ୍ମ ଇନିଃକେ ଜୁଟିଦକେଦ୍ତେ ବୁଗିମେ ମେନ୍ତେକ ବିକ୍ରିକିୟା ।

୨୩ ଯୀଶୁ, ଏନ୍ କା ନେଲ୍ ଦାଡ଼ିତାନ୍ ହତରାଃ ତିଃଇ ସାଦକେଦ୍ତେ ହାତୁଏତେ ଅତଙ୍ଗକିୟା । ଇନିୟାଃ ମେଦ୍ରେ ବେଏକକିୟାଏ ଆତ୍ମ ଆୟାଃ ତିଃଇ ଇନିଃରେ ଦହକେଦ୍ତେ କୁଲିକିୟାଏ, “ତିୟାଃ ଆମ୍ ଜେଡନାଃମ୍ ନେଲେତାନା ?”

୨୪ ଏନ୍ ହତଦ୍ ଆରିଦକେଦାଏ ଆତ୍ମ କାଜିକେଦାଏ, “ଆଇଁ ହତକକେ ସେନ୍ଦାଡ଼ାତାନ୍ ଦାରୁଲେକାଇଁ ନେଲ୍କତାନା ।”

୨୫ ଯୀଶୁ ଆତ୍ମମିସା ଇନିୟାଃ ମେଦ୍ରେ ଜୁଟିଦକେଦାଏ, ଏନ୍ତେ ଇନିଃ ନେଲ୍ ଦାଡ଼ିକେନାଏ, ଇନିଃ ବୁଗିୟାନାଏ ଆତ୍ମ ସବେନାଃ ଫାର୍ଚିଗି ନେଲ୍କେଦାଏ । ୨୬ ଯୀଶୁ ଇନିଃକେ ଅଡ଼ାଃତେ କୁଲ୍ ରୁହାଡ଼ିତାନ୍ଲଃ କାଜିକିୟାଏ, “ନେ ହାତୁତେ ଆଲମ୍ ସେନାଃ ।”

ପାତ୍ରରାସ୍ୟଆଃ ବିଶ୍ୱାସ୍

(ମାଥୂଉ ୧୭:୧୩-୨୦; ଲୁକ ୯:୧୮-୨୧)

୨୭ ଏନ୍ତେ ଯୀଶୁ ଆୟାଃ ଚେଲାକଲଃ କାଇସରିୟା ଫିଲିପି ଦିଶୁମ୍ରାଃ ହାତୁକ ସେନଃତାନ୍ ଇମ୍ତା ଚେଲାକକେ କୁଲିକେଦକଆ, “ଆଇଁ ଅକଏ ତାନିଈ ମେନ୍ତେ ହତକ କାଜିତାନା ?”

୨୮ ଇନ୍କୁ କାଜିରୁହାଡ଼କିୟାକ, “ଚିମିନ୍କ ବାପ୍ରିସ୍ତା ଏମଃନିଃ ଯୋହାନ୍, ଚିମିନ୍କ ଏଲିୟ ମେନ୍ଦ୍ ଚିମିନ୍କ ନାବୀକଏତେ ମିହୁଡ୍, ତାନିଃ ମେନ୍ତେକ କାଜିତାନା ।”

☆ ୮:୨୮ ୮:୨୮ ମାର୍କ ୭:୧୪,୧୫; ଲୁକ ୯:୭,୮.

୨୯ ✧ ଯୀଶୁ ଇନକୁକେ କୁଲିକେଦକଆ, “ଆଇଙ୍ଗ ଅକଏ ତାନିଙ୍ଗ ମେନ୍ତେପେ କାଜିତାନା ?” ପାଡ଼ରାସ୍ କାଜିରୁହାଡ଼କିୟାଏ, “ଆମ୍ବି ଖ୍ରୀଷ୍ଟ, ତାନମେ ।”

୩୦ ଏନ୍ତେ ଯୀଶୁ ଇନକୁକେ ହୁକୁମକେଦକଆ, “ଆଇଙ୍ଗ ଅକଏ ତାନିଙ୍ଗ ନେ କାଜି ଜେତାଏତାଃରେ ଆଲ୍ପେ ଉଦୁବେୟାଃ ।”

ଯୀଶୁ ଆୟାଃ ଦୁକୁସାହାତିଙ୍ଗ୍ ଆତଃ ଗନଏଃରାଃ କାଜି ଉଦୁବେତାନାଏ

(ମାଥୁର ୧୭:୨୧-୨୮; ଲୁକ ୯:୨୨-୨୭)

୩୧ ଏନ୍ତେ ଯୀଶୁ ଆୟାଃ ଚେଲକକେ ଇତୁ ଏଟେଦକେଦଆଏ, “ଆଇଙ୍ଗ ମାନଝାହନ୍ ତାନାଇଙ୍ଗ, ଆଇଙ୍ଗକେ ପୁରାଃ ଦୁକୁ ସାହାତିଙ୍ଗ୍ ଲାଗାତିୟାଃ, ଆତଃ ପ୍ରାଚିନ୍କ, ମୁଲ୍ ଯାଜାକକ ଆତଃ ଆଇନ୍ ଇତୁକ ଆଇଙ୍ଗକେ ହିଲାଇଙ୍ଗ୍‌ଇୟା ଆତଃ ଗଜିୟା, ଆତଃ ଆଇଙ୍ଗ୍ ଆପି ମାହାଁ ତାୟମ୍‌ତେ ଜୀଉ ବିରିଦାଇଙ୍ଗ୍ ।” ୩୨ ଆତଃ ଇନିଃ ନେ ବିଷାଏ ଫାର୍‌ଚିଆନ୍‌ଗି ଇନକୁକେ ଉଦୁବାଦକଆ । ଏନ୍ତେ ପାଡ଼ରାସ୍ ଯୀଶୁକେ ଗେନାତେ ଇଦିକିଃତେ ଏଗେର୍‌ଏଟେଦକିୟାଏ‡ । ୩୩ ମେନ୍‌ଦ ଯୀଶୁ ହେତାରୁହାଡ଼କେଦ୍‌ତେ ଆୟାଃ ଚେଲକସାଃ ଆରିଦକେଦ୍‌ତେ, ପାଡ଼ରାସ୍‌କେ ଏଗେରକିୟା, “ଏ ସାଏତାନ୍ ଆଇୟାଃତାଃଏତେ ଆତମେନ୍‌ମେ ଆମ୍‌ଦ ପାରମେଶ୍ଵାର୍‌ଆଃ ଲେକା କାହା ମେନ୍‌ଦ ହଡ଼କଆଃ ଲେକାମ୍ ଉଡ଼ୁତାନା ।”

୩୪ ✧ ଏନ୍ତେ, ଗାଦେଲ୍ ହଡ଼କକେ ଆତଃ ଚେଲକକେ, ଯୀଶୁ କେଡାକେଦକଆଏ ଆତଃ ମେତାଦକଆଏ, “ଜେତାଏ ହଡ଼ ଆଇଙ୍ଗକେ ଅତଙ୍ଗ୍ ସାନାଇରେଦ ଇନିଃ ଆଇଃକ୍ ଆପାନ୍‌କେ ହିଲାଇଙ୍ଗକାଏ§, ଆତଃ ଆୟାଃ କୁଶ୍* ଗଅଃକେଦ୍‌ତେ ଅତଙ୍ଗ୍‌ଇଙ୍ଗକାଏ । ୩୫ ✧ ଚିୟାଃଚି ଆୟାଃ ଜୀଉ ବାଞ୍ଛାଅ ସାନାଇତାନ୍‌ନିଃ ଏନାଏ ଆଦେୟା, ମେନ୍‌ଦ ଆଇଙ୍ଗ୍ ମେନ୍ତେ ଆତଃ ସୁକୁକାଜି ମେନ୍ତେ ଆୟାଃ ଜୀଉ ଆଦେନିଃ, ଏନାଏ ବାଞ୍ଛାଏୟା । ୩୬ ଜେତାଏ ହଡ଼ ଗଟା ଅତେଦିଶୁମ୍ ନାମ୍‌କେଦ୍‌ରେୟ ଆୟାଃ

✧ ୮:୨୯ ୮:୨୯ ଯୋହାନ୍ ୭:୬୮, ୭୯. ‡ ୮:୩୨ ୮:୩୨ ଆନୁଜୋଗକିୟାଏ ✧ ୮:୩୪ ୮:୩୪ ମାଥୁର ୧୦:୩୮; ଲୁକ ୧୪:୨୭. § ୮:୩୪ ୮:୩୪ ଆଇଃକ୍ ଆପାନ୍‌କେ ହିଲାଇଙ୍ଗକାଏ ଆପଣାକୁ ଅସ୍ଵୀକାର କରୁ * ୮:୩୪ ୮:୩୪ ଯୀଶୁନାଙ୍ଗ୍ ଦୁକୁସାହାତିଙ୍ଗ୍, ଆତଃ ଗଜଃନାଙ୍ଗ୍ ସେକାଡାକାନ୍‌ଲଃ ✧ ୮:୩୫ ୮:୩୫ ମାଥୁର ୧୦:୩୯; ଲୁକ ୧୭:୩୩; ଯୋହାନ୍ ୧୨:୨୫.

ଜୀଉକେ ଆଦେରେଦ ଇନିୟାଃ ଚିକାନ୍ ଫାଏଦା ହବାଅଆଃ ?
 ୩୭ ଚାଏ ଜେତାଏ ହଡ଼ ଆୟାଃ ଜୀଉ ନାମରୁହାଡ଼େ ନାଗେନ୍ତେ
 ଚିନାଃଏ ଏମ୍ ଦାଡ଼ିୟା ? ୩୮ ନେ ପାରିୟାରେନ୍ ଆପାଙ୍ଗିର୍ ଆଡ଼ଃ
 ପାପିହଡ଼କଆଃ ଆଲାରେ ଆଇଙ୍ଗ୍ ଆଡ଼ଃ ଆଇଁୟାଃ କାଜି ବିଷାଏରେ
 ଅକଏ ଗିହୁଗଃଆଏ, ଆଇଙ୍ଗ୍ ମାନୱାହନ୍ ତାନିଙ୍ଗ୍, ଆଇଙ୍ଗ୍ ପାବିତାର୍
 ଦୁଁଡ଼କଲଃ ଆପୁଇଁୟାଃ ମାନାରାଙ୍ଗ୍ରେ ହିଜୁଃରୁହାଡ଼୍ ଦିପିଲିରେ
 ଆଇଙ୍ଗ୍‌ହଗି ଏନ୍ ବିଷାଏରେ ଗିହୁଗଃଆଇଙ୍ଗ୍ ।”



୯ ଆଡ଼ଃ ଯୀଶୁ ମେତାଦକଆଏ, “ସାର୍ତିଗି କାଜିୟାପେ
 ତାନାଇଙ୍ଗ୍, ପାର୍ମେଶ୍ୱାର୍‌ଆଃ ରାଇଜ୍ ପେଡ଼େଃଲଃ ହିଜୁଃତାନ୍
 ଆଉରି ନେଲେ ଜାକେଦ୍, ନେତାଃରେ ତିଙ୍ଗୁଆକାନ୍ କଏଡେ ଚିମିନ୍‌କ
 ଗନଏଃ କାକ ଚାଖାଅୟା ।”

ୟୀଶୁଆଃ ରୁପ୍ ବାଦ୍‌ଲିଅଃ
 (ମାଥୁଉ ୧୭:୧-୧୩; ଲୁକ ୯:୨୮-୩୬)

୨ *ତୁରୁଇ *ମାଃ ତାୟମ୍‌ଡେ ଯୀଶୁ ପାଡ଼ରାସ୍, ଯାକୁବ୍ ଆଡ଼ଃ
 ଯୋହାନ୍‌କେ ମିଆଁଦ୍ ସାଲାଙ୍ଗି ବୁରୁ ଚେତାନ୍ ଇଦିକେଦକଆଏ
 ଆଡ଼ଃ ଇନ୍‌କୁ ଏନ୍ତାଃରେ ଏସ୍‌କାର୍‌ଗି ତାଇକେନାକ, ଆଡ଼ଃ
 ଇନ୍‌କୁଆଃ ନେପେଲ୍‌ରେ ଯୀଶୁଆଃ ରୁପ୍ ବାଦ୍‌ଲାଅୟାନା† । ୩ ନେ
 ଅଡେଦିଶୁମରେନ୍ ଜେତାଏ ଧୋବି କାଏ ପୁଣ୍ଡି ଦାଡ଼ିଲେକା, ଲିଜାଃକ
 ତାୟାଃଦ ଝାକ୍ ମାକ୍ ପୁଣ୍ଡିୟାନା । ୪ ଏନ୍ତେ ମୁଣା ଆଡ଼ଃ ଏଲିୟକେ,
 ଯୀଶୁଲଃ ଜାଗାର୍‌ତାନ୍ ନେଲ୍‌କେଦକିନାକ । ୫ ପାଡ଼ରାସ୍‌ଦ
 ଯୀଶୁକେ ମେତାଇୟାଏ, “ହେ ଗୁରୁ, ଆବୁ ନାଙ୍ଗ୍ ନେତାଃରେଗି
 ତାଇନଃ ପୁରାଃ ବୁଗିନାଃ, ଆପିୟା କୁମ୍‌ବୁ ବାଇୟାଃ, ମିଆଁଦ୍ ଆମାଃ
 ନାଗେନ୍ତେ, ମିଆଁଦ୍ ମୁଣା ନାଗେନ୍ତେ ଆଡ଼ଃ ମିଆଁଦ୍ ଏଲିୟ ନାଗେନ୍ତେ
 ।” ୬ ପାଡ଼ରାସ୍ ଚିକ୍‌ନାଃଏ କାଜିରୁହାଡ଼େୟା ଏନା କାଏ ଉଡ଼ଃ
 ଦାଡ଼ିକେଦା, ଚିୟାଃଚି ଇନ୍‌କୁଦ ପୁରାଃଗି ବରକେଦାକ ।

☆ ୯:୨ ୯:୨ ୨ ପାଡ଼ରାସ୍ ୧:୧୭,୧୮. * ୯:୨ ୯:୨ ଛ † ୯:୨ ୯:୨ ଆୟାଃ ରୁପ୍ /
 ମେଦ୍‌ମୁହାଡ଼୍‌ଆଡ଼ଃ ଲିଜାଃ ପୁଣ୍ଡି ଝାକ୍ ମାକ୍‌ୟାନା

୭ ✧ଏନ୍ତେ ମିଆଁଦ୍ ରିମିଲ୍ ହିଜୁଃକେଦ୍‌ତେ ଇନ୍‌କୁକେ ଉମ୍‌ଲୁ କେଦ୍‌କଆଏ, ଆଡ଼ଃ ଏନ୍ ରିମିଲ୍‌ଏତେ ମିଆଁଦ୍ କାଜି ଆୟୁମ୍‌ୟାନା “ନିଃଗି ଆଇଁୟାଃ ଦୁଲ୍‌ଲାଡ୍, ହନ୍‌ତାନିଃ, ଅକ୍‌ଏକେତି ଆଇଙ୍ଗ୍ ଦୁଲ୍‌ଲାଡ଼ାଃଇଙ୍ଗ୍, ନିୟାଃ କାଜି ଆୟୁମ୍‌ମେପେ ।” ୮ ଇନ୍‌କୁ ଇମ୍‌ତାଗି ଆରିଦ୍ ବିୟୁର୍‌କେଦାକ, ଆଡ଼ଃ ଆକଲଃ ଯୀଶୁକେ ବାଗିକେଦ୍‌ତେ ଜେତାଏକେ କାକ ନେଲ୍‌କିୟାଃ ।

୯ ବୁରୁଏତେକ ଆଡ଼ଗୁନ୍‌ତାନ୍‌ରେ ଯୀଶୁ ଇନ୍‌କୁକେ ଚେତାଅକେଦ୍‌କଆ, “ଆପେ ନେଲ୍‌କାଦ୍‌ତେଆଃ, ମାନଝାହନ୍ ଗଜାକାନ୍‌କଏତେ ଆଡ଼ରି ଜୀଉବିରିଦେନ୍ ଜାକେଦ୍, ଜେତାଏକେ ଆଲ୍‌ପେ ଉଦୁବାକଆ ।”

୧୦ ଇନ୍‌କୁଦ୍ ଇନିୟାଃ କାଜିକ ଆୟୁମ୍‌କେଦ୍‌ତେ “ଗଏଃକାନ୍ କଏତେ ଜୀଉବିରିଦେନ୍ କାଜିରାଃ ମୁଣ୍ଡି ଚିକ୍‌ନାଃ ତାନାଃ?” ମେନ୍ତେ ଆକ ଆକରେକ କୁଲିୟଃତାନ୍ ତାଇକେନା । ୧୧ ✧ଆଡ଼ଃ ଇନ୍‌କୁ ଯୀଶୁକେ କୁଲିକିୟାଃକ, “ଚିନାଃ ମେନ୍ତେ ଆଇନ୍ ଇତୁକ ଏଲିୟକେ ସିଦାତେ ହିଜୁଃଲ୍‌ଗାତିୟାଃ ମେନ୍ତେକ କାଜିୟାଃ?”

୧୨ ଇନିଃ କାଜିରୁହାଡ଼ାଦ୍‌କଆଏ, “ନେଆଁ ସାର୍‌ତିଗି ତାନାଃ, ଏଲିୟ ଆୟୁର୍‌ତେ ହିଜୁଃଗିୟାଏ, ଆଡ଼ଃ ସବେନାଃ ଆଡ଼ଃମିସା ବାକରୁହାଡ଼େୟାଏ । ମାନଝାହନ୍‌କେ ପୁରାଃ ଦୁକୁସାହାଡ଼ିଙ୍ଗ୍ ଲାଗାତିଙ୍ଗ୍‌ୟାଃ ଆଡ଼ଃ ହିଲ୍‌ଲ୍‌ଆକ, ନେୟା ଚିନାଃ ମେନ୍ତେତାମ୍ ଆୟାଃ ବିଷାଏରେ ଅଲ୍‌କାନା ? ୧୩ ଆଇଙ୍ଗ୍‌ଦଇଙ୍ଗ୍ କାଜିପେତାନା, ଏଲିୟ ହିଜୁଃୟାନାଏ, ଆଡ଼ଃ ପାବିତାର୍ ଅନଲ୍‌କ ଇନିୟାଃ ବିଷାଏରେ ଅଲ୍‌କାଦ୍ ଲେକା, ହଡ଼କ ଆକଆଃ ସାନାଙ୍ଗ୍ ଲେକା ଇନିଃକେ ରିକାକିୟାଃକ ।”

**ୟୀଶୁ ମିଆଁଦ୍ ବଙ୍ଗା ଏସେରାକାଇ ସିଟିଆକେ ବୁଗି ତାନା
(ମାଥୁଉ ୧୭:୧୪-୨୧; ଲୁକ ୯:୩୭-୪୩)**

୧୪ ଆଡ଼ଃ ଇନ୍‌କୁ ଏଟାଃ ଚେଲ୍‌କତାଃକ ରୁହାଡ଼୍‌ୟାନ୍‌ତି, ଗାଦେଲ୍ ହଡ଼କ ଇନ୍‌କୁଆଃ ବିୟୁର୍‌ତେ ହୁଣ୍ଡିଆକାନ୍ ଆଡ଼ଃ ଆଇନ୍ ଇତୁକଲଃ କାପାଜିତାନ୍‌କ ନେଲ୍‌କେଦ୍‌କଆ । ୧୫ ଯୀଶୁକେ ନେଲ୍‌ତାଇଲଃଗି ହଡ଼କ ଆକ୍‌ଦାନ୍‌ଦାୟାନା ଆଡ଼ଃ ନିର୍ ଦାରମ୍‌କେଦ୍‌ତେକ

✧ ୯:୭ ୯:୭ ମାଥୁଉ ୩:୧୭; ମାର୍ଚ୍ଚ ୧:୧୧; ଲୁକ ୩:୨୨. ✧ ୯:୧୧ ୯:୧୧ ମାଥୁଉ ୧୧:୧୪.

ଜହାରକିୟାଃ । ୧୭ ଯୀଶୁ, ଆୟାଃ ଚେଲାକକେ କୁଲିକେଦକଆଏ, “ଆଇନ୍ ଇଡୁକଲଃ ଚିନାଃପେ କାପାଜିତାନା ?”

୧୭ ଗାଦେଲ୍ ହଡକଏତେ ମିଆଁଦ୍‌ନିଃ ମେତାଇୟାଏ, “ଏ ଇଡୁନିଃ, ହନିଙ୍ଗକଡାକେ ଆମାଃତାଃ ଆଉକିୟାଈଙ୍ଗ, ଚିୟାଃଚି ଇନିଃରେ ମିଆଁଦ୍ ବଙ୍ଗା ବଲକାନାଏ ମେନ୍ତେ ଇନିଃ କାଏ ବାଖାଣ୍ ଦାଡ଼ିତାନା । ୧୮ ଜେତାଏ ଠାୟାଦ୍‌ରେ ସାବକିଦ୍‌ତେ ଇନିଃକେ ଆଞ୍ଜାଃବାଚିୟାଏ, ଆତଃ ଇନିୟାଃ ମଚା ପୁଡୁରିଦଃଆ, ଇନିଃ ତାଟାଏ ତାଗଏଃରିଦେୟା ଆତଃ ଗଜାକାନ ଲେକାଏ ରିକାଅଃଆ । ଆଇଙ୍ଗ ଆମାଃ ଚେଲାକକେ ଅତଙ୍ଗହାରତାଇପେ ମେନ୍‌କେଦକଆଇଙ୍ଗ, ମେନ୍‌ଦ ଇନ୍‌କୁ କାକ ଦାଡ଼ିକେନା ।”

୧୯ ଯୀଶୁ ମେତାଦକଆଏ, “ଏ କା ବିଶ୍ୱାସ୍‌ତାନ୍ ହଡକ, ଚିମିନ୍ ଜାକେଦ୍ ଆପେଲଃ ତାଇନାଈଙ୍ଗ ? ଚିମିନ୍ ଜାକେଦ୍ ଆଇଙ୍ଗ୍ ସାହାଡ଼ିଙ୍ଗ୍‌ପେଆ ? ମାର୍ ଏନ୍ ସିଟିଆକେ ଆଇଙ୍ଗ୍‌ତାଃତେ ଆଉଞ୍ଜିପେ ।” ୨୦ ଏନ୍ତେ ଇନ୍‌କୁ ସିଟିଆକେ ଆୟାଃତାଃକ ଆଉକିୟା । ଏଡକାନ୍ ଆମ୍‌ାଦ ଯୀଶୁକେ ନେଲ୍‌ତାଇଚି ଇମ୍‌ତାଙ୍ଗି ଏନ୍ ହନ୍‌କେ ଆଇଁଠାଅକିୟାଏ ଆତଃ ହନ୍ ଅତେରେ ଉୟୁଃକେଦ୍‌ତେ ବାଟିବାଡାୟାନାଏ ଆତଃ ଇନିୟାଃ ମଚା ପୁଡିରିଦଃ ତାଇକେନା । ୨୧ ଯୀଶୁ ଏନ୍ ହନ୍‌ରାଃ ଆପୁତେକେ କୁଲିକିୟାଏ, “ଚିମିନ୍ ମାହାଁଏତେ ନେକାଅଃତାନାଏ ?”

ଆପୁତେ କାଜିରୁହାଡ଼କିୟାଏ, “ମିଦ୍ ସିଟିଆଏତେଗି ।” ୨୨ “ଗଜି ନାଗେନ୍ତେ ଏଡକାନ୍ ଆମ୍‌ା ଇନିଃକେ ପୁରାଃସା ଦାଆଃରେ ଆତଃ ସେଙ୍ଗେଲ୍‌ରେ ଇଲିଙ୍ଗ୍‌ଉୟୁଃକାଇ ତାଇକେନା । ଏନାମେନ୍ତେ ଜେଡନାଃମ୍ ରିକାଦାଡ଼ିରେଦ ଦାୟାକେଦ୍‌ତେ ଆମ୍ ଦେଙ୍ଗାଲେମ୍ ।”

୨୩ ଯୀଶୁଦ୍ “ହେ” ମେନ୍‌ତାନ୍‌ଲଃ, କାଜିକେଦାଏ, “ଚିନାଃମେନ୍ତେ ରିକାଦାଡ଼ିରେଦ ମେନେତାନାମ୍, ବିଶ୍ୱାସ୍‌ତାନ୍‌ନିଃ ନାଗେନ୍ତେ ସବେନାଃ ରିକାଦାଡ଼ିୟାଃ ।”

୨୪ ଏନ୍ ତରସାଗି ଏନ୍ ହନ୍‌ରାଃ ଆପୁତେ ରାଆଃତାନ୍‌ଲଃ କାଜିକେଦାଏ, “ଆଇଙ୍ଗ୍ ବିଶ୍ୱାସ୍ ତାନାଈଙ୍ଗ, ଆଇଁୟାଃ କା ବିଶ୍ୱାସ୍‌ରେ ଦେଙ୍ଗାଈଙ୍ଗ୍‌ମେଁ ।”

୨୫ ହଡକକେ କୁରୁ ହୁଣ୍ଡିନ୍‌ତାନ୍ ଯୀଶୁ ନେଲ୍‌କେଦକଚି, ସଡରା ଆମ୍‌ାକେ ମାରାଙ୍ଗ୍‌ମଚାକିୟାଏ ଆତଃ ମେତାଇୟାଏ, “ଏ

ଭାବିବାର ଆଡ଼ଃ କା ବାଣୀଶ୍ ଦାଡ଼ିତାନ୍ ଆମ୍ବା, ଆଇଙ୍ଗ୍ ହୁକୁମ୍ ଏମାମ୍‌ତାନାଇଙ୍ଗ୍, ନିଃଏତେ ଅଡ଼ଙ୍ଗ୍‌ଅଃମେ, ଆଡ଼ଃ ନିଃଇରେ ଚିତ୍ତଲାଇ ଆଲମ୍ ବଲ ରୁହାଡ଼ାଃ ।”

୨୭ ଏଡ଼କାନ୍ ଆମ୍ବା କାଉରିକେଦତେ ଏନ୍ ହନ୍‌କେ ସିଦୁବ୍‌କିୟା ଆଡ଼ଃ ଅଡ଼ଙ୍ଗ୍ ବାଗିତାଇୟାଏ । ସିଟିଆ କଡ଼ାଦ ଗଜାକାନ୍‌ନିଃ ଲେକାଏ ରିକାୟାନା; ହଡ଼କ ମେନ୍‌କେଦାଃ, “ଗଏଃୟାନାଏ ।” ୨୭ ମେନ୍‌ଦ ଯୀଶୁ ତିଃଇ ସାବ୍‌କିତେ ବିରିଦ୍‌କିୟାଏ, ଆଡ଼ଃ ଇନିଃ ତିଙ୍ଗୁକେଟେଦ୍‌ୟାନାଏ ।

୨୮ ଏନ୍ତେ ଯୀଶୁ ଅଡ଼ାଃତେ ସେନଃୟାନାଏ, ଆଡ଼ଃ ଏସକାରରେ ଚେଲାକତାୟାଃ ଇନିଃକେ କୁଲିକିୟାଃକ, “ଆଲେଦ ଚିନାଃମେନ୍ତେ ଏନ୍ ବଙ୍ଗାକେ କାଲେ ଅଡ଼ଙ୍ଗ୍ ଦାଡ଼ିକେନା ?”

୨୯ ଯୀଶୁ ମେତାଦ୍‌କଆଏ “ନେ ଲେକାନ୍ ଏଡ଼କାନ୍ ଆମ୍ବାକ ବିନ୍ତ୍ରିତେ ଏସକାରକ ଅଡ଼ଙ୍ଗ୍ ଦାଡ଼ିୟାଆ, ଆଡ଼ଃ ଜେତାଲେକାତେଦ କାହାଗି ।”

**ୟୀଶୁ ଆୟାଃ ଗନଏଃ କାଜି ଆଡ଼ଃମିସା ଉଦୁବେତାନାଏ
(ମାଥୁଃ ୧୭:୨୨-୨୩; ଲୁକ ୯:୪୩-୪୫)**

୩୦ ଯୀଶୁ ଆଡ଼ଃ ଚେଲାକତାୟାଃ ଏନ୍ତାଃଏତେ ସେନଃୟାନ୍‌ତି ଗାଲିଲ୍ ଦିଶୁମ୍ ଆଲା ଆଲାତେକ ସେନଃୟାନା । ଜେତାଏ ଏନା ଆଲକାକ ସାରିନାମେକା ମେନ୍ତେ ଇନିଃ ସାନାଙ୍ଗ୍‌ତାଇକେନାଏ, ୩୧ ଚିୟାଃଚି ଇନିଃଦ ଆୟାଃ ଚେଲାକକେ ଇଡୁକ ତାଇକେନାଏ । ଇନିଃ କାଜିୟାଦ୍‌କଆଏ, “ଆଇଙ୍ଗ୍ ମାନଝାହନ୍ ତାନିଙ୍ଗ୍, ଆଇଙ୍ଗ୍ ହଡ଼କଆଃ ତିଃଇରେ ଏମ୍‌ଏଣ୍ଡାଗଃଆଇଙ୍ଗ୍, ଆଡ଼ଃ ହଡ଼କ ଆଇଙ୍ଗ୍‌କେ ଗଜିୟାକ, ଗନଏଃରାଃ ଆପିମା ତାୟମ୍‌ତେ ଆଇଙ୍ଗ୍ ଜୀଉ ବିରିଦାଃଇଙ୍ଗ୍ ।”

୩୨ ମେନ୍‌ଦ ଇନ୍‌କୁ ନେ କାଜି କାକ ଆବ୍‌କାର୍ ଉରୁମ୍ ଦାଡ଼ିକେଦା, ଆଡ଼ଃ ଇନ୍‌କୁଦ ଇନିଃକେ କୁଲି ନାଗେନ୍ତେ ବରକେଦାଃକ ।

**ଅକଏ ମାରାଙ୍ଗ୍ ?
(ମାଥୁଃ ୧୮:୧-୫; ଲୁକ ୯:୪୬-୪୮)**

୩୩ ଯିଶୁ ଆତ୍ମ ଆୟାଃ ଚେଲାକ କପରନାହୁମ୍ ତେବାଃକେଦ୍ଵି ଅତ୍ମାଃରେକ ବଲୟାନା, ଆତ୍ମ ଇନିଃ ଚେଲାକକେ କୁଲିକେଦ୍ଵକଥାଏ, “ହରାରେ ଚିନାଃପେ ଜାଗାଃତାନ ତାଇକେନା ?”

୩୪ ☆ମେନ୍ଦ ଇନ୍କୁ ହାପାୟାନାକ, ଚିୟାଃଚି ଇନ୍କୁ ଅକଏ ମାରାଙ୍ଗାଆଁ ମେନ୍ତେ ହରାରେକ କାପାଜିତାନ ତାଇକେନା ।

୩୫ ☆ୟିଶୁ ଦୁବ୍ଵୟାନଚି ବାରାଝାନକକେ ହାକାଅକେଦ୍ଵକଥାଏ ଆତ୍ମ ମେତାଦ୍ଵକଥାଏ, “ଅକନ୍ ହଡ୍ଵ ସବେନକଏତେ ମାରାଙ୍ଗାୟେନ୍ନ ସାନାଙ୍ଗରେଦ, ସବେନକଏତେ ଲାତାରେନକାଏ ଆତ୍ମ ସବେନକଆଃ ଦାସିନ୍ କାଏ ।”

୩୬ ଏନ୍ତେ ମିଆଁଦ୍ ହୁଡ୍ଵିଙ୍ଗ୍ ହନ୍କେ ହାକାଅକିଃତେ ଇନ୍କୁଆଃ ଆଲାରେ ତିଙ୍ଗୁକିୟାଏ ଆତ୍ମ କୟଙ୍ଗକିଃତେ ମେତାଦ୍ଵକଥାଏ, ୩୭ ☆ନେ ଲେକାନ୍ ମିଆଁଦ୍ ହୁଡ୍ଵିଙ୍ଗ୍ ହନ୍କେ ଅକନ୍ ହଡ୍ଵ “ଆଇଁୟାଃ ନୁଡୁମ୍ତେ ସୁକୁଆଇୟାଏ ଇନିଃଦ ଆଇଙ୍ଗକେ ସୁକୁଆୟାଏ, ଆତ୍ମ ଅକନ୍ ହଡ୍ଵ ଆଇଙ୍ଗକେ ସୁକୁଆୟାଏ, ଇନିଃ ଆଇଙ୍ଗକେ ଏସ୍ଵକାର କା ମେନ୍ଦ ଆଇଙ୍ଗକେ କୁଲିନିଃ ଆଇଁୟାଃ ଆବାକେୟଗି ସୁକୁଆଇୟାଏ ।”

ଆବୁକେ ଦାରମ୍ ରୁହାଡ୍ଵତାନିଃଦ ଆବୁଲଃରିୟା
(ଲୁକ ୯:୪୯-୫୦)

୩୮ ଯୋହାନ୍ ଯିଶୁକେ କାଜିକିୟାଏ, “ହେ ଗମ୍ବକେ, ମିଆଁଦ୍ ହଡ୍ଵ ଆମାଃ ନୁଡୁମ୍ତେ ବଙ୍ଗାକକେ ଅତ୍ମକତାନ୍ଲେ ନେଲ୍ଵକିୟା ଆତ୍ମ ଇନିଃ ଆବୁଆଃ ଜାମାରେନ୍ କାଏ ତାଇକେନା, ଏନାମେନ୍ତେ ଇନିଃକେ ମାନାକିୟାଲେ ।”

୩୯ “ୟିଶୁ ମେତାଦ୍ଵକଥାଏ, ଆଲ୍ପେ ମାନାଇୟା, ଆଇଁୟାଃ ନୁଡୁମ୍ତେ ଆକଦାୟାଅ କାମି କାମିତାନ ଜେତାଏନିଃ ଆଇଁୟାଃ ନୁଡୁମ୍ତେ ଏଡ୍ଵକାନ୍ କାଜି କାମି କାଏ ଦାଡ୍ଵିୟା । ୪୦ ☆ଚିୟାଃଚି ଅକଏ ଆବୁକେ ଦାରମ୍ବୁତାନାଏ, ଇନିଃଦ ଆବୁଲଃରିୟା । ୪୧ ☆ଆଇଙ୍ଗ ଆପେକେ ସାର୍ତ୍ତିଗିଇଙ୍ଗ କାଜିୟାପେତାନା, ଆପେ ଖ୍ରୀଷ୍ଟଆଃ ତାନ୍ପେ ମେନ୍ତେ ଅକ ହଡ୍ଵ ଆପେକେ ମିଦ୍ ଗିଲାସ୍ ରେହାଡ୍ଵ ଦାଆଃ

☆ ୯:୩୪ ୯:୩୪ ଲୁକ ୨୨:୨୪. ☆ ୯:୩୫ ୯:୩୫ ମାଥୁର ୨୦:୨୭,୨୭; ୨୩:୧୧; ମାର୍କ ୧୦:୪୩,୪୪; ଲୁକ ୨୨:୨୭. ☆ ୯:୩୬ ୯:୩୬ ମାଥୁର ୧୦:୪୦; ଲୁକ ୧୦:୧୬; ଯୋହାନ୍ ୧୩:୨୦. ☆ ୯:୪୦ ୯:୪୦ ମାଥୁର ୧୨:୩୦; ଲୁକ ୧୧:୨୩. ☆ ୯:୪୧ ୯:୪୧ ମାଥୁର ୧୦:୪୨.

ନୁଁଏ ନାଗେନ୍ତେ ଏମାପେରେଦ, ଏନ୍ ହଡ଼ ଆୟାଃ ନାଲା ନାମେଗିୟାଏ

ଆଲ୍ଲପେ ତହଦଃଆ ମେନ୍ତେ ଯୀଶୁ ଇତୁକତାନାଏ
(ମାଥୁର ୧୮:୨-୯; ଲୁକ ୧୭:୧-୨)

୪୨ “ଆଡ଼ଃଗି ଯୀଶୁ କାଜିକେଦାଃଏ, ଜେତାଏ ଆଇଁୟାଃରେ ବିଶ୍ୱାସ୍ତାନ ନେ ହୁପଡ଼ିକ୍କଏତେ ମିଆଁଦ୍ନିଃକେ ଆୟାଃ ବିଶ୍ୱାସ୍ତରେ ତହଦ୍ରିକାଇରେଦ ଇନିୟାଃ ହଟଃରେ ଜାନ୍ତାଦିରି ହାକାକେଦ୍ତେ ଇନିଃକେ ଇକିର୍ ଦରେୟାରେ ହୁଦ୍ମାତେୟାଃ ଇନିଃ ନାଗେନ୍ତେ ବୁଗିଅଃତେଆଃ । ୪୩ ✧ଆଡ଼ଃ ଆମାଃ ତିଃଇ ବିଶ୍ୱାସ୍ତରେ ତହଦ୍ରିକାମ୍ତାନରେଦ, ଏନାକେ ଛପାଏଶ୍ୱାଃଏମେ । ବାରିଆ ତିଃଇ ତାଇକେଦ୍ତେ ନାରାକ୍ତେ, ଚିତଲାଅ କା ଇଣ୍ଟିଜଃ ସେଙ୍ଗେଲ୍ତେ ସେନଃଏତେଦ ଚୁଶ୍ୱାୟାନ୍ତେ ଜୀଦାନରେ ବଲଃ ଆମାଃ ନାଗେନ୍ତେ ବୁଗିନାଃ । ୪୪ ନାରାକ୍ତେ ଇନକୁକେ ଜମ୍ତାନ ତିଲୁ କାକ ଗଜଃଆ ଆଡ଼ଃ ସେଙ୍ଗେଲ୍ କା ଇଣ୍ଟିଜଃଆ: ୪୫ ଆଡ଼ଃ ଆମାଃ କାଟା ତହଦ୍ରିକାମ୍ତାନ ରେଦ, ଏନାକେ ଛପା ଏଶ୍ୱାଃତାମ୍ । ବାରିଆ କାଟାତେ, ସେଙ୍ଗେଲ୍ ନାରାକ୍ତେମ୍ ହୁରାକ୍ ହାଣବଃଏତେଦ, ଲାଙ୍ଗଡାକାନ ଜୀଦାନରେ ବଲଃତେୟାଃ ଆମ୍ ନାଗେନ୍ତେ ବୁଗିନାଃ । ୪୬ ନାରାକ୍ତେ ଇନକୁଆଃ ତିଲୁ କାଏ ଗଜଃଆ ଆଡ଼ଃ ସେଙ୍ଗେଲ୍ କା ଇଣ୍ଟିଜଃଆ । ୪୭ ✧ଆଡ଼ଃ ଆମାଃ ମିଆଁଦ୍ ମେଦ୍ ପାପ୍ଇଚିମେରେଦ, ଏନାକେ ଅଡ଼କ୍କେଦ୍ତେ ହୁଦ୍ମାଏଶ୍ୱାଃଏମେ । ଆମାଃ ବାରିଆ ମେଦ୍ ତାଇକେଦ୍ତେ ସେଙ୍ଗେଲ୍ ନାରାକ୍ତେ ହୁଦ୍ମାଅଃଏତେ ମିଆଁଦ୍ ମେଦ୍ ତାଇକେଦ୍ତେ ପାର୍ମେଶ୍ୱାର୍ଆଃ ରାଈଜ୍ତେ ବଲଃ ଆମାଃ ନାଗେନ୍ତେ ବୁଗିନାଃ । ୪୮ ଏନ୍ତାଃରେଦ ଇନକୁକେ ଜମ୍ତାନ ତିଲୁ କାକ ଗଜଃଆ ଆଡ଼ଃ ଏନ୍ତାଃରେ ସେଙ୍ଗେଲ୍ ଚିତଲାଅ କା ଇଣ୍ଟିଜଃଆ ।

୪୯ “ଦାଣ୍ଟି ବୁଲୁଙ୍ଗ୍ତେ ଫାର୍ଚିଅଃ ଲେକା ସବେନ୍ ହଡ଼କହ ସେଙ୍ଗେଲ୍ତେକ ଫାର୍ଚିଅଃଆ ।

୫୦ ✧“ବୁଲୁଙ୍ଗ୍ ବୁଗିନାଃ, ମେନ୍ଦ୍ ଏନା ସାବାଗଃରେଦ, ଏନା

✧ ୯:୪୩ ୯:୪୩ ମାଥୁର ୫:୩୦. ‡ ୯:୪୪ ୯:୪୪ ନେ ବାଚାନ୍ ଚିମିନ୍ ମାରି ଅନଲ୍ଲକରେ ବାନଃଆ § ୯:୪୬ ୯:୪୬ ନେ ବାଚାନ୍ ଚିମିନ୍ ମାରି ଅନଲ୍ଲକରେ ବାନଃଆ ✧ ୯:୪୭ ୯:୪୭ ମାଥୁର ୫:୨୯. ✧ ୯:୫୦ ୯:୫୦ ମାଥୁର ୫:୧୩; ଲୁକ ୧୪:୩୪,୩୫.

ଚିଲ୍‌କାତେ ଆତଃମିସା ସିବିଲ୍‌ରୁହାଡ଼ଃଆ ? ଆପେରେ ଦୁପୁଲ୍‌ାଡ଼଼ରାଃ ବୁଲ୍‌ୁଲ୍‌ ତାଇନଃକା, ଆତଃ ଆପେ ମିହୁଡ଼୍ ଆତଃମିହୁଡ଼୍‌ଲ୍‌ଃ ସୁକୁରେ ତାଇନପେ ।”

୧୦

କଡ଼ାକୁଡ଼ିବାଗିରେୟାଃ କାଜି
(ମାଥୁଉ ୧୯:୧-୧୨; ଲୁକ ୧୭:୧୮)

୧ ଏନ୍ତେ ଯୀଶୁ କପରନାହୁମ୍‌ଏତେ ଅତଙ୍ଗୟାନ୍‌ତେ ଯାର୍ଦାନାହୁଁ ପାରମ୍‌କେଦ୍‌ତେ ଯିହୁଦା ପାରଗାନ୍‌ତେ ସେଟେର୍‌ୟାନାଏ । ଏନ୍ତେ ଗାଦେଲ୍‌ ହଡ଼କ ଇନିଃତାଃ ଆତଃଗିକ ହୁଣ୍ଡିୟାନା ଆତଃ ଇନିଃ ସିଦାଲେକା ଇନ୍କୁକେ ଇଡୁକେଦ୍‌କଆଏ ।

୨ ଚିମିନ୍ ପାରୁଣୀକ ଇନିଃତାଃ ହିଜୁଃକେଦ୍‌ତେ ବିଡ଼ାଅ ନାଗେନ୍ତେକ କୁଲିକିୟା, “ମିଆଁଦ୍ କଡ଼ା ଆୟାଃ କୁଡ଼ିତେକେ ବାଗିତେଆଃ ଆଇନଲେକାତେ ଠାଉକାଗିୟାଃ ତି ?”

୩ ଯୀଶୁ କୁଲିରୁହାଡ଼କେଦ୍‌କଆଏ, “ମୁଣା ଆଇନରେ ଚିକ୍‌ନାଃଏ ଆରୁକାଦ୍‌ପେୟା ?”

୪ ଈଇନ୍କୁ କାଜିକିୟାଃ, “ବାଗିରେଆଃ ଅନଲ୍‌ଚିଠା ଏମ୍‌କେଦ୍‌ତେ ଜେତାଏ କୁଡ଼ି ତାୟାଃକେ ବାଗି ନାଗେନ୍ତେ ମୁଣା କାଜିୟାକାଦାଏ ।”

୫ ଯୀଶୁ କାଜିରୁହାଡ଼ାଦ୍‌କଆଏ, “ଆପେୟାଃ କେଟେଦ୍‌ମନ୍ ନାଗେନ୍ତେ ମୁଣା ନେ ଆନ୍‌ରୁ ଅଲାଦ୍‌ପେଆଏ । ୬ ମେନ୍‌ଦ ପୁଥ୍‌ରେ ଅଲାକାନ୍ ଲେକା, ‘ଅତେଦିଶୁମ୍‌ରାଃ ବାଇୟାଃ ମୁନ୍‌ରେ ପାରମେଶ୍ଵାର୍ ମାନଝା କିନ୍‌କେ କଡ଼ା ଆତଃ କୁଡ଼ି ବାଇକାଦ୍‌କିନାଏ ।’ ୭ ଏନାମେନ୍ତେ କଡ଼ା ଆୟାଃ ଏଙ୍ଗା ଆତଃ ଆପୁକିନ୍‌କେ ବାଗିକିନାଏ, ଆତଃ ଆୟାଃ କୁଡ଼ିତାୟାଃଲଃ ମିଦଃଆଏ, ‘ ଆତଃ ଇନ୍କିନ୍ ମିଆଁଦଃଆକିନ୍ ।’ ଏନାମେନ୍ତେ ଇନ୍କିନ୍ ବାରିଆ ହଡ଼ମ୍ ନାହାଁଲାଃକିନ୍, ମେନ୍‌ଦ ମିଆଁଦ୍ ହଡ଼ମ୍‌ତାନ୍କିନ୍ । ୯ ଏନା ନାଗେନ୍ତେ ପାରମେଶ୍ଵାର୍ ମିଦ୍‌ରେ ତଲାକାଦ୍‌ତେୟାଃ ହଡ଼ ଆଲକାଏ ବିନ୍‌ଗାଏକା ।”

୧୦ ଅଡ଼ାଃତେ ସେନଃୟାନ୍ତେ, ଏନ୍ତାଃରେ ଆୟାଃ ତେଲକ ଯୀଶୁକେ ଏନ୍‌କାଜି ଆତଃଗିକ କୁଲିକିୟାଃ । ୧୧ ଈୟୀଶୁଦ୍

☆ ୧୦:୪ ୧୦:୪ ମାଥୁଉ ୫:୩୧. ☆ ୧୦:୧୧ ୧୦:୧୧ ମାଥୁଉ ୫:୩୨; ୧ କରିଛିୟ ୭:୧୦,୧୧.

ମେତାଦକଆଏ, “ଜେତାଏ ଆୟାଃ କୁଡ଼ିତେକେ ବାଗିକେଦ୍‌ତେ ଏଟାଃ କୁଡ଼ି ଆଣ୍‌ଦିୟାଃନିଃଦ ଆୟାଃ କୁଡ଼ିତେୟାଃ ବିରୁଧ୍‌ରେ ଆପାଙ୍ଗିର୍ କାମି କାମିୟା । ୧୨ ଏନ୍ ଲେକାତେ କୁଡ଼ି ଆୟାଃ କଡ଼ାତେକେ ବାଗିକେଦ୍‌ତେ ଏଟାଃ କଡ଼ାକେ ଆଣ୍‌ଦିନ୍‌ରେଦ ଇନିଃ ଆୟାଃ କଡ଼ାତେୟାଃ ବିରୁଧ୍‌ରେ ଆପାଙ୍ଗିର୍ କାମି କାମିୟାଏ ।”

**ୟୀଶୁ ସିଟିଆ ହନ୍‌କକେ ଆଶିଷକତାନାଏ
(ମାଥୁଉ ୧୯:୧୩-୧୫; ଲୁକ ୧୮:୧୫-୧୭)**

୧୩ ହୁପ୍‌ଡ଼ିଙ୍ଗ୍ ହନ୍‌କକେ, ତିଃଇ ଦହକେଦ୍‌ତେ ଆଶିଷକକାଏ ମେନ୍ତେ, ହଡ଼କ ଯୀଶୁତାଃତେକ ଆଉକେଦ୍‌କଆ, ମେନ୍‌ଦ୍‌ ତେଲାଇ ଆଉକତାନ୍‌କକେ ମାରାଙ୍ଗ୍‌ମତା କେଦ୍‌କଆକ । ୧୪ ଏନା ନେଲ୍‌କେଦ୍‌ତେ ଯୀଶୁ ଖ୍‌ସ୍‌ୟାନାଏ ଆତଃ ତେଲାଇକକେ ମେତାଦକଆଏ, “ହୁପ୍‌ଡ଼ିଙ୍ଗ୍ ହନ୍‌କକେ ଆଇଙ୍ଗ୍‌ତାଃତେ ହିଜୁଃରିକାକପେ, ଆତଃ ଆଲ୍‌ପେ ମାନାକଆ, ନିକୁଲେକାନ୍ କଆଃଗିଦ ପାର୍‌ମେଶ୍‌ବାରଆଃ ରାଇଜ୍ ତାନାଃ । ୧୫ ✽ସାର୍‌ତିଗିଙ୍ଗ୍ କାଜିୟାପେତାନା ଜେତାଏ ହଡ଼ ପାର୍‌ମେଶ୍‌ବାରଆଃ ରାଇଜ୍, ମିଆଁଦ୍ ହୁଡ଼ିଙ୍ଗ୍‌ହନ୍ ଲେକା କାଏ ତେଲାଇରେଦ, ଏନାରେ ତିତଲାଇହଗି କାଏ ବଲ୍‌ଦାଡ଼ିୟାଃ ।” ୧୬ ଏନ୍ତେ ଇନିଃ ହନ୍‌କକେ ହାମ୍‌ଦୁକେଦ୍‌କଆଏ, ଆତଃ ଇନ୍‌କୁଆଃ ଚେତାନ୍‌ରେ ତିଃଇ ଦହକେଦ୍‌ତେ ଆଶିଷକେଦ୍‌କଆଏ ।

**କିସାଁଶ୍ ଧାଙ୍ଗ୍‌ଡ଼ା
(ମାଥୁଉ ୧୯:୧୬-୩୦; ଲୁକ ୧୮:୧୮-୩୦)**

୧୬ ଆତଃଗି ଯୀଶୁ ସେନଃନାଙ୍ଗ୍ ଅତଙ୍ଗ୍‌ତାନ୍ ଇମ୍‌ତା ମିଆଁଦ୍ ହଡ଼ ଇନିୟାଃ ଆୟାର୍‌ରେ ନିର୍‌ହିଜୁଃୟାନ୍‌ତି ଇକୁଡ଼ୁୟାନ୍‌ନାଏ ଆତଃ କୁଲିକିୟାଏ, “ଏ ବୁଗିନ୍ ଇଡୁନିଃ, ଜାନାଅ ଜୀଦାନ୍ ନାମେ ନାଗେନ୍ତେ ତିନାଃଇଙ୍ଗ୍ ଚିକାୟା ?”

୧୮ ଯୀଶୁ ମେତାଇୟାଏ, “ଆମ୍ ତିନାଃମେନ୍ତେ ଆଇଙ୍ଗ୍‌କେ ବୁଗିନ୍ ମେନ୍ତେମ୍ କାଜିଇଙ୍ଗ୍‌ତାନା ? ମିଆଁଦ୍‌ନିଃ ଏସ୍‌କାର୍ ବୁଗିନାଏଃ ଇନିଃ ପାର୍‌ମେଶ୍‌ବାର ତାନିଃ ଆତଃ ଜେତାଏକାହା । ୧୯ ଆମ୍ ଆନ୍‌ରୁମ୍ ସାରିତାନା, ଆଲମ୍ ଗଗଏୟାଃ, ଆଲମ୍ ଆପାଙ୍ଗିର୍‌ରାଃ, ଆଲମ୍

✽ ୧୦:୧୫ ୧୦:୧୫ ମାଥୁଉ ୧୮:୩୧

କୁମ୍ଭଭୁଲୁୟା, ହସଡ଼ଗାଞ୍ଜା ଆଲମାଠ, ଆଲମ୍ ବେଦାଠ, ଏକ୍ଷା ଆପୁ କିନକେ ମାନାତିଙ୍ଗକିନମେ ।”

୨୦ ଇନିଃଦ ମେନ୍‌ରୁହାଡ଼ାଇୟାଏ, “ହେ ଗୁରୁ, ନେ ସବେନ୍ ଆନ୍‌ରୁ ମିଦ୍‌ସିଟିଆଏଡେଇଙ୍ଗ୍ ମାନାତିଙ୍ଗ୍ ଆଉକାଦା ।”

୨୧ ଯୀଶୁ ଇନିଃକେ ନେଲ୍‌ବାଇକିଃଡେ ଦୁଲ୍ଲାଡ଼କିୟାଏ ଆଡ଼ଃ ମେତାଇୟାଏ, “ଆଡ଼ଃ ମିଆଁଦ୍ କାଜି ଆମ୍‌କେ ରିକାଲାଗାତିଙ୍ଗ୍‌ୟାଃ, ଜୁ, ଆମାଠ ସବେନାଠ ଆଖ୍‌ରିଙ୍ଗ୍‌ତାମେ, ଆଡ଼ଃ ଏନ୍ ଟାକା ରେଙ୍ଗେଃକକେ ହାଟିଙ୍ଗ୍‌ଆଁକମ୍, ସିମା ଦିଶ୍‌ମ୍‌ରେ ଖୁଜ୍‌ମ୍ ନାମେଆଁ, ଆଡ଼ଃ ରୁହାଡ଼କେଦ୍‌ଡେ ଅତଙ୍ଗ୍‌ଇଙ୍ଗ୍‌ମେ ।” ୨୨ ଏନା ଆୟୁମ୍‌କେଦ୍‌ଡେ ଏନ୍ ହଡ଼ ହୁଡ଼ିଙ୍ଗ୍‌ଜୀଉୟାନାଏ, ଆଡ଼ଃ ଗସ୍ ମେଦ୍‌ମୁହାଁଡ଼ାଏ ସେନଃୟାନା । ଚିୟାଃତି ଇନିଃଦ ପୁରାଃଗି କିସାଁଣ୍ ତାଇକେନାଏ ।

୨୩ ଯୀଶୁ ଚେଲାକକେ ହେତାବିୟୁର୍‌କେଦ୍‌କଆଏ ଆଡ଼ଃ ମେତାଦ୍‌କଆଏ, “ଅକନ୍ ହଡ଼କଆଃ ଟାକା ପାଏସା ମେନାଠ, ଏନ୍ କିସାଁଣ୍ ହଡ଼କନାଙ୍ଗ୍ ପାର୍‌ମେଶ୍‌ବାର୍‌ଆଠ ରାଇଜ୍‌ରେ ବଲଃ ପୁରାଃଗି ହାମ୍‌ଲାଃ ।”

୨୪ ଏନ୍ କାଜିକ ଆୟୁମ୍‌କେଦ୍‌ଡେ ଚେଲାକ ଆକ୍‌ଦାନ୍‌ଦାୟାନା, ମେନ୍‌ଦ ଯୀଶୁ ଆଡ଼ଃଗି କାଜିୟାଦ୍‌କଆଏ, “ଏ ହନ୍‌କ, ପାର୍‌ମେଶ୍‌ବାର୍‌ଆଠ ରାଇଜ୍‌ରେ ବଲଃ ପୁରାଃଗି ହାମ୍‌ଲାଃ ।

୨୫ ପାର୍‌ମେଶ୍‌ବାର୍‌ଆଠ ରାଇଜ୍‌ରେ କିସାଁଣ୍ ହଡ଼ ବଲ୍ ଦାଡ଼ିଏଡେ, ସୁଇଉଣ୍ଡ୍‌ରେ ଉର୍‌ ପାରମଃଡେଆଠ ରାଞ୍ଜାଲାଃ ।”

୨୬ ନେଆଁ ଆୟୁମ୍‌କେଦ୍‌ଡେ ଚେଲାକ ଆଡ଼ଃଗି ଆକ୍‌ଦାନ୍‌ଦାୟାନା ଆଡ଼ଃ ଆକ ଆକରେ କୁଲିବାଡ଼ାକେଦାଃକ, “ତାବ୍‌ଦ ଅକଏ ଜୀଉବାଞ୍ଚାଅ ନାମ୍ ଦାଡ଼ିୟାଏ ?”

୨୭ ଯୀଶୁ ଇନ୍‌କୁସାଃଡେ ଆରିଦ୍‌କେଦ୍‌ଡେ ମେତାଦ୍‌କଆଏ, “ହଡ଼କ ନାଗେନ୍ତେ ଏନା କା ଦାଡ଼ିୟଃ କାମି ତାନାଃ, ମେନ୍‌ଦ ପାର୍‌ମେଶ୍‌ବାର୍‌ ନାଗେନ୍ତେ ଦାଡ଼ିଅଃଆ । ଚିୟାଃତି ପାର୍‌ମେଶ୍‌ବାର୍‌ଡେ ହବାଦାଡ଼ିୟାଆ ।”

୨୮ ଏନ୍ତେ ପାଡ଼ରାସ୍ କାଜିକେଦା, “ନେଲେମେ, ଆଲେଦ୍ ସବେନାଠ ବାଗିକେଦ୍‌ଡେ ଆମ୍‌କେଲେ ଅତଙ୍ଗ୍‌କେଦ୍‌ମେୟା ।”

୨୯ ଯୀଶୁ କାଜିରୁହାଡ଼ାଦକଆଏ, “ସାର୍ତ୍ତିଗି କାଜିୟାପେ ତାନାଇଙ୍ଗ୍, ଜେତାଏ ହଡ଼ ଆଇଙ୍ଗ୍ ମେନ୍ତେ ଚାଏ ସୁକୁକାଜିମେନ୍ତେ, ଅଡ଼ାଃଦୁଆର୍, ଚାଏ ହାଗା ଚାଏ ମିଶି, ଚାଏ ଏଙ୍ଗା ଚାଏ ଆପୁ, ଚାଏ ହନ୍‌ଗାଁଶା, ଚାଏ ପିଡ଼ିହାସା ବାଗିତାରେଦ, ୩୦ ଇନିଃ ନେ ପାରିୟାରେ, ସାଅଗୁଣା ଆଦକା ଅଡ଼ାଃଦୁଆର୍, ହାଗା ମିଶିକ, ଏଙ୍ଗାକ, ହନ୍‌କ ଆଡ଼ଃ ଅଡେହାସାକ ନାମେୟାଏ, ଆଡ଼ଃ ଏନାଲଃ ଦୁକୁସାସ୍ତି ହୁଁ, ଆଡ଼ଃ ତାୟମ୍ ଦିପିଲିରେ ଜାନାଅ ଜାନାଅରେୟାଃ ଜୀଦାନ୍ ନାମେୟାଏ । ୩୧ ☆ମେନ୍‌ଦ ପୁରାଃ ହଡ଼କ ସିଦାକାନ୍‌କ ତାୟମଃଆ, ଆଡ଼ଃ ତାୟମାକାନ୍‌କ ସିଦାଅଃଆ ।”

**ୟୀଶୁ ଆଡ଼ଃମିସା ଆୟାଃ ଗନଏଃ କାଜି ଉଦୁବେତାନାଏ
(ମାଥୁଃ ୨୦:୧୭-୧୯; ଲୁକ ୧୮:୩୧-୩୪)**

୩୨ ଯୀଶୁ ଆଡ଼ଃ ଆୟାଃ ଚେଲାକ ନାହାଁଃଦ ଯୀରୁଶାଲେମ୍‌ତେ ସେନଃତାନ୍ ହରାକ ସାବ୍‌କେଦା । ଯୀଶୁ ଆୟାଃ ଚେଲାକଆଃ ଆୟୁର୍ ଆୟୁର୍‌ରେ ସେନଃ ତାଇକେନା, ଚେଲାକ ଆକ୍‌ଚାକାଅକାନ୍ ତାଇକେନାକ ଆଡ଼ଃ ତାୟମ୍‌ରେ ସେନ୍‌ତାନ୍ ଏଗାଃ ହଡ଼କହଗି ବର ତାଇକେନାକ । ଯୀଶୁ ଆଡ଼ଃଗି ଗେଲ୍‌ବାର୍ ଚେଲାକକେ ହରାଏତେ ହାକାଅ ଆତମ୍‌କେଦକଆ, ଆଡ଼ଃ ଆଇଃକ୍‌ରେ ଚଗଃ କାଜିକ ଇନ୍‌କୁକେ ଉଦୁବ୍ ଏଟେଦକେଦକଆ । ୩୩ ଆଡ଼ଃ ମେତାଦକଆଏ, “ଆରୁ ଯୀରୁଶାଲେମ୍‌ତେରୁ ସେନଃତାନା, ଆଡ଼ଃ ଏନ୍ତାଃରେ ଆଇଙ୍ଗ୍‌କେ ମାନଃହାନ୍‌କେ ମୁଲ୍ ଯାଜାକ୍‌କଆଃ ଆଡ଼ଃ ଆଇନ୍ ଇଡୁକଆଃ ତିଃଇରେ ଏମ୍‌ଏଣ୍ଡାଗିଆଁକ । ଇନ୍‌କୁ ଆଇଙ୍ଗ୍‌କେ ଗନଏଃ ସାଜାଇ ଏମ୍‌କେଦତେ ସାଅଁସାର୍ ହଡ଼କଆଃ ତିଃଇରେକ ଜିମାୟାଃ । ୩୪ ଇନ୍‌କୁ ଆଇଙ୍ଗ୍‌କେ ଲାୟାୟାଃକ, ବେଜିୟାଃକ, ଚାବୁକ୍‌ରେକ ହାଁଶ୍‌ସାୟାଃ, ଆଡ଼ଃକ ଗଜିୟାଁ ମେନ୍‌ଦ ଆପିମାରେ ଆଇଙ୍ଗ୍ ଜୀଉ ବିରିଦାଇଙ୍ଗ୍ ।”

**ଯାକୁବ୍ ଆଡ଼ଃ ଯୋହାନ୍‌ରାଃ ଆନାସି
(ମାଥୁଃ ୨୦:୨୦-୨୮)**

☆ ୧୦:୩୧ ୧୦:୩୧ ମାଥୁଃ ୨୦:୧୭; ଲୁକ ୧୩:୩୦.

୩୫ ଜେବଦୀୟାଃ ହନକିନ୍ ଯାକୁବ୍ ଆଡଃ ଯୋହାନ୍, ଯୀଶୁତାଃକିନ୍ ହିକୁଃୟାନା, ଆଡଃକିନ୍ କାଜିକିୟା, “ହେ ଗୁରୁ ଜେତାନ୍କାଜି ଆଲିଙ୍ଗ୍ ଆସିମେତେୟାଃ ଆଲିଙ୍ଗ୍ ନାଙ୍ଗ୍ ରିକାଏମେ ।”

୩୬ ଯୀଶୁ ଇନ୍କିନ୍କେ କୁଲିକେଦକିନାଏ, “ଚିକାନାଃବେନ୍ ଆସିତାନା, ଚିନାଃଇଙ୍ଗ୍ ରିକାୟା ?”

୩୭ ଇନ୍କିନ୍ କାଜିକିୟା, “ଆମାଃ ରାଇଜ୍ ମାନାରାଙ୍ଗ୍ରାଃ ରାଜ୍ଗାଦିରେ ଆଲିଙ୍ଗ୍ଏତେ ମିହୁଡ୍ ଆମାଃ ଜମ୍ତିସାଃରେ, ଆଡଃ ଏଟାଃନିଃ ଆମାଃ ଲେଙ୍ଗାତିସାଃରେ ଦୁବକାଏ ମେନ୍ତେ କାଜିତାମ୍, ନେୟାଲିଙ୍ଗ୍ ସାନାଙ୍ଗ୍ତାନା ।”

୩୮ ☆ୟୀଶୁଦ୍ ମେତାଦକିନାଏ, “ଚିନାଃବେନ୍ ଆସିତାନା ଏନା କାବେନ୍ ଆଟ୍କାର୍ ଉରୁମେତାନା । ଚିୟାଃ ଆଇଙ୍ଗ୍ ଅକନ୍ ଦୁକୁସାହାତିଙ୍ଗ୍ରାଃ କାଟୋରାରେ ନୁଁଇଙ୍ଗ୍, ଏନା ନୁଁବେନ୍ ଦାଡ଼ିୟା ? ତାଏ ଆଇଙ୍ଗ୍ ଅକନ୍ ଗନଏଃରାଃ ବାପ୍ତିସ୍ମାତେଇଙ୍ଗ୍ ବାପ୍ତିସ୍ମାଅଃଆ, ଏନାରେ ଚିନାଃ ଆବେନଃବେନ୍ ବାପ୍ତିସ୍ମା ଦାଡ଼ିୟଃଆ ?”

୩୯ “ଦାଡ଼ିୟାଃଲିଙ୍ଗ୍,” ମେତାଇଜାକିନ୍, ଯୀଶୁ ମେତାଦକିନାଏ, “ଆଇଙ୍ଗ୍ ନୁଁଏ କାଟୋରାରେଦବେନ୍ ନୁଁଇୟାଃ ଆଡଃ ଆଇଙ୍ଗ୍ ବାପ୍ତିସ୍ମାଅଃ ବାପ୍ତିସ୍ମାତେବେନ୍ ବାପ୍ତିସ୍ମାଅଃଆ । ୪୦ ମେନ୍ଦ୍ ଆଇଁୟାଃ ଜମ୍ତିସାଃରେ ତାଏ ଲେଙ୍ଗାତିସାଃରେ ଅକଏ ଦୁବାଃଏ ନେଆଁ କାଜିତେୟାଃଦ୍ ଆଇଁୟାଃ ତିଃଇରେ ବାନଆଃ । ଅକଏୟାଃ ନାଗେନ୍ତେ ଏନା ପାର୍ମେଶ୍ୱାର୍ ବାଇୟାକାଦାଃଏ ଇନ୍କୁକେ ଇନିଃ ଏନା ଏମାକଆଏ ।”

୪୧ ଏନା ଆୟୁମ୍କେଦ୍ତେ, ଏଟାଃ ଗେଲ୍ ଚେଲାକ ଯାକୁବ୍ ଆଡଃ ଯୋହାନ୍କେ ଖ୍ୱୟାନାକ । ୪୨ ☆ୟୀଶୁ ଇନ୍କୁକେ ଆୟାଃତାଃତେ ହାକାଅ କେଦ୍କଆଏ ଆଡଃ ମେତାଦକଆଏ, “ସାଅଁସାର୍କଆଃ ଗୁସିୟାକ ନୁତୁମଃତାନ୍କ ଇନ୍କୁରେକ ରାଇଜ୍ତାନା ଆଡଃ ଇନ୍କୁ ଆଲାରେ ମାପ୍ରାଙ୍ଗ୍କାନ୍କ ଆକଆଃ ଆକ୍ତେୟାର୍କ* ଇନ୍କୁକେ ଆଟ୍କାର୍ ରିକାତିକାକତାନା, ନେଆଁପେ ସାରିଆଃ । ୪୩ ☆ଆପେରେଦ୍ ଆଲକା ଏନ୍କାଅଃକା । ଆପେ ଆଲାରେ

☆ ୧୦:୩୮ ୧୦:୩୮ ଲୁକ ୧୨:୫୦. ☆ ୧୦:୪୨ ୧୦:୪୨ ଲୁକ ୨୨:୨୫,୨୬. * ୧୦:୪୨ ୧୦:୪୨ ଆଧିକାର୍ ☆ ୧୦:୪୩ ୧୦:୪୩ ମାଥୁଉ ୨୩:୧୧; ମାର୍ଚ୍ଚ ୯:୩୫; ଲୁକ ୨୨:୨୬.

ଜେତାଏ ମାରାଙ୍ଗ୍‌ୟେନ୍ ସାନାଙ୍ଗ୍‌ରେଦ ଇନିଃ ଆପେୟାଃ ସୁସାର୍‌ନିଃ
 ବାଇୟେନ୍‌କାଏ । ୪୪ ଆତଃ ଆପେୟାଃ ଆଲାରେ ଜେତାଏ
 ସିଦାତାରଃ ସାନାଙ୍ଗ୍‌ତାନିଃ ସବେନ୍‌କଆଃ ଦାସି ବାଇୟେନ୍‌କା
 । ୪୫ ଆଇଙ୍ଗ୍ ମାନଝାହନ୍, ସୁସାର୍‌ନାମେ ନାଗେନ୍ତେଦ କା, ମେନ୍‌ଦ
 ସୁସାର୍ ନାଗେନ୍ତେ ଆତଃ ଆଇୟାଃ ଜୀଉ ପୁରାଃ ହଡ଼କଆଃ ଦାଣ୍ଠେ
 ଗନଙ୍ଗ୍ ଏମ୍‌ପୁରା ନାଗେନ୍ତେଇଙ୍ଗ୍ ହିଜୁଃକାନା ।”

ୟୀଶୁ ମେଦ୍ କାଏ ନେଲ୍ ଦାଡ଼ିତାନ୍ ବାଟ୍ ମାୟକେ ବୁଗି'ତାନା
 (ମାଥୁଉ ୨୦:୨୯-୩୪; ଲୁକ ୧୮:୩୫-୪୩)

୪୬ ୟୀଶୁ ଆୟାଃ ଚେଲାଇଲଃ ଯିରିହୋତେକ ସେଚେରୟାନା,
 ଆତଃ ଇନ୍‌କୁ ଗାଦେଲ୍ ହଡ଼କଲଃ ଏନ୍ ସାହାର୍‌ଏତେ ଅତଙ୍ଗ୍‌ଅଃତାନ୍
 ଇମ୍‌ତା ତିମାୟୁଆଃ ହନ୍ କା ନେଲ୍‌ଦାଡ଼ିତାନ୍ ବାଟ୍ ମାୟ
 ହରାଗେନାରେ ଦୁବ୍‌କେଦ୍‌ତେ କର୍‌ଏ ଆସିତାନାଏ ତାଇକେନା ।
 ୪୭ ଇନିଃ ନାଜ୍‌ରେଡ଼ରେନ୍ ୟୀଶୁ ତାନିଃ ମେନ୍ତେ ଆୟୁମତାଦ୍‌ତି, “ହେ
 ଦାଉଦ୍‌ଆଃ ହନ୍ ୟୀଶୁ ଦାୟାଈଙ୍ଗ୍‌ମେ” ମେନ୍ତେ କାଉରିତାନ୍‌ଲଃ
 ହାକାଅ ଏଚେଦ୍‌କିୟା ।

୪୮ ଗାଦେଲ୍ ହଡ଼କ ଇନିଃକେ ହାପାଅଃକାଏ ମେନ୍ତେକ
 ମାରାଙ୍ଗ୍‌ମଚାକିୟାଃ । ମେନ୍‌ଦ ଇନିଃ ଆତଃଗି ପୁରାଃ “ହେ
 ଦାଉଦ୍‌ଆଃ ହନ୍ ଦାୟାଈଙ୍ଗ୍‌ମେ” ମେନ୍ତେ କାଉରିକେଦାଏ ।

୪୯ ୟୀଶୁ ତିଙ୍ଗୁୟାନାଏ ଆତଃ, “କେଡାଆଉଇପେ” ମେନ୍‌କେଦାଏ
 । ଇନ୍‌କୁ ଏନ୍ କା ନେଲ୍‌ଦାଡ଼ିତାନ୍ ହଡ଼କେ କେଡାକିୟାଃକ ଆତଃ
 କାଜିକିୟାକ, “ଆଲମ୍ ବରଏୟା, ମାର୍ ବିରିଦ୍‌ମେ ! ଇନିଃ
 କେଡାମେତାନାଏ ।”

୫୦ ଇନିଃଦ୍ ଆୟାଃ ଲିଜାଃ ହୁଦ୍‌ମା ଏଣ୍ଡାଃକେଦ୍‌ତେ ବିରିଦ୍
 ଧାବ୍‌ୟାନାଏ ଆତଃ ୟୀଶୁତାଃତେ ହିଜୁଃୟାନାଏ ।

୫୧ ୟୀଶୁ ଇନିଃକେ କୁଲିକିୟାଏ, “ଆଇଙ୍ଗ୍ ଆମାଃ ନାଙ୍ଗ୍
 ଚିନାଃଇଙ୍ଗ୍ ଚିକାୟା ମେନ୍ତେମ୍ ସାନାଙ୍ଗ୍‌ତାନା” ଏନ୍ କା
 ନେଲ୍‌ଦାଡ଼ିତାନ୍ ହଡ଼ ମେତାଈୟାଏ, “ହେ ଗୁରୁ ନେନେଲାଇଙ୍ଗ୍
 ସାନାଙ୍ଗ୍‌ତାନା ।”

୫୨ ଯୀଶୁ ଇନିଷକେ ମେତାଇୟାଏ, “ତୁ ସେନସମେ, ଆମାଃ ବିଶ୍ୱାସ୍ ଆମକେ ବୁଗିକେଦମେୟାଏ ।” ଇମତାଙ୍ଗି ଇନିଷ ନେଲ୍ ଦାଡ଼ିକେଦାଏ ଆତଃ ଯୀଶୁକେ ହରାହରାତେ ଅତଙ୍ଗକିୟା ।

୧୧

ୟୀଶୁ ଯୀରୁଶାଲେମ୍‌ତେ ବଲତାନା

(ମାଥୱ ୨୧:୧-୧୧; ଲୁକ ୧୯:୨୮-୪୦; ଯୋହାନ୍ ୧୨:୧୨-୧୯)

୧ ଯୀଶୁ ଆତଃ ଚେଲକ ଯୀରୁଶାଲେମ୍ ନାଡ଼େୟାନ୍‌ତେ, ଜାଇତୁନ୍ ବୁରୁଜାପାଃ ବେଡ଼ଫାଗି ଆତଃ ବେଥୁନିଆ ନାଡ଼େୟାନ୍‌ତେକ ସେଟ୍‌ରୟାନା, ଇମତା ଯୀଶୁ ଆୟାଃ ଚେଲକଏତେ ବାରହଡ଼କିନ୍‌କେ ଆୟାର୍‌ତେ କୁଲ୍‌କେଦକିନାଏ । ୨ ଆତଃ ମେତାଦକିନାଏ, “ସାମ୍‌ନାଙ୍ଗ୍‌ରେଆଃ ହାତୁତେ ସେନସବେନ୍, ଏନ୍ ହାତୁ ତେବାଃ ଇମତାଙ୍ଗି ନାହାଁଃ ଜାକେଦ୍ ଜେତାଏ ଇନିଷରେ କା ଦେଜାକାନ୍ ମିଆଁଦ୍ ଗାଧାହନ୍ ତଲକାନ୍‌ବେନ୍ ନାମିଆଁ, ଇନିଷକେ ରାଡ଼ାଇବେନ୍ ଆତଃ ନେତାଃ ଆଉଝିବେନ୍ । ୩ ଜେତାଏ ହଡ଼ ଇନିଷକେ ଚିନାଃ ମେନ୍ତେବେନ୍ ରାଡ଼ାଇତାନା ମେନ୍ତେ କୁଲିବେନ୍‌ରେଦ୍, କାଜିୟାଇବେନ୍, ନିଃ'ତାଃରେ ପ୍ରାଭୁଆଃ କାମିମେନାଃ, ଆତଃ ହୁଡ଼ିଙ୍ଗ୍‌ତାୟମ୍‌ତେ କୁଲ୍‌ରୁହାଡ଼ତାଇୟା ।”

୪ ଇନ୍‌କିନ୍ ସେନସୟାନାକିନ୍ ଆତଃ ରାଚା ଦୁଆର୍‌ତାଃ ବାହାରିରେ ମିଆଁଦ୍ ଗାଧାହନ୍ ତଲକାନ୍‌କିନ୍ ନାମ୍‌କିୟାଃ । ଇନିଷକେକିନ୍ ରାଡ଼ାଇ ଇମତା, ୫ ଏନ୍ତାଃରେ ତିଙ୍ଗୁଆକାନ୍ ହଡ଼କ କୁଲିକେଦକିନା, “ଗାଧାହନ୍‌କେ ଚିନାଃ ମେନ୍ତେବେନ୍ ରାଡ଼ାଇତାନା ?”

୬ ଇନ୍‌କିନ୍‌ଦ ଯୀଶୁ କାଜିୟାଦକିନ୍ ଲେକାକିନ୍ କାଜିରୁହାଡ଼ାଦକଆ, ଏନ୍ତେ ଇନ୍‌କୁ ଇନ୍‌କିନ୍‌କେ ରାଡ଼ା ରିକାଦକିନାକ । ୭ ଗାଧାହନ୍‌କେ ଇନ୍‌କିନ୍ ଯୀଶୁତାଃକିନ୍ ଆଉକିୟା, ଆତଃ ଗାଧା ଚେତାନ୍‌ରେ ଆକିନାଃ ଲିଜାଃକିନ୍ ଆଟେଦକେଦା, ଆତଃ ଯୀଶୁ ଇନିଷରେ ଦୁବ୍‌ୟାନାଏ । ୮ ପୁରାଃ ହଡ଼କ ଯୀଶୁକେ ମାଇନି ନାଗେନ୍ତେ ଆକଆଃ ଲିଜାଃ ହରାହରାକ ବିଲ୍‌ଇଦି ତାଇକେନା; ଏଟାଃକଦ୍, ପିଡ଼ିକଏତେ ହୁଡ଼ିଙ୍ଗ୍ ଢାଉଡ଼ା ମାଆଃ ଆଉକେଦତେ, ହରାହରାକ ଆଟେଦଇଦି ତାଇକେନା । ୯ ଯୀଶୁଆଃ ଆୟୁର୍ ତାୟମ୍‌ରେ

ସେନଶତାନ୍ ଗାଦେଲ୍ ହଡ଼କ କାଉରିକେଦାଃ, “ ‘ହୋଶାନ୍ନା’ ପାର୍ମେଶ୍ଵାର୍ଆଃ ମାନାରାଙ୍ଗ୍ ହବାଅଃକା, ପ୍ରାଭୁଆଃ ନୁତୁମ୍ତେ ହିନ୍ଦୁଃନିଃ ଧାଇନ୍ ହବାଅଃକାଏ ।^{୧୦} ଆବୁଆଃ ପୁର୍ଖାଆପୁ ଦାଉଦ୍ଆଃ ହିନ୍ଦୁଃତାନ୍ ରାଇନ୍ ଧାଇନ୍ ହବାଅଃକା, ସାଲାଙ୍ଗ୍ଉତାର୍ ଠାୟାଦ୍ରେ ପାର୍ମେଶ୍ଵାର୍ରାଃ ହୋଶାନ୍ନା ହବାଅଃକା” ମେନ୍ତେକ କାଉରିକେଦାଃ ।

^{୧୧} ଯୀଶୁ ଯୀରୁଶାଲେମ୍ତେ ତେବାଃୟାନ୍ତି ମାନ୍ଦିର୍ ଅଡ଼ାଃରେ ବଲୟାନାଏ ଆଡଃ ଇନିଃ ସବେନାଃ ନେଲ୍ ବାଡ଼ାକେଦ୍ତି ସିଙ୍ଗିହାସୁରଶତାନ୍ ଇମ୍ତା ବାରାଝାନ୍ ଚେଲାକଲଃ ବେଅ୍ନିଆଡେ ସେନଶୟାନାଏ ।

**ୟୀଶୁ ଲଆଦାରୁକେ ସାର୍ପାଅକେଦା
(ମାଥୁଃ ୨୧:୧୮-୧୯)**

^{୧୨} ଏଟାଃ ହୁଲାଙ୍ଗ୍ ଯୀଶୁ ଆୟାଃ ଚେଲାକଲଃ ବେଅ୍ନିଆଏଡେ ରୁହାଡ୍ ଇମ୍ତା, ଯୀଶୁକେ ରେଙ୍ଗେଃକିୟା । ^{୧୩} ସାଙ୍ଗିନ୍ରେ ଇନିଃ ସାକାମାକାନ୍ ମିଆଁଦ୍ ଲଆଦାରୁକେ ନେଲ୍କେଦ୍ତେ, ଏନ୍ରେ ଜ'କଇଙ୍ଗ୍ ନାମେଜାଃ ମେନ୍ତେ ଏନ୍ତାଃତେ ସେନଶୟାନା । ମେନ୍ଦ୍ ତେବାଃୟାନ୍ତି ଏନାରେ ସାକାମ୍ ବିଡ଼ାଙ୍ଗ୍ ନାମ୍କେଦାଏ ଆଡ଼ାଃ ଜ କାଏ ନାମ୍କେଦାଃ, ଚିୟାଃତି ଇମ୍ତା ଲଆ ଜ'ସାହା କା ତାଇକେନା । ^{୧୪} ଏନ୍ତେ, “ଆମାଃ ଜ ଆଡ଼ାଃ ଜେତାଏ ହଡ଼ ଚିଉଲାଅ ଆଲକାଏ ଜମେକା” ମେନ୍ତେ ଲଆ ଦାରୁକେ କାଜିକେଦା ।

ଆଡ଼ାଃ ଚେଲାକତାୟାଃ ଏନ୍ କାଜିକ ଆୟୁମ୍କେଦା ।

**ୟୀଶୁ ଯୀରୁଶାଲେମ୍ ମାନ୍ଦିର୍ ଅଡ଼ାଃତେ ବଲତାନାଏ
(ମାଥୁଃ ୨୧:୧୨-୧୭; ଲୁକ ୧୯:୪୫-୪୮; ଯୋହାନ୍ ୨:୧୩-୨୨)**

^{୧୫} ଯୀରୁଶାଲେମ୍ତେ ତେବାଃୟାନ୍ତି, ଯୀଶୁ ମାନ୍ଦିର୍ ଅଡ଼ାଃତେ ବଲୟାନାଏ, ଆଡ଼ାଃ ଏନ୍ତାଃରେ ଦାଶୈନାଙ୍ଗ୍ ଜାଁତୁକକେ କିରିଙ୍ଗ୍ ଆଖିରିଙ୍ଗ୍ ତାନ୍କକେ ହାର୍ଅଡଙ୍ଗ୍ ଏଚେଦ୍କେଦ୍ଆଏ । ପାଏସା ଭାଞ୍ଜାଅତାନ୍କଆଃ ମେଜକ ଆଡ଼ାଃ ଦୁଦୁମୁଲ୍ ଆଖିରିଙ୍ଗ୍ ତାନ୍କଆଃ ଦୁବ୍ତେୟାଃକ ଉଦୁରବାଟିକେଦାଏ । ^{୧୬} ଆଡ଼ାଃ ମାନ୍ଦିର୍ ଅଡ଼ାଃରାଃ ବାହାରି ରାତା ଥାଲା ଥାଲାତେ କିରିଙ୍ଗ୍ ଆଖିରିଙ୍ଗ୍ତେଆଃକ ସାବ୍କେଦ୍ତେ ଜେତାଏକେୟ କାଏ ସେନ୍ ପାରମ୍ ଇତିକେଦ୍କଆ

। ୧୭ ଏନ୍ତେ ଇନ୍କୁକେ ଇତୁତାନଲଃ ମେତାଦକଆଏ, ନେଆଁ ଅଲାନାନା,
 “ଆଇୟାଃ ଅଡ଼ାଃ ଦିଶୁମ୍ବରାଃ ସବେନ୍ ଜାତିକ ନାଗେନ୍ତେ ବିକ୍ତିଅଡ଼ାଃ ନୁତୁମଃଆ

ମେନ୍ଦ ଆପେ ନେଆଁକେ କୁମ୍ବୁକୁଆଃ ତାଇନଃ ଠାୟାଦପେ ବାଇୟାକାଦା ।”

୧୮ ମୁଲ୍ ଯାଜାକକ ଆଡ଼ଃ ଆଇନ୍ ଇତୁକ, ଏନା ସବେନ୍ ଆୟୁମ୍ବକେଦତେ, ଯୀଶୁକେ ଚିଲ୍କାକ ଗଜିୟା ମେନ୍ତେ ହରାକ ଦାଣୀବାଡ଼ାକେଦାଃ । ସବେନ୍ ହଡ଼କଦ ଯୀଶୁଆଃ ଇନିତୁରେ ଆକଦାନ୍ଦାୟାନା ମେନ୍ତେ ଇନ୍କୁ ଇନିଃକେ ବରଆଇତାନକ ତାଇକେନା ।

୧୯ ସିଙ୍ଗିହାସୁରୟାନ୍ତି ଯୀଶୁ ଆୟାଃ ଚେଲକଲଃ ଅତଙ୍ଗକେଦତେ ସାହାର୍ଏତେ ସେନଃୟାନାଏ ।

**ଲଆଦାରୁଏତେ ଇନିତୁ
 (ମାଥୁଉ ୨୧:୨୦-୨୨)**

୨୦ ଏଟାଃ ହୁଲାଙ୍ଗ୍ ସେଟାଃ ଇଦାନତେ ହରାରେ ସେନଃ ଇମ୍ତା ଇନ୍କୁ ଲଆଦାରୁକେକ ନେଲ୍କେଦା । ଏନା ବୁଟାଏତେ ତୁଟି ଜାକେଦ୍ ରହଡ୍ ଗଜାକାନ୍ ତାଇକେନା । ୨୧ ପାଡ଼ରାସ୍ ସିଦାହୁଲାଙ୍ଗ୍ରାଃ କାଜି ପାହାମ୍ବକେଦତେ ମେତାଇୟାଏ “ନେଲେମେ, ହେ ଗୁରୁ, ଆମ୍ ସାର୍ପାଅଲେଦ୍ ଲଆଦାରୁ ରହଡ଼କାନା ।”

୨୨ ଯୀଶୁ ଚେଲକକେ କାଜିରୁହାଡ଼ାଦକଆଏ, “ପାରମେଶ୍ୱାରରେ ବିଶ୍ୱାସ୍ ଦହେପେ ।” ୨୩ ☆ସାର୍ଡିଗି କାଜିୟାପେ ତାନାଇଙ୍ଗ୍, “ଜେତାଏ ହଡ଼ ନେ ବୁରୁକେ, ମାର୍ ବିରିଦ୍ମେ ଆଡ଼ଃ ଦରେୟାରେ ଉୟୁଗଃମେ ମେନ୍ତେ କାଜିରେ, ଆଡ଼ଃ ମନ୍ରେ କାଏ ଆଡ଼ାଃଉଡ଼ୁରେ ଆଡ଼ଃ ଇନିଃ ଆସିତେୟାଃ ସାର୍ଡିଗି ହବାଅଆଃ ମେନ୍ତେ ବିଶ୍ୱାସେରେଦ, ଇନିଃ ସାନାଙ୍ଗ୍ତାନଲେକା ହବାଅଆଃ । ୨୪ ଏନାମେନ୍ତେ କାଜିୟାପେ ତାନାଇଙ୍ଗ୍, ବିକ୍ତି ଇମ୍ତା ଜେଡ଼ନାଃପେ ଆସିଆ, ଏନ୍ ସବେନାଃ ନାମାକାଦାଃଲେ ମେନ୍ତେପେ ବିଶ୍ୱାସେରେଦ, ଆସିତେୟାଃ ସବେନାଃପେ ନାମେୟା । ୨୫ ☆ଆଡ଼ଃ ବିକ୍ତି ନାଗେନ୍ତେପେ ତିଙ୍ଗୁନ୍ରେ ଜେତା ହଡ଼ଆଃ ବିରୁଧ୍ରେ ଜେଡ଼ନାଃ ଆପେୟାଃ ଗୁଣ୍ଟାଁ ମେନାଃରେଦ,

☆ ୧୧:୨୩ ୧୧:୨୩ ମାଥୁଉ ୧୭:୨୦; ୧ କରିକ୍ତିୟ ୧୩:୨. ☆ ୧୧:୨୫ ୧୧:୨୫ ମାଥୁଉ ୬:୧୪,୧୫.

ଇନିଷ୍ଟକେ ଏନା ଛାମାଲପେ, ଏନାରେ ଆପେୟାଃ ସିର୍ମାରେନ୍ ଆପୁ ଆପେକେୟଗି ଛାମାପେୟା । ୨୭ ମେନ୍ଦ ଆପେ କାପେ ଛାମାଲରେଦ, ଆପେୟାଃ ସିର୍ମାରେନ୍ ଆପୁହିଁ ଆପେୟାଃ ପାପ୍ କାଏ ଛାମାଏଆ* ।”

ୟୀଶୁଆଃ ପେଡ଼େଃକେ କୁଲିକେଦାଃକ
(ମାଥୁଃ ୨୧:୨୩-୨୭; ଲୁକ ୨୦:୧-୮)

୨୭ ଯୀଶୁ ଆଡ଼ଃ ଚେଲ୍ୟାକ ଆଡ଼ଃଗି ଯୀରୁଶାଲେମ୍‌ଡେ ହିଜୁଃୟାନାକ । ମାନ୍ଦିରଅଡ଼ଃରେ ଯୀଶୁ ସେନ୍‌ବାଡ଼ାତାନ୍ ଦିପିଲିରେ, ମୁଲ୍ ଯାଜାକକ, ଆଇନ୍ ଇଡୁକ ଆଡ଼ଃ ପ୍ରାଟିନ୍‌କ ଇନିଷ୍ଟଡ଼ଃଡେକ ହିଜୁଃୟାନା ।

୨୮ ଆଡ଼ଃ, ଇନ୍‌କୁ କୁଲିକିୟାଃକ, “ଆମ୍ ଅକ ଆକ୍‌ଡେୟାର୍‌ଡେ ନେଆଁକମ୍ ରିକାତାନା ? ନେ କାମିକ ରିକାନାଗେନ୍ତେ ଅକଏ ନେ ଆକ୍‌ଡେୟାର୍ ଏମାକାଦମେଆ ?”

୨୯ ଯୀଶୁ ଇନ୍‌କୁକେ କାଜିରୁହାଡ଼ାଦକଆଏ, “ଆଇଙ୍‌ହିଁ ମିଆଁଦ୍ କାଜିଙ୍ କୁଲିପେୟା, ଏନା ଉଦୁବାଇଙ୍‌ପେ, ଏନ୍ତେ ଆଇଙ୍‌ହିଁ ଅକ ପେଡ଼େଃଡେ ନେଆଁକଇଙ୍ ରିକାତାନା, ଏନାଇଙ୍ ଉଦୁବାପେୟା । ୩୦ ଯୋହାନ୍‌ଆଃ ବାପ୍ତିସ୍ମା ସିର୍ମାରେନ୍ ପାର୍‌ମେଶ୍ୱାର୍‌ଡ଼ଃଏଡେ ତି ମାନ‌ଖାଡ଼ଃଏଡେ ତାଇକେନା ? ନେଆଁ, ମାର୍ କାଜିୟାଇଙ୍‌ପେ ।”

୩୧ ଇନ୍‌କୁ ଆକ ଆକରେକ କାପ୍‌ଜିୟାନା, “ଆରୁ ନେ କାଜିରେ ତିନାଃରୁ କାଜିରୁହାଡ଼ିୟା ? ‘ସିର୍ମାରେନ୍ ପାର୍‌ମେଶ୍ୱାର୍‌ଡ଼ଃଏଡେ’ ମେନେରେଦ, ଇନିଷ୍ଟ ‘ତିକାନାଙ୍ ଯୋହାନ୍‌ରେ କାପେ ବିଶ୍ୱାସକେଦା’ ମେତାରୁଆଏ ?” ୩୨ ମେନ୍ଦ ମାନ‌ଖାକଡ଼ଃଏଡେ ମେନ୍ତେ କାଜିନାଙ୍ ବରକେଦାଃକ ତିୟାଃତି, ଇନ୍‌କୁ ହଡ଼କକେ ବର ତାଇକେନାକ, ତିୟାଃତି ସବେନ୍ ହଡ଼କ ଯୋହାନ୍ ଆୟାର୍‌କାଜିନିଷ୍ଟ† ତାନିଷ୍ଟ ମେନ୍ତେ ମାନାଡ଼ିଙ୍‌ଇ ତାଇକେନାକ । ୩୩ ଏନାମେନ୍ତେ ଇନ୍‌କୁ ଯୀଶୁକେ କାଜିରୁହାଡ଼ିକିୟାଃକ, “ଆଲେ କାଲେ ସାରିଆଃ ।”

ୟୀଶୁ ମେତାଦକଆଏ, “ଆଇଙ୍‌ହିଁ ଅକ ପେଡ଼େଃଡେ ଏନାକଇଙ୍ ରିକାତାନା, କାଇଙ୍ ଉଦୁବାପେୟା ।”

* ୧୧:୨୭ ୧୧:୨୭ ନେ ବାତାନ୍ ଚିମିନ୍ ମାରି ଅନଲକରେ ବାନଆଃ † ୧୧:୩୨ ୧୧:୩୨ ଆୟାର୍‌କାଜିନିଷ୍ଟ ନାବ

୧୨

ଦାଖବାକ୍ତିରେ କାର୍ କାମିତାନ୍ ହଡକଆଃ ଜନ୍କା କାଜି
(ମାଥୁ ୨୧:୩୩-୪୬; ଲୁକ ୨୦:୯-୧୯)

^୧ ଏନ୍ତେ ଯିଶୁ ଜନ୍କା କାଜିତେ ଇନ୍କୁକେ ଜାଗାର୍ ଏଟେଦକେଦଆଏ, “ମିଆଁଦ୍ ହଡ ମିଆଁଦ୍ ଦାଖବାକ୍ତି ବାଇକେଦାଏ, ଆଡଃ କେସେଦବିୟୁରକେଦାଏ, ଘାନା ନାଗେନ୍ତେ ଗାଡା ଉରକେଦାଏ, ଆଡଃ ହରମେନ୍ତେ ହରଠାୟାଦ୍* ବାଇକେଦାଏ, ଏନ୍ତେ ଇନିଃ ଏନ୍ ଦାଖବାକ୍ତି କାର୍ କାମିତାନ୍ ହଡକକେ ଏମ୍କେଦତେ ସାଜିନ୍ ଦିଶୁମ୍ତେ ସେନଃୟାନାଏ ।^୨ ଜ ଗଦଃ ସାହା ତେବାଃୟାନ୍ତି, ଦାଖବାକ୍ତିରେୟାଃ ଜ ନାମେ ନାଗେନ୍ତେ ଇନିଃ ମିଆଁଦ୍ ଦାସିକେ ଏନ୍ କାର୍ କାମିତାନ୍ ହଡକତାଃତେ କୁଲକିୟାଏ ।^୩ କାର୍ କାମି ହଡକଦ ଏନ୍ ଦାସିକେ ସାବ୍କିତେକ ଦାଲକିୟାଃ, ଆଡଃ ସାମାତିଃଇକ କୁଲୁହାଡକିୟା ।^୪ ଏନ୍ତେ ଇନିଃ ଏଗାଃ ଦାସିକେ ଇନ୍କୁତାଃ କୁଲକିୟାଏ, ଇନିଃକେଦ କାର୍କାମି ହଡକ ବହଃରେ ଦାଲିତାନ୍ଲଃ ହିଲ୍ଲକେଦତେ କୁଲୁହାଡକିୟାକ ।^୫ ଏନ୍ତେ ଇନିଃ ଆଡଃମିଆଁଦ୍ ଦାସିକେ କୁଲକିୟାଏ, ଆଡଃ ଇନିଃକେହ୍ ଗଏଃକିୟାକ । ଇନିଃ ପୁରାଃ ଏଗାଃ ଦାସିକେ କୁଲକେଦକଆଏ, ଚିମିନ୍କକେ ଦାଲକେଦକଆକ, ଆଡଃ ଚିମିନ୍କକେ ଗଏଃକେଦକଆକ ।^୬ ନାହାଁଃ ମିଆଁଦ୍ଗି କୁଲଃନିଃ ସାରେଜାକାନାଏ, ଇନିଃଦ ଆୟାଃ ଦୁଲାଡ୍ ହନ୍କଡା ତାନିଃ । ନାହାଁଃ ଇନ୍କୁ ହନିଙ୍ଗକଡାକେ ମାଈନିୟାକ, ମେନ୍କେଦତେ ଚୁଶ୍ଚୁର ଇନିଃ ଆୟାଃ ଏନ୍ ହନ୍କେ ଇନ୍କୁତାଃତେ କୁଲକିୟାଏ ।^୭ କାର୍କାମି ହଡକ ମେପେନ୍ୟାନା, ‘ନିଃଗି ଏନ୍ ଗମ୍କେୟାଃ ହନ୍ତାନିଃ, ମାର୍ବୁ ଗଜିୟା ଆଡଃ ଇନିୟାଃ ହାନାଟିଙ୍ଗ୍ ଆବୁଆଃ ହବାଅଆଃ ।’^୮ ଏନାମେନ୍ତେ ଇନ୍କୁ ଇନିଃକେ ସାବ୍କିତେ ଗଏଃକିୟାକ, ଆଡଃ ଇନିୟାଃ ଦାଖବାକ୍ତିଏତେ ହୁରାଙ୍ଗ୍ ଅଡ଼ଙ୍ଗକିୟାଃକ ।

^୯ “ଦାଖବାକ୍ତି ଗମ୍କେ ତାବ୍ଦ ଚିନାଃଆଏ ଚିକାୟା ?” ମେନ୍ତେ ଯିଶୁ କୁଲକେଦକଆଏ । “ଇନିଃଦ ହିଜୁଃକେଦତେ ଏନ୍ କାର୍ କାମିହଡକକେ ଗଏଃକଆଏ, ଆଡଃ ବାଖ୍ତିତାୟାଃକେ ଏଗାଃ କାର୍

* ୧୨:୧ ୧୨:୧ ହରଠାୟାଦ୍ ମାଟେନ୍

କାମି ହତକକେ ଏମାକଆଏ । ୧୦ ଚିୟାଃ ଆପେ ଧାରାମ୍ପୁଥିରେ ନେ କାଜି କାପେ ପାଢ଼ାଅକାଦାଃ ?

“ ବାବାଇକ ଅକନ୍ ଦିରିକେ ଆତମ୍ ଏଣ୍ଣାଃଲେଦାକ

ଏନାଦ କଚାରାଃ ମୁଲ୍‌ଦିରି ହବାୟାନା ।

୧୧ ନେ କାମିଦ ପ୍ରାଭୁଗି ରିକାକେଦାଏ

ଆତଃ ଏନାଦ ଆବୁଆଃ ନେନେଲ୍‌ରେ ଆକ୍‌ଦାନ୍‌ଆଅଗିୟା । ”

୧୨ ଯିହୁଦୀ ନେତାକଆଃ ବିରୁଧ୍‌ରେ ନେ ଜନ୍‌କା କାଜି କାଜିକେଦାଏ ଏନା ଆଟ୍‌କାରକେଦ୍‌ତେ ଇନିଃକେ ସାସାବ୍ ସାନାଙ୍‌ତାନକ ତାଇକେନା, ମେନ୍‌ଦ ଇନ୍‌କୁ ଗାଦେଲ୍ ହତକକେ ବରକେଦ୍‌ତେ ଇନିଃକେ ବାଗିକେଦ୍‌ତେକ ନିର୍‌ୟାନା ।

କାର୍ ଏମଃରେୟାଃ ଇନିତୁ

(ମାଥୁଉ ୨୨:୧୫-୨୨; ଲୁକ ୨୦:୨୦-୨୨)

୧୩ ଆତଃ ଯୀଶୁଆଃ କାଜି ହରାତେ ସାବି ନାଗେନ୍ତେ ଇନ୍‌କୁ ଫାରୁଶୀକଏତେ ଆତଃ ହେରୋଦ୍‌ରାଃ ଚିମିନ୍ ହତକକେ ଇନିଃତାଃତେକ କୁଲ୍‌କେଦ୍‌କଆ । ୧୪ ଇନ୍‌କୁ ଆୟାଃତାଃ ହିନ୍‌ଡ଼ୟାନ୍‌ଚିକ କାଜିକିୟା, “ହେ ଗୁରୁ, ଆମ୍‌ଦ ସାର୍‌ତିନିଃ ତାନ୍‌ମେ ଆତଃ ଜେତାଏକେ କାମ୍ ବରଆଃ ମେନ୍ତେ ଆଲେ ସାରିତାନାଲେ, ଆମ୍‌ଦ ହତରାଃ ମେଦ୍‌ମୁହାଁଡ୍ କାମ୍ ନେଲ୍‌ଆଃ, ମେନ୍‌ଦ ସାର୍‌ତିଗି ପାର୍‌ମେଶ୍‌ବରାଃ ହରା ଇତୁଆଃମେ, ମାର୍ କାଜିୟାଲେମେ, ଆଇନ୍ ଲେକାତେ ଆଲେକେ କାଇସାର୍‌କେ କାର୍ ଏମଃ ଲାଗାତିୟାଃ ଚି କାହା ?”

୧୫ ମେନ୍‌ଦ ଯୀଶୁ ଇନ୍‌କୁଆଃ ବେଦା ଆଟ୍‌କାରକେଦ୍‌ତେ ମେତାଦ୍‌କଆ, “ଚିନାଃ ମେନ୍ତେପେ ବିଡ଼ାଅଇଙ୍ ଡାନା ? ମୁସିଙ୍‌ରାଃ ନାଲା ସିକା ଆଉଝାଈଙ୍‌ପେ, ଏନା ନେଲେଆଇଙ୍ ।”

୧୬ ଇନ୍‌କୁ ମିଆଁଦ୍ ସିକା ଆୟାଃତାଃକ ଆଉକେଦା, ଏନ୍ତେ ଇନିଃ ଇନ୍‌କୁକେ କୁଲ୍‌କେଦ୍‌କଆ, “ନେ ମୁରୁଡ୍ ଆତଃ ନୁତୁମ୍ ଅକଏୟାଃ ତାନାଃ ?”

ଇନ୍‌କୁ “କାଇସାର୍‌ରାଈକ” କାଜିକିୟା ।

୧୭ ଯୀଶୁ କାଜିରୁହାଡ଼ାଦ୍‌କଆଏ, “ଏନ୍‌ରେଦ୍ ଅକନାଃ କାଇସାର୍‌ରାଈ ତାନାଃ ଏନା କାଇସାର୍‌କେଗି ଏମାଈପେ, ଆତଃ

ଅକ୍ନାଃ ପାର୍ମେଶ୍ୱାରରାଃ ତାନାଃ ଏନା ପାର୍ମେଶ୍ୱାରକେଗି ଏମାଲପେ ।”

ଆତଃ ଯୀଶୁଆଃ ନେ କାଜିରେ ଇନ୍କୁ ହାଏକାଟ୍‌ୟାନାକ ।

ୟୀଶୁ ହଡ଼କଆଃ ଜୀଉ ବିନିରିଦ୍‌ରେୟାଃ କାପ୍‌ଜିରେ ସାଦୁକିକକେ ହାପାକତାନାଏ

(ମାଥୁଉ ୨୨:୨୩-୩୩; ଲୁକ ୨୦:୨୭-୪୦)

୧୮ ✱ଜୀଉବିନିରିଦ୍‌ରେ କା ବିଶ୍ୱାସେତାନ୍ ସାଦୁକିକଏତେ ତିମିନ୍ ହଡ଼କ ଯୀଶୁତାଃତେ ହିଜୁଃକେଦ୍‌ତେ ଇନିଃକେ କୁଲିକିୟାଃକ : ୧୯ “ହେ ଗୁରୁ, ମୁଣା ଆଲେ ନାଗେନ୍ତେ ଅଲ୍ଲାକାଦାଏ, ଜେତାଏ ହଡ଼ଆଃ ଦାଦାତେ ବେଗାର୍ ହନ୍‌ଗାଁଣାକ ହବାଅଃ ସିଦାରେ ଗଏଃକେନଃ ରେଦ୍, ଆୟାଃ ହାଗାତେ ଇନିୟାଃ କୁଡ଼ିକେ ଆଣ୍ଡିୟାଃକାଏ, ଆତଃ ଦାଦାତେ ନାଙ୍ ହନ୍‌ଗାଁଣା ଜାନାମ୍‌କାଏ । ୨୦ ମିଦ୍ ଦିପିଲିରେ ସାଡ଼ ହାଗିୟା ତାଇନ୍‌କେନାକ ମାରାଙ୍‌ନିଃ ଆଣ୍ଡିକେଦ୍‌ତେ ବେଗାର୍ ହନ୍‌ଗାଁଣାତେ ଗଏଃୟାନାଏ । ୨୧ ଏଟାଃନିଃ ଏନ୍ ରାଣ୍ଡିକେ ଆଣ୍ଡିୟାନାଏ ଆତଃ ଇନିଃହ ହନ୍‌ଗାଁଣା ହବାଅଃ ସିଦାରେ ଗଏଃୟାନା, ଆପିୟାନିଃହଗି ଏନ୍‌କାୟାନାଏ । ୨୨ ଏନ୍‌କାତେ ସାଡ଼ ହାଗିୟାକ ବେଗାର୍ ହନ୍‌ଗାଁଣାତେକ ଗଏଃୟାନା, ସବେନ୍‌କ ତାୟମ୍‌ତେ ଏନ୍ କୁଡ଼ିୟଗି ଗଏଃୟାନାଏ । ୨୩ ତାଦ୍‌ ଜୀଉବିନିରିଦ୍‌ରେ, ସବେନ୍‌କ ଜୀଉବିରିଦ୍‌ସ ଦିପିଲିରେ, ଏନ୍ କୁଡ଼ି ଇନ୍‌କୁଏତେ ଅକଏୟାଃ କୁଡ଼ି ହବାଅଆଃଏ ? ଚିୟାଃଚି ସାଡ଼ ହାଗିୟା ସବେନ୍‌କଦ ଇନିଃକେ ଆଣ୍ଡିକାନ୍ ତାଇକେନାକ ।”

୨୪ ଯୀଶୁ ଇନ୍‌କୁକେ ମେତାଦ୍‌କଆ, “ଆପେ ଧାରାମ୍‌ପୁଥୁ ଆତଃ ପାର୍ମେଶ୍ୱାର୍‌ଆଃ ପେଡ଼େଃକ କାପେସାରି ହରାତେ ଆଦାକାନାପେ । ୨୫ ଗଏଃକେଦ୍‌ତେ ଜୀଉ ବିନିରିଦ୍‌ ତାୟମ୍‌ତେ ହଡ଼କ କାକ ଆଣ୍ଡିନାଃ ଆତଃ କାକ ଆଣ୍ଡି ଏମାଆ, ଇନ୍‌କୁ ସିର୍ମାରେନ୍ ଦୁଡ଼କ ଲେକାକ ତାଇନାଃ । ୨୬ ଆତଃ ଗଏଃକାନ୍‌କଆଃ ଜୀଉବିରିଦ୍‌ରାଃ କାଜିପେ କୁଲିଙ୍ଗତାନା, ମୁଣା ଅଲ୍ଲାକାନ୍ ପୁଥୁରେ ଅଲ୍ଲାକାନା, ଜୁଲ୍‌ତାନ୍ ରୁପାଦ୍‌ରାଃ କାଜି କାପେଚି ପାଢ଼ାଅକାନା ? ନେ ସବେନ୍‌କ ଗଜାକାନ୍‌ରେୟଗି, ଚିଲ୍‌କା ପାର୍ମେଶ୍ୱାର୍ ମୁଣାକେ କାଜିକିୟାଏ,

✱ ୧୨:୧୮ ୧୨:୧୮ ପ୍ରେରିଡ଼ ୨୩:୮.

ଆଇଙ୍ଗ୍ ଆବ୍ରାହାମ୍‌ଆଃ ପାର୍ମେଶ୍ୱାର୍, ଇସାକ୍‌ଆଃ ପାର୍ମେଶ୍ୱାର୍, ଆଡ଼ଃ ଯାକ୍‌ବ୍‌ଆଃ ପାର୍ମେଶ୍ୱାର୍ ତାନିଙ୍ଗ୍ । ୨୭ ପାର୍ମେଶ୍ୱାର୍‌ଦ ଗଜାକାନକଆଃ ପାର୍ମେଶ୍ୱାର୍ ନାହାଁଲିଃ ମେନ୍‌ଦ ଜୀନିଦ୍ ହଡ଼କଆଃ ପାର୍ମେଶ୍ୱାର୍ ତାନିଃ । ଆପେ ପୁରାଃଗିପେ ଆଦାକାନା ।”

ସବେନାଃଏତେ ମାରାଙ୍ଗ୍ ଆନ୍‌ରୁ
(ମାଥୁଝ ୨୨:୩୪-୪୦; ଲୁକ ୧୦:୨୫-୨୮)

୨୮ ମିଆଁଦ୍ ଆଇନ୍ ଇତୁନିଃ ଇନ୍‌କୁକେ କାପାଜିତାନ୍ ଆୟୁମ୍‌କେଦକଆଏ । ଯୀଶୁ ଏନ୍ ସାଦୁକିକକେ ଚିଲ୍‌କା ବୁଗିଲେକାତେ କାଜିରୁହାଡ଼ାଦକଆଏ ଏନା ଆଟ୍‌କାର୍ ଉରୁମ୍‌କେଦ୍‌ତି, ଇନିଃ କୁଲିକିୟାଏ, “ସବେନ୍ ଆନ୍‌ରୁକଏତେ, ମାରାଙ୍ଗ୍ ଆନ୍‌ରୁ ଅକଆଃ ତାନାଃ ?”

୨୯ ଯୀଶୁ କାଜିରୁହାଡ଼କିୟାଏ, “ସବେନାଃଏତେ ମାରାଙ୍ଗ୍ ଆନ୍‌ରୁଦ୍ ନେଆଁତାନାଃ, ହେ ଇସ୍ରାଏଲ୍, ଆୟୁମେମେ, ପ୍ରାଭୁ ଆବୁଆଃ ପାର୍ମେଶ୍ୱାର୍, ଏସକାର୍‌ଗି ପ୍ରାଭୁତାନିଃ । ୩୦ ପ୍ରାଭୁ ଆମାଃ ପାର୍ମେଶ୍ୱାର୍‌କେ ଆମାଃ ସବେନ୍ ମନ୍‌ତେ, ଆଡ଼ଃ ଆମାଃ ସବେନ୍ ଜୀଉତେ, ଆଡ଼ଃ ଆମାଃ ସବେନ୍ ସେଣାଁତେ, ଆଡ଼ଃ ଆମାଃ ସବେନ୍ ପେଡ଼େଃତେ ଦୁଲାଡ଼ିମେ । ୩୧ ଏଟାଃ ଆନ୍‌ରୁଦ୍ ନେଆଁତାନାଃ, ଆମାଃ ହପର୍‌ଜାପାଃରେନିଃକେ ଆମ୍‌ଲେକା ଦୁଲାଡ଼ିମେ । ନେ ବାରିଆଃ ଆନ୍‌ରୁଏତେ, ମାରାଙ୍ଗ୍ ଆଡ଼ଃ ଜେତାଏ ଆନ୍‌ରୁ ବାନଆଃ ।”

୩୨ ଆଇନ୍ ଇତୁକ ଯୀଶୁକେ କାଜିକିୟାଃ, “ଠାଉକାଗିମ୍ କାଜିତାନା, ଏ ଇତୁନିଃ, ଆମାଃ କାଜି ସାର୍‌ତିଗିଆଃ, ଆମାଃ କାଜି ଲେକାତେ ପାର୍ମେଶ୍ୱାର୍ ମିଆଁଦ୍‌ଗିଆଏଃ, ଆଡ଼ଃ ଇନିଃକେ ବାଗିକେଦ୍‌ତେ ଏଟାଃ ଜେତାଏ ପାର୍ମେଶ୍ୱାର୍ ବାଙ୍ଗାଲଆଃ । ୩୩ ଆଡ଼ଃ ହଡ଼କେ, ଆୟାଃ ସବେନ୍ ମନ୍‌ତେ, ଆଡ଼ଃ ଆୟାଃ ସବେନ୍ ସେଣାଁତେ, ଆଡ଼ଃ ଆୟାଃ ସବେନ୍ ପେଡ଼େଃତେ ଇନିଃକେ ଦୁଲାଡ଼୍ ଲାଗାତିୟାଃ ଆଡ଼ଃ ଆୟାଃ ହପର୍‌ଜାପାଃନିଃକେହ ଆୟାଃ ଲେକା ଦୁଲାଡ଼୍ ଲାଗାତିୟାଃ । ନେ ବାରିଆ ଆନ୍‌ରୁ ମାନାତିଙ୍ଗ୍‌ତେଆଃଦ୍ ଉରୁବଃ ଦାଣେଁ ଚାଏ ସବେନ୍ ଏଟାଃ ଦାଣେଁରାକାବ୍‌ଏତେ ମାରାଙ୍ଗ୍ କାମିତାନାଃ ।”

୩୪ ☆ ଇନିଃ ସେଣ୍ଟିନ୍ ଲେକାତେ କାଜିକେଦାଏ, ଏନା ନେଲ୍‌କେଦ୍‌ତେ ଯୀଶୁ ଇନିଃକେ ମେତାଇୟାଏ, “ଆମ୍‌ଦ ପାର୍‌ମେଶ୍ୱାର୍‌ଆଃ ରାଇଜ୍‌ଏତେ ସାଜିନ୍‌ରେ ବାଙ୍‌ମେଆଁଃ ।” ଆଡ଼ଃ ଏନ୍‌ତାୟମ୍‌ତେ ଜେତାଏ ଇନିଃକେ ଜେଡ୍‌ନାଃ କୁଲିନାଙ୍‌ କାକ ସାହ୍‌ସକେଦା ।

ଖ୍ରୀଷ୍ଟ ଦାଉଦାଃ ହନ୍ତେକଡ଼ା

(ମାଥ୍‌ଉ ୨୨:୪୧-୪୬; ଲୁକ ୨୦:୪୧-୪୪)

୩୫ ମାନ୍ଦିର ଅଡ଼ାଃରେ ଇତୁତାନ୍ ଇମ୍‌ତା ଯୀଶୁ କୁଲିକେଦକଆଏ, “ଖ୍ରୀଷ୍ଟ ଦାଉଦ୍‌ଆଃ ହନ୍ ତାନିଃ ମେନ୍ତେ ଆଇନ୍ ଇତୁକ ଚିଲ୍‌କାତେକ କାଜିୟାଃ ? ୩୬ ଦାଉଦ୍ ଆଇଃକ୍‌ଗି ପାବିତାର୍ ଆମ୍‌ରାଃ ଉସ୍‌କୁର୍‌ତେ କାଜିକେଦାଏ,

“ପ୍ରାଭୁ ଆଇଁୟାଃ ପ୍ରାଭୁକେ ମେତାଇୟାଏ; ଆମାଃ ବାଇରିକକେ ଆମାଃ କାଟାସୁବାରେ କା ଆଉ ଜାକେଦ୍ ଆଇଁୟାଃ ଜମ୍‌ତିସାଃରେ ଦୁବାକାନ୍‌ମେ ।”

୩୭ ଦାଉଦ୍ ଆଇଃକ୍‌ଗି ଖ୍ରୀଷ୍ଟକେ ପ୍ରାଭୁ ମେତାଇତାନ୍‌ରେଦ, ପାର୍‌ମେଶ୍ୱାର୍‌ଆଃ ସାଲାକାନ୍ ବଞ୍ଚାଅନିଃ ଖ୍ରୀଷ୍ଟ ଚିଲ୍‌କାତେ ଦାଉଦ୍‌ଆଃ ହନ୍ତେକଡ଼ା ତାନିଃ ?

ଗାଦେଲ୍ ହଡ଼କ ଯୀଶୁଆଃ କାଜି ସୁକୁତେକ ଆୟୁମ୍ ତାଇକେନା ।

ୟୀଶୁ ଆଇନ୍ ଇତୁକଆଃ ଗୁଣ୍ଟାଏ ଉଦୁବେତାନା

(ମାଥ୍‌ଉ ୨୩:୧-୩୬; ଲୁକ ୨୦:୪୫-୪୭)

୩୮ ଯୀଶୁ ଇନ୍‌କୁକେ ଇତୁତାନ୍‌ଲଃ ମେତାଦକଆଏ, “ଆଇନ୍ ଇତୁକତାଃଏତେ ଚିର୍‌ଗାଲାକାନ୍‌ପେ । ଇନ୍‌କୁ ଜିଲିଙ୍‌ ଲିଜାଃ ତୁସିଙ୍‌କେଦ୍‌ତେ ସେନ୍‌ବାଡ଼ା, ଆଡ଼ଃ ପିର୍ ପିଡ଼ିକରେ ଜହାର୍‌ତେଲା, ୩୯ ଆଡ଼ଃ ଇନ୍‌କୁକେ ସାମାଜ୍ ଅଡ଼ାଃକରେ ଆୟାର୍‌ରେ ଦୁବ୍‌ନାଙ୍‌, ଆଡ଼ଃ ମାରାଙ୍‌ ଜମ୍‌ନ୍‌କରେ ସିଦା ଠାୟାଦ୍‌ରେ ଦୁବ୍‌ନାଙ୍‌ ସୁକୁକଆ । ୪୦ ଇନ୍‌କୁ ରାଣ୍ଡିକୁଡ଼ିକଆଃ ଅଡ଼ାଃକ ଉଦେତାନା ଆଡ଼ଃ ବେଦାତେ ଜିଲିଙ୍‌ ଜିଲିଙ୍‌ଗିକ ବିଡ଼ିୟା । ଏନ୍‌ଲେକାନ୍ ହଡ଼କଦ୍ ଆଦକା ସାଜାଇକ ନାମେୟା ।”

☆ ୧୨:୩୪ ୧୨:୩୪ ଲୁକ ୧୦:୨୫-୨୮.

**ରାଣ୍ଡିକୁଡ଼ିଆଃ ଏମଃ
(ଲୁକ ୨୧:୧-୪)**

୪୧ ଯୀଶୁ ମାନ୍ଦିର ଖାଜନା ବାକାସ୍ ନାଡ଼େଃରେ ଦୁବାକାନ ତାଇକେନ୍ ଇମତା ହଡ଼କକେ ଏନାରେ ପାଏସା ସାଜୁତାନ୍ ନେଲକେଦକଥାଏ । ପୁରାଃ କିସାଣ୍ ହଡ଼କ ପୁରାଃଗି ପାଏସା ଉୟୁଃକେଦାଃକ । ୪୨ ଏନ୍ତେ ମିଆଁଦ୍ ରେକ୍ଠେଃ ରାବାଙ୍ ରାଣ୍ଡିକୁଡ଼ି ହିଜୁଃକେଦତେ ମିଦଦୋକଡ଼ା† ଗନଙ୍ଠରାଃ ବାରିଆଃ ହୁପ୍ଡିଙ୍ ତାମ୍ବା ସିକା ଉୟୁଃକେଦାଏ । ୪୩ ଯୀଶୁ ଆୟାଃ ଚେଲକକେ ହାକାଅକେଦତେ ମେତାଦକଥାଏ, “ସାର୍ଡିଗିଙ୍ କାଜିୟାପେତାନା, ଖାଜନା ବାକାସ୍ରେ ଏମ୍କେଦ୍ ସବେନ୍ ହଡ଼କ ଏତେ, ନେ ଗାରିବ୍ ରାଣ୍ଡିକୁଡ଼ି ଥୁମ୍ବା ଏମାକାଦାଃଏ । ୪୪ ଏଟାଃ ହଡ଼କ ଆକଆଃ ଆଦକା ମେନାଃତେୟାଃଏତେ କାଟିଃଲେକାକ ଏମ୍କେଦାଃ; ମେନଦ୍ ନିଃ ରେକ୍ଠେଃ ରାବାଙ୍ ତାଇନରେୟ ଆୟାଃ ଜୀଉ ବାସ୍ତାଅ ନାଗେନ୍ତେ ଆୟାଃତାଃରେ ତାଇକେନ୍ତେୟାଃ ସବେନାଃଏ ଏମ୍କେଦା ।”

୧୩

**ମାନ୍ଦିର ହାଦୁଡ଼ଃରେୟାଃ ଆୟାରକାଜି
(ମାଥୂଉ ୨୪:୧-୨; ଲୁକ ୨୧:୫-୬)**

୧ ଆଡ଼ଃ ଯୀଶୁ ମାନ୍ଦିର ଅଡ଼ାଃଏତେ ସେନଃତାନ୍ ଦିପିଲିରେ ଆୟାଃ ଚେଲକଏତେ ମିହୁଡ଼୍ କାଜିକିୟାଏ, “ଏ ଇଡୁନିଃ, ନେ ମାପ୍ରାଙ୍ ଅଡ଼ାଃକରେ ନେଲେମେ, ଚିଲକାନ୍ ମାପ୍ରାଙ୍ ଦିରିକ ଆଡ଼ଃ ଚିଲକାନ୍ ସୁଗାଡ଼ାନ୍ ଦିରିକ ମେନାଃ ।”

୨ ଯୀଶୁ ଇନିଃକେ କାଜିରୁହାଡ଼କିୟା, “ନେ ମାପ୍ରାଙ୍ ଅଡ଼ାଃକ ଚିମ୍ ନେଲେତାନା ? ଦିରି ଚେତାନ୍ ଦିରି ଡିରିୟାକାନ୍ କା ତାଇନା, ସବେନାଃ ହାଦୁଡ଼ଃଆ* ।”

**ୟୀଶୁ ଚୁଣ୍ଟୁ ଦିପିଲିରାଃ ଦୁକୁ ବିଷାଏରେ କାଜିକେଦାଏ
(ମାଥୂଉ ୨୪:୩-୧୪; ଲୁକ ୨୧:୭-୧୯)**

୩ ମାନ୍ଦିର ସାମ୍ନାଙ୍ରେଆଃ ଜାଇତୁନ୍ ବୁରୁ ଚେତାନ୍ରେ ଯୀଶୁ ଦୁବାକାନାଏ ତାଇକେନ୍ ଦିପିଲିରେ, ପାଡ଼ରାସ୍, ଯାକୁବ୍,

† ୧୨:୪୨ ୧୨:୪୨ ମିଦଦୋକଡ଼ା ଆଧୁଲି * ୧୩:୨ ୧୩:୨ ଧାଁସଃ

ଯୋହାନ୍ ଆଡ଼ଃ ଆନ୍ଦ୍ରିୟ ଇନିଷତାଃ ଏସ୍‌କାରରେ ହିଜୁଃକେଦ୍‌ତେକ କୁଲିକିୟା, ^୪ “ନେଆଁକ ଚିଉଲା ହବାଅଆଃ ? ଆଡ଼ଃ ନେ କାଜି ପୁରାଅଃଲେକାରେ ଅକନ୍ ଚିହ୍ନା ଉଦୁବଃଆ ଏନା ଉଦୁବାଲେମେ ।”

^୫ “ୟୀଶୁ ଇନ୍‌କୁକେ କାଜିୟାଦ୍‌କଆଏ, ଚିର୍ଗାଲାକାନ୍‌ପେ, ଜେତାଏ ଆଲକାକ ବେଦାପେକା । ^୬ ପୁରାଃ ହଡ଼କଦ ଆଇଁୟାଃ ନୁଡୁମ୍‌ତେକ ହିଜୁଃଆ ଆଡ଼ଃ ‘ଆଇଙ୍ଗ୍ ଖ୍ରୀଷ୍ଟ୍ ତାନିଙ୍ଗ୍’ ମେନ୍ତେକ କାଜିୟା ଆଡ଼ଃ ପୁରାଃ ହଡ଼କକେ ବେଦାକଆକ । ^୭ ଆପେ ମାପାଃତୁପୁଇଙ୍ଗ୍ ଆଡ଼ଃ ମାପାଃତୁପୁଇଙ୍ଗ୍‌ରାଃ କାଜିପେ ଆୟୁମେରେଦ ବରତେ ଆଲ୍‌ପେ ଆକ୍‌ବାକାଅଆଃ, ନେଆଁ ସବେନାଃଦ ହବାଅଃଗି ଲାଗାତିୟାଃ, ମେନ୍‌ଦ ଏନ୍ ଦିପିଲିହ୍ ଟୁଣ୍ଡୁ ନୁହାଁଲାଃ ।^୮ ଚିୟାଃଚି ଦିଶ୍‌ମ୍ ବିରୁଧ୍‌ରେ ଦିଶ୍‌ମ୍ ଆଡ଼ଃ ରାଇଜ୍ ବିରୁଧ୍‌ରେ ରାଇଜ୍ ଲାଡ଼ାଇ ହବାଅଆଃ, ସବେନ୍ ଠାୟାଦ୍‌ରେ ଅତେ ଏକଲାଅଃଆ ଆଡ଼ଃ ରିଙ୍ଗାଅଃଆ । ମେନ୍‌ଦ ନେ ସବେନାଃ ହନ୍ ଜାନାମଃ ଇମ୍‌ତାରାଃ ଦୁକୁରେୟାଃ ଏନେଟେଦ୍‌ ଲେକାନାଃ ତାନାଃ ।

^୯ ☆“ଆପେକେ ଚିର୍ଗାଲାକାନ୍ ତାଇନଃ ଲାଗାତିୟାଃ, ଇନ୍‌କୁଦ ପାଞ୍ଚେଟ୍‌କରେକ ଏମ୍‌ଏଣ୍ଡାଃପେୟା ଆଡ଼ଃ ସାମାଜ୍ ଅଡ଼ାଃକରେ ଦାଲ୍‌ପେୟାକ । ଆପେ ଆଇଁୟାଃ ତେଲାକ ତାନ୍‌ପେ ମେନ୍ତେ, ସୁକୁକାଜି ଉଦୁବେ ନାଗେନ୍ତେ ଆପେକେ ହାକିମ୍ ଆଡ଼ଃ ରାଜାକତାଃ ତିଙ୍ଗ୍ ହବାଅଆଃ । ^{୧୦} ଆଡ଼ଃ ଟୁଣ୍ଡୁ ଦିପିଲି ସେଟେର୍ ସିଦାରେ ସୁକୁକାଜି ସବେନ୍ ଜାତିରାଃ ହଡ଼କତାଃରେ ଉଦୁବ୍‌ଗି ଉଦୁବଃଆ । ^{୧୧} ଚିମ୍‌ତାଙ୍ଗ୍ ଆପେକେ ସାବ୍‌କେଦ୍‌ତେ ଇନ୍‌କୁ କାତାଈରିତେ ଇଦିପେୟାକ, ଇମ୍‌ତା ଚିନାଃରୁ କାଜିୟା ମେନ୍ତେ ସିଦାରେ ଆଲ୍‌ପେ ଉଡ଼ୁଇୟା ଏନ୍ ଦିପିଲି ହିଜୁଃଆ ଇମ୍‌ତା ଆପେକେ ଅକଆଃ କାଜି ନାଗେନ୍ତେ ଏମ୍‌ଃଆ ଏନାପେ କାଜିୟା । ଚିୟାଃଚି ଏନ୍ତାଃରେ ଅକ କାଜିପେ କାଜିୟା ଏନାଦ ଆପେତେଗି କା, ମେନ୍‌ଦ ପାବିତାର୍ ଆମ୍‌ରାଃ ପେଡ଼େଃ ହରାତେପେ କାଜିୟା । ^{୧୨} ହାଗା ଆୟାଃ ହାଗାତେକେ ଆଡ଼ଃ ଆପୁ ଆୟାଃ ହନ୍‌କେ ଗଜି ନାଗେନ୍ତେ ଏମ୍‌ଏଣ୍ଡାଈଆଃଏ, ଆଡ଼ଃ ହନ୍‌କ ଆକଆଃ ଏଙ୍ଗାଆପୁକଆଃ ବିରୁଧ୍‌ରେକ ବିରିଦାଃ ଆଡ଼ଃ ଇନ୍‌କୁକେ ଗଏଃ ଇଟିକଆକ ।

☆ ୧୩:୯ ୧୩:୯ ମାଥୁଉ ୧୦:୧୭-୨୦; ଲୁକ ୧୨:୧୧,୧୨.

୧୩ ✠ଚିୟାଃଚି ଆପେ ଆଇଁୟାଃ ଚେଲକ ତାନପେ ସବେନ୍ ହଡକ ଆପେକେ ହିଲାଙ୍ଗପେୟାକ, ମେନ୍ଦ ଜେତାଏ ଚୁଣ୍ଟୁ ଜାକେଦ୍ ସାହାତିଙ୍ଗତାନଲଃ ତିଙ୍ଗୁ କେଟେୟାକାନ୍ ତାଇନ୍ରେଦ ବାଞ୍ଚାଅଃଆଏ ।

ୟାଶୁ ଏନ୍ ଅଡେଜଃ ପୁରାଃ ସଡରା ବିଷାଏରେ ଉଦୁବେତାନା (ମାଥୁଉ ୨୪:୧୫-୨୮; ଲୁକ ୨୧:୨୦-୨୪)

୧୪ “ଆପେ ଚିମ୍ତା, ‘ଏନ୍ ଅଡେଜଃ ସଡରାକାନ୍ନିଃ’ ଅକ୍ତାଃରେଚି ଇନିୟାଃ କା ତାଇନଃ ଲାଗାତିଙ୍ଗ ଠାୟାଦରେ ତିଙ୍ଗୁଆକାନ୍ପେ ନେଲିୟା ।” ପାଡାଅନିଃ ନେଆଁରାଃ ମୁଣ୍ଡି ଆଟ୍ଟକାର୍ତ୍ତରୁମେକାଏ, ଇମ୍ତା ଯିହୁଦା ପାରଗାନ୍ରେ ତାଇନଃତାନକ ବୁରୁତେକ ନିରତେବାଃକା । ୧୫ ✠ଅକ ହଡ ଆୟାଃ ଅଡ଼ାଃ ସାଡ଼ମିରେ ମେନାଇୟାଃ ଇନିଃ ଆୟାଃ ଜେଡନାଃ ଇଦିମେନ୍ତେ ଆଡ଼ଗୁକେଦ୍ତେ ଅଡ଼ାଃତେ ଆଲକାଏ ବଲଃକା । ୧୬ ପିଡ଼ି ଲୟଙ୍ଗରେ ତାଇନିଃ, ଇନିଃ ଆୟାଃ ଲିଜାଃ ଇଦିମେନ୍ତେ ଅଡ଼ାଃତେ ଆଲକାଏ ରୁହାଡକା । ୧୭ ମେନ୍ଦ ଏନ୍ ଦିପିଲିରେନ୍ ବାଜିଆକାନ୍ କୁଡିକଆଃ ଆଡ଼ା ତଆ ନୁନୁଆକତାନ୍ ଏଙ୍ଗାକଆଃ ନାଗେନ୍ତେ ଚିମିନ୍ ବରଞ୍ଜାନଗି ଦୁକୁ ହବାଅଆଃ । ୧୮ ରାବାଙ୍ଗସାହା ନେଆଁ ଆଲକା ହବାଅଃକା ମେନ୍ତେ ପାର୍ମେଶ୍ଵାର୍ତାଃରେ ବିକ୍ତିପେ, ୧୯ ✠ଚିୟାଃଚି ଏନ୍ ମାହାଁକରାଃ ଦୁକୁଦ ପାର୍ମେଶ୍ଵାର୍ ବାଇୟାକାଦ୍ରେଆଃ ଏନେଟେଦ୍‌ଏତେ ନାହାଁ ଜାକେଦ୍ ଚିଉଲ୍ୟାଅ କା ହବାକାନା ଆଡ଼ା ଚିଉଲ୍ୟାଅ କା ହବାଅଆଃ । ୨୦ ମେନ୍ଦ ପ୍ରାଭୁ ଏନ୍ ହୁଲାଙ୍ଗକକେ କାଏ କାମ୍ତିକାରେଦ ଜେତାଏ କାକ ବାଞ୍ଚାଅଃତେୟାଃ, ମେନ୍ଦ ଆୟାଃ ସାଲାକାନ୍ ହଡକଆଃ ନାଗେନ୍ତେ ଏନ୍ ହୁଲାଙ୍ଗକକେ କାମ୍ତିୟାକାଦା ।

୨୧ “ଏନ୍ ଦିପିଲିରେ ଜେତାଏ ଆପେକେ, ‘ନେଲିପେ, ଖ୍ରୀଷ୍ଟ୍ ନେତାଃରିୟା’ ଚାଏ ‘ହାନ୍ତାଃରିୟା,’ ମେତାପେରେଦ ଇନିଃକେ ଆଲପେ ବିଶ୍ଵାସାଆ । ୨୨ ଚିୟାଃଚି ହସଡ ଖ୍ରୀଷ୍ଟ୍ ଆଡ଼ା ହସଡ ନାବକ ବିରିଦାଃ ଆଡ଼ା ଇନ୍କୁ ମାପରାଙ୍ଗ ଚିହ୍ନାଁ ଆଡ଼ା ଆକ୍ଦାନ୍ଦାଅ କାମିକ ରିକାଉଦୁବେଆ, ଆଡ଼ା ହବାଦାଡ଼ିୟାଃରେଦ ପାର୍ମେଶ୍ଵାର୍ଆଃ

✠ ୧୩:୧୩ ମାଥୁଉ ୧୦:୨୨. ✠ ୧୩:୧୫ ୧୩:୧୫ ଲୁକ ୧୭:୩୧. ✠ ୧୩:୧୯ ୧୩:୧୯ ଉନୁଦୁବ କାଜି ୭:୧୪.

ସାଲାକାନକକେହିଁ ବେଦାକଆକ । ୨୩ ଏନାମେନ୍ତେ ଚିର୍ଗାଲାକାନପେ, ଆଇଙ୍ଗ୍ ଆପେକେ ନେତା ହିଜୁଃ ସିଦାରେଇଙ୍ଗ୍ ଉଦୁବାଦପେୟା ।

ୟାଶୁ ଆୟାଃ ହିଜୁଃରୁହାଡ଼ କାଜି ଉଦୁବକେଦାଃଏ
(ମାଥୁଉ ୨୪:୨୯-୩୧; ଲୁକ ୨୧:୨୫-୨୮)

୨୪ ☆“ଏନ୍ ଦିପିଲିରେୟାଃ ଦୁକୁ ତାୟମ୍ତେ, ସିଙ୍ଗି ନୁବାଗଃଆ, ଆଡଃ ଚାଣ୍ଡୁ ଆୟାଃ ମାର୍ସାଲ୍ କାଏ ଏମେୟା, ୨୫ ☆ଇପିଲ୍ଲକ ସିର୍ମାଏତେକ ଉୟୁଗଃଆ, ଆଡଃ ସିର୍ମାରେୟାଃ ପେଡ଼େଃୟାନତେୟାଃକ ଏକ୍ଲାଅଃଆ । ୨୬ ☆ଏନ୍ତେ ଆଇଙ୍ଗ୍ ମାନୱାହନ୍ ତାନିଙ୍ଗ୍ ହଡ଼କ ପୁରାଃ ପେଡ଼େଃତେ ଆଡଃ ମାନାରାଙ୍ଗ୍ଲଃ ରିମିଲ୍ରେ ହିଜୁଃତାନକ ନେଲିଙ୍ଗ୍ୟାଃ । ୨୭ ପାରମେଶ୍ୱାର୍ଆଃ ସାଲାକାନ ହଡ଼କକେ ଅତେଦିଶୁମ୍ପରାଃ ନେ ଚୁଣ୍ଡୁଏତେ ସିର୍ମାରେୟାଃ ହାନ୍ ଚୁଣ୍ଡୁ ଜ୍ଞାକେଦ୍ ହୁଣ୍ଡିକ ନାଗେନ୍ତେ ଇନିଃ ଆୟାଃ ଦୁଡ଼କକେ ଅତେଦିଶୁମ୍ପରାଃ ଚାରିୟସାଃତେ କୁଲ୍କଆଏ ।

ଲଆ ଦାରୁରାଃ ଜନ୍କା କାଜି
(ମାଥୁଉ ୨୪:୩୨-୩୫; ଲୁକ ୨୧:୨୯-୩୩)

୨୮ “ନାହାଁଃ ଲଆଦାରୁରେଆଃ ଜନ୍କା କାଜିତେ ଇଡୁନପେ, ଏନାରେୟାଃ କଡ଼ ସାଗେନଃତାନ୍ ଆଡଃ ସାକାମ୍ ସୁଡ଼ାଅଃତାନ୍ ଇମ୍ତା ଜେଟ୍ସିଙ୍ଗି ନାଡ଼େଃଗିଆ ମେନ୍ତେପେ ସାରିୟା । ୨୯ ଏନ୍ଲେକାଗି, ନେଆଁ ସବେନାଃ ହବାଅଃତାନ୍ପେ ନେଲେ ଇମ୍ତା, ଆଇଁୟାଃ ହିଜୁଃନେତା ନାଡ଼େଃରେଗିଆଃ, ହେଗି ଏନା ଦୁଆର୍ତାଃରେୟାଃ ମେନ୍ତେ ସାରିପେ । ୩୦ ସାର୍ତିଗିଙ୍ଗ୍ କାଜିୟାପେତାନା ନେ ସବେନାଃ ଆଉରି ହବାଅଃ ଜାକେଦ୍ ନେ ଦିପିଲିରେନ୍ ହଡ଼କ କାକ ଚୁଣ୍ଡୁଆ । ୩୧ ସିର୍ମା ଆଡଃ ଅତେ ଚୁଣ୍ଡୁଡ଼ାଃରଃଆ, ମେନ୍ଦ୍ ଆଇଁୟାଃ କାଜିକ କା ଚୁଣ୍ଡୁଆ ।

ୟାଶୁଆଃ ହିଜୁଃ ଦିପିଲି ଜେତାଏ କାଏ ସାରିଆଃ
(ମାଥୁଉ ୨୪:୩୬-୪୪)

୩୨ ☆“ଏନ୍ ହୁଲାଙ୍ଗ୍ ଚାଏ ଏନ୍ ଦିପିଲି ଜେତାଏ କାକ ସାରିଆଃ,

☆ ୧୩:୨୪ ୧୩:୨୪ ଉନ୍ନୁଦ୍ କାଜି ୬:୧୨. ☆ ୧୩:୨୫ ୧୩:୨୫ ଉନ୍ନୁଦ୍ କାଜି ୬:୧୩.
☆ ୧୩:୨୬ ୧୩:୨୬ ଉନ୍ନୁଦ୍ କାଜି ୧:୭. ☆ ୧୩:୩୨ ୧୩:୩୨ ମାଥୁଉ ୨୪:୩୬.

ସିମ୍ନାରେନ୍ ଦୁଢ଼କହ କା, ଆଇଙ୍ଗ୍ ପାରମେଶ୍ଵରଆଃ ଦୁଲାଡ଼୍ ହନ୍ଦ୍ କା, ମେନ୍ଦ୍ ଆଇଁୟାଃ ଆପୁ ଏସକାର୍ଗି ସାରିଆଃଏ । ୩୩ ଚିର୍ଗାଲାନକାନ୍ତାଇନ୍ଦେ, ଏୟନାକାନ୍ ନେଲ୍ହରାଏପେ, ଚିୟାଃଚି ଏନ୍ ନେଡା ଚିମ୍ତା ତେବାଗାଃ ଏନା ଆପେଦ କାପେ ସାରିୟା । ୩୪ ☆ଏନା ସାଙ୍ଗିନ୍ ଦିଶୁମ୍ତେ ସେନଃତାନ୍ ମିଆଁଦ୍ ହଡ଼ଲେକା । ଇନିଃଆୟାଃ ଅଡ଼ାଃ ବାଗିକେଦ୍ତେ ଆୟାଃ ଦାସିକକେ ଆକ୍ତେୟାର୍ ଏମାଦକଆଏ, ଆଡ଼ଃ ମିଆଁଦ୍ନିଃକେ ଆୟାଃ କାମି ଏମାଦକଆଏ, ଆଡ଼ଃ ହରନିଃକେ ଏୟନାକାନ୍ମେ ମେନ୍ତେ ଆରୁକାଦା । ୩୫ ଏନାମେନ୍ତେ ଏୟନାକାନ୍ତାଇନ୍ଦେ, ଚିୟାଃଚି ଆପେଦ ଆପେୟାଃ ଅଡ଼ାଃ ଗମ୍ବକେଆଃ ହିନ୍ତୁଃ ଦିପିଲି କାପେ ସାରିୟା, ଆୟୁବ୍ତାନ୍ରେ, ଚାହେ ଆଲାନିଦାରେ, ଚାହେ ସିମ୍ବକରାଃରେ, ଚାଏ ସେତାଃ ଇଦାନ୍ତେ । ୩୬ ଆଚକାଗି ଇନିଃ ତେବାଃକଃରେ ଦୁଡ଼ମ୍ପାକାନ୍ ଆଲକାଏ ନାମପେକା । ୩୭ ଆଇଙ୍ଗ୍ ଆପେକେ କାଜିୟାପେତାନ୍ କାଜି ସବେନ୍ଦକକେଇଙ୍ଗ୍ କାଜିୟାକତାନା, ଏୟନାକାନ୍ ତାଇନ୍ଦେ ।”

୧୪

ୟୀଶୁକେ ଗଜି ନାଗେନ୍ତେ ରଜୋଟ
(ମାଥୂଃ ୨୭:୧-୫; ଲୁକ ୨୨:୧-୨; ଯୋହାନ୍ ୧୧:୪୫-୫୩)

୧ ପାସ୍କା ପାରାବ୍ ଆଡ଼ଃ ସାବାଃ ହଲଙ୍ଗ୍ରାଃ ପାରାବ୍ ଏତେ ବାର୍ସିଙ୍ଗ୍ ସିଦା, ମୁଲ୍ ଯାଜାକ୍ ଆଡ଼ଃ ଆଇନ୍ ଇଡୁକ ଅକ ସେଣ୍ଟାତେ ଯୀଶୁକେକ ସାବିଆ ଆଡ଼ଃକ ଗଜିୟା ମେନ୍ତେ ହରାକ ଦାଣ୍ଟାତାନ୍ ତାଇକେନା । ୨ “ପାରାବ୍ ହୁଲାଇଦ୍ କାରୁଆଃ, କା'ରେଦ୍ ହଡ଼କ ହାଲାଗୁଲାଇୟାକ” ମେନ୍ଦକେଦା ।

ବେଥ୍ନିଆରେ ମିଆଁଦ୍ କୁଡ଼ି ଯୀଶୁଆଃ ବହଃରେ ସୁନ୍ମ୍ ଗସଗିତାନାଏ
(ମାଥୂଃ ୨୭:୬-୧୩; ଯୋହାନ୍ ୧୨:୧-୮)

୩ ☆ୟୀଶୁ ବେଥ୍ନିଆ ହାତୁରେ, ଶିମୋନ୍ ନାଗେଘାଅନିଆଃ ଅଡ଼ାଃରେ ତାଇକେନାଏ । ଜଜମ୍ ନାଙ୍ଗ୍ ଦୁବାକାନ୍ ଦିପିଲିରେ, ମିଆଁଦ୍ କୁଡ଼ି ପୁରାଃ ଫାର୍ଚି ଗନଙ୍ଗ୍ଆନ୍ ଜଟାମା'ସି ବୁଗିନ୍ ସହାନ୍

☆ ୧୩:୩୪ ୧୩:୩୪ ଲୁକ ୧୨:୩୬-୩୮. ☆ ୧୪:୩ ୧୪:୩ ଲୁକ ୭:୩୭,୩୮.

ସୁନ୍ଦୁମ୍ବେ ପେରେଜାକାନ୍ ପୁଣ୍ଡିଦିରିରାଃ ରୁକାଃ ସାବକେଦ୍ଦେ
 ବଲୟାନାଏ । ଇନିଃ ଏନ୍ ରୁକାଃରାଃ ଠିପି ଅଡ଼େଃକକେଦ୍ଦେ ଏନ୍
 ସୁନ୍ଦୁମ୍ ଯୀଶୁଆଃ ବହଃରେ ଦୁଲ୍ଲକେଦାଏ । ୪ ମେନ୍ଦ ଏନ୍ତାଃରେ
 ତାଇକେନ୍ ଚିମିନ୍ ହଡ଼କ ଏସେଦୟାନ୍ତେ ମେପେନ୍ୟାନାକ,
 “ଚିନାଃମେନ୍ତେ ନେ ବୁଗିନ୍ ସହାନ୍ ସୁନ୍ଦୁମ୍ ସାମାରେ ଦୁଲ୍ଲଏଣ୍ଟାଗଃତାନା
 ? ୫ ନେ ବୁଗିନ୍ ସହାନ୍ ସୁନ୍ଦୁମ୍କେଦ ମିଆଁଦ୍ ହଡ଼ରାଃ ମିଦ୍ବାରାଷ୍
 କାମିକାଦ୍ ନାଲା ସିକାଏତେ ଆଦ୍କା ଗନଙ୍ଗ୍ରେ ଆଖ୍ରିଙ୍ଗ୍
 ଦାଡ଼ିକାନ୍ତେୟାଃ ଆତଃ ରେଙ୍ଗେଃ ରାବାଙ୍ଗ୍କକେ ଏମାକାନ୍ତେୟାଃ
 ।” ଆତଃ ଇନ୍କୁ ଏନ୍ କୁଡ଼ିକେକ କୁରୁମ୍ ତୁରୁମ୍କିୟାଃ ।

୬ ମେନ୍ଦ ଯୀଶୁ ଇନ୍କୁକେ ମେତାଦ୍କଆଏ, “ଇନିଃକେ ତାଇନ୍
 ଚିକାଇପେ । ଚିନାଃ, ମେନ୍ତେପେ ଦୁକୁଇଚିତାନା ? ଆଇଙ୍ଗ୍
 ନାଗେନ୍ତେ ଇନିଃ ବୁଗିନ୍ କାମି ରିକାକାଦାଏ । ୭ ରେଙ୍ଗେଃ
 ରାବାଙ୍ଗ୍କଦ୍ ଜାନାଅ ଆପେଲଃକ ତାଇନା, ଆତଃ ଆପେୟାଃ
 ସାନାଙ୍ଗ୍ ଲେକା ଜା'ଇମ୍ତାଗି ଇନ୍କୁକେ ଦେଙ୍ଗାପେ ଦାଡ଼ିୟାକଆ,
 ମେନ୍ଦ ଆଇଙ୍ଗ୍ ଆପେଲଃ ସବେନ୍ ଇମ୍ତା କାଇଙ୍ଗ୍ ତାଇନାଃ
 । ୮ ନିଃ ଚିମିନାଙ୍ଗ୍ ଦାଡ଼ିୟାନାଏ ଇମିନାଙ୍ଗ୍ ରିକାକେଦାଏ,
 ଆଇଙ୍ଗ୍ ହାସାଗାଡ଼ାଅଃ ମେନ୍ତେ ସିଦାରେ ଆଇୟାଃ ହଡ଼ମ୍ରେ
 ନେ ସୁନ୍ଦୁମ୍କେ ଦୁଲ୍ଲକେଦାଏ । ୯ ସାର୍ତିଗିଙ୍ଗ୍ କାଜିୟାପେତାନା,
 ଅତେଦିଶୁମ୍ରେୟାଃ ଜାହାତାଃରେଗି ସୁକୁକାଜି ଉଦୁବଃତାନ୍ ଇମ୍ତା
 ଏନ୍ କୁଡ଼ି କାମିକାଦ୍ତେୟାଃ ପାହାମେ ନାଗେନ୍ତେ ଉଦୁବଃଆ ।”

ଇଷ୍ଟାରିୟଡ଼୍ ଯିହୁଦା ଯୀଶୁକେ ସାବ୍ରିକାଇ ନାଗେନ୍ତେ ଟାକା
 ନାମେତାନାଏ
 (ମାଥ୍ ୨୨:୧୪-୧୬; ଲୁକ ୨୨:୩-୬)

୧୦ ଏନ୍ତେ ଇଷ୍ଟାରିୟଡ଼୍ ଯିହୁଦା, ଗେଲ୍ବାର୍ ତେଲାଇଏତେ
 ମିଆଁଦ୍ନିଃ, ଯୀଶୁକେ ସାବ୍ରିକାଇ ମେନ୍ତେ ମୁଲ୍ ଯାଜାକ୍କକେ
 ସେନ୍ନାମ୍ କେଦ୍କଆଏ । ୧୧ ଇନ୍କୁଦ୍ ନେଆଁ ଆୟୁମ୍କେଦ୍ତେକ
 ରାସ୍ତାୟାନା, ଆତଃ ଟାକାଲେ ଏମାମେୟା ମେନ୍ତେ ଇନିଃକେକ
 ବାନାର୍ସା ଏମକିୟାକ । ଏନାମେନ୍ତେ ଯିହୁଦା ଇନ୍କୁଆଃ ତିଃଇରେ
 ଯୀଶୁକେ ସାବ୍ରିକାଇ ନାଗେନ୍ତେ ସୁୟୋଗ୍ ଦାଣ୍ଡାତାନାଏ ତାଇକେନା
 ।

ପାସକା ପାରାବ୍ରେୟାଃ ସାର୍ଜାମା ସେକାଡେନ୍
(ମାଥୂଉ ୨୭:୧୭-୨୫; ଲୁକ ୨୨:୭-୧୪, ୨୧-୨୩; ଯୋହାନ୍
୧୩:୨୧-୩୦)

୧୨ ସାବାଃ ହଲଙ୍ଗ୍ ପାରାବ୍ରେୟାଃ ସିଦା ହୁଲାଙ୍ଗ୍ରେ, ପାସକା
ପାରାବ୍ରେ ମିଶ୍ଟିହନ୍ ଦାଣ୍ଡୋଅଃ ତାଇକେନ୍ ହୁଲାଙ୍ଗ୍ ରେଲକ
ୟାଶୁକେକ କାଜିକିୟା, “ଆଲେ ଅକ୍ତାଃଲେ ସେନା ଆଡ଼ଃ ଆମାଃ
ନାଗେନ୍ତେ ପାସକା ପାରାବ୍ରେ ଜମେଆଃଲେ ବାଇୟା ମେନ୍ତେ
ସାନାଙ୍ଗ୍ତାନାମ୍ ?”

୧୩ ଏନ୍ତେ ଯାଶୁ ବାହୁଡ୍, ରେଲକିନ୍କେ କୁଲ୍ତାନଲଃ
ମେତାଦକିନାଏ, “ନାଗାର୍ତେ ସେନସବେନ୍ ଆଡ଼ଃ, ମିଆଁଦ୍
ହଡ୍ ଦାଆଃଟାଟୁ ତେଙ୍ଗଃକେଦ୍ତେ ଦାରମ୍ବେନାଏ, ଇନିଃକେ
ଅଡ଼ଙ୍ଗ୍ଲବେନ୍ । ୧୪ ଆଡ଼ଃ ଇନିଃ ବଲଃ ଅଡ଼ାଃରେନ୍ ଗମ୍ବେ
କେ ମେତାଇବେନ୍, ଇଡୁନିଃ କୁଲିତାନାଏ, ଆଇଁୟାଃ ରେଲକଲଃ
ପାସକା ପାରାବ୍ରେ ଜମେ ନାଗେନ୍ତେ ବାଖୁରା ଅକ୍ତାଃରେୟା ?
୧୫ ଏନ୍ତେ ଇନିଃ ରେତାନ୍ ଅଡ଼ାଃରେ ମିଆଁଦ୍ ବାଇସେକାଡ଼ାକାନ୍
ମାରାଙ୍ଗ୍ ବାଖୁରା ଉଡୁବାବେନାଏ, ଏନାରେଗି ଆବୁ ନାଗେନ୍ତେ
ଜମେନାଙ୍ଗ୍ ବାଇୟେବେନ୍ ।”

୧୬ ରେଲକିନ୍ ନାଗାର୍ତେକିନ୍ ସେନସୟାନା, ଆଡ଼ଃ ଯାଶୁ
କାଜିୟାଦକିନ୍ ଲେକାଗି ସବେନାଃକିନ୍ ନାମ୍ବେଦାଃ ଆଡ଼ଃ ପାସକା
ପାରାବ୍ରେୟାଃ ଜମେୟାଃକିନ୍ ବାଇକେଦାଃ ।

୧୭ ଆୟୁବ୍ୟାନ୍ତି ଯାଶୁ ଗେଲ୍ବାର୍ ରେଲକଲଃ
ତେବାଃୟାନାଏ । ୧୮ ଇନ୍କୁ ଜମ୍ ଦୁବାକାନ୍ ଦିପିଲିରେ, ଯାଶୁ
ମେତାଦକଆଏ, “ସାର୍ତିଗିଙ୍ଗ୍ କାଜିୟାପେତାନା, ଆପେକଏତେ
ମିଆଁଦ୍ନିଃ ଆଇଙ୍ଗ୍ଲଃ ଜମ୍ତାନ୍ନିଃଗି ବାଇରିକଆଃ ତିଃଇରେ
ସାବ୍ରିକାଇଙ୍ଗ୍ୟାଏ ।”

୧୯ ରେଲକଦ ହୁଡିଙ୍ଗ୍ଜୀଉୟାନାକ, ଆଡ଼ଃ ମିହୁଡ୍, ମିହୁଡ୍ତେ
କାଜିକିୟାକ, “ଇନିଃ ଆଇଙ୍ଗ୍ ତାନିଙ୍ଗ୍ତି ?”

୨୦ ଯାଶୁ ମେତାଦକଆଏ, “ବାରାଝାନ୍ କଏତେ ମିଆଁଦ୍ନିଃ,
ଆଇଁୟାଃଲଃ ମିଆଁଦ୍ କାଟୋରାରେ ଆୟାଃ ତିଃଇ ସୁଡ଼ଃକାଦ୍ନିଃଗି
ସାବ୍ରିକାଙ୍ଗ୍ଆଏ । ୨୧ ପାବିତାର୍ ଅନଲ୍କରେ ଅଲ୍ଲାକାନ୍ ଲେକା,
ଆଇଙ୍ଗ୍ ମାନଝାହନ୍ ତାନିଙ୍ଗ୍, ଆଇଙ୍ଗ୍କେ ଗଜଃଲ୍ଲାଗାତିୟାଃ ।

ମେନ୍ଦ ଆଇଙ୍ଗ୍ ମାନଝାହନ୍ ତାନିଙ୍ଗ୍, ଆଇଙ୍ଗ୍‌କେ ବାଇରିକଆଃ ଡିଃଇରେ ସାବ୍‌ରିକାନିଃ ହାୟ୍ ହାୟ୍ ଚିମିନ୍ ଦୁକୁନାମେୟାଏ । ଏନ୍ ହଡ୍ କାଏ ଜାନାମ୍‌କାନ୍‌ରେଦ୍ ଇନିଃ ନାଗେନ୍ତେ ବୁଗିନ୍ ହବାକାନ୍‌ଡେୟାଃ ।”

ପ୍ରାଭୁ ଭୋଜ୍

(ମାଥ୍‌ଉ ୨୭:୨୭-୩୦; ଲୁକ ୨୨:୧୪-୨୦; ୧ କରିନ୍ଥ୍‌ୟ ୧୧:୨୩-୨୫)

୨୨ ଇନ୍‌କୁ ଜମତାନ୍ ଦିପିଲିରେ, ଯୀଶୁ ମିଆଁଦ୍ ହଲଙ୍ଗ୍‌କେ ସାବ୍‌କେଦ୍‌ଡେ ଧାନାବାଦ୍ ଏମ୍‌କେଦାଏ ଆଡ଼ଃ କେଟାଃକେଦ୍‌ଡେ ଚେଲ୍‌କାକେ ଏମ୍‌କେଦ୍‌ଡେ ମେତାଦ୍‌କଆଏ, “ନେ ମାର୍ ଡେଲ୍‌ଏପେ, ନେଆଁ ଆଇଁୟାଃ ହଡ୍‌ମ ତାନାଃ ।”

୨୩ ଏନ୍ତେ ଇନିଃ କାଟୋରା ଇଦିକେଦ୍‌ଡେ ବିନ୍ତିକେଦାଏ ଆଡ଼ଃ ଏମାଦ୍‌କଆଏ, ଆଡ଼ଃ ଇନ୍‌କୁ ଏନାଏଡେକ ନୁଁକେଦାଃ ।

୨୪ ଆଡ଼ଃ ଯୀଶୁ ମେତାଦ୍‌କଆଏ, “ନେଆଁ ଆଇଁୟାଃ ମାୟୋମ୍ ତାନାଃ, ମାନଝାରାଃ ପାପ୍ ଛାମା ନାଗେନ୍ତେ ଆଇଙ୍ଗ୍ ଆଇଁୟାଃ ଅକ ମାୟୋମ୍‌କେ ଲିଙ୍ଗି ନାଗେନ୍ତେ ସେନ୍‌ତାନାଇଙ୍ଗ୍, ଏନା ପାର୍‌ମେଶ୍‌ବାର୍‌ଆଃ ରାଜିନାମାକେ ମୋହ୍‌ରକାଦା ।” ୨୫ ଆଇଙ୍ଗ୍ ସାବ୍‌ଡିଗିଙ୍ଗ୍ କାଜିୟାପେତାନା, “ପାର୍‌ମେଶ୍‌ବାର୍‌ଆଃ ରାଇଜ୍‌ରେ ନାଝା ଦାଖ୍‌ରାସି ଆଉରିଙ୍ଗ୍ ନୁଁଇ ଜାକେଦ୍, ଦାଖ୍‌ଜ'ରାଃ ରାସି ଆଡ଼ଃ ଚିଉଲ୍‌ଆ କାଇଙ୍ଗ୍ ନୁଁଇଆ ।”

୨୬ ଏନ୍ତେ ଇନ୍‌କୁ ମାଇନାନ୍ ଦୁରାଙ୍ଗ୍ ଦୁରାଙ୍ଗ୍‌କେଦ୍‌ଡେ ଜାଇତୁନ୍ ବୁରୁଡେକ ସେନଃୟାନା ।

ଆଇଙ୍ଗ୍‌କେ କାଇଙ୍ଗ୍ ସାରିଆଃମେନ୍ତେ ପାଡ୍‌ରାସ୍‌କେ ଯୀଶୁ ସିଦାରେ କାଜିୟାଇତାନା

(ମାଥ୍‌ଉ ୨୭:୩୧-୩୫; ଲୁକ ୨୨:୩୧-୩୫; ଯୋହାନ୍ ୧୩:୩୬-୩୮)

୨୭ ଯୀଶୁ ଇନ୍‌କୁକେ ମେତାଦ୍‌କଆଏ, “ଆପେ ସବେନ୍‌କ ନେ ନିଦାରେ ଆଇଙ୍ଗ୍‌କେ ବାଗିକେଦ୍‌ଡେ ନିର୍‌କଆଃପେ, ନେଆଁଦ୍ ଧାରାମ୍‌ପୁଥ୍‌ରେ ଅଲ୍‌କାନା, ‘ପାର୍‌ମେଶ୍‌ବାର୍ ଗୁପିନିଃକେ ଦାଲିୟାଏ ଆଡ଼ଃ ଗୋଟ୍‌ରେନ୍ ମିଶ୍ଟିକ ଛିତିବିତିୟାଃଆ ।’ ୨୮ *ମେନ୍‌ଦ୍ ଆଇଙ୍ଗ୍

☆ ୧୪:୨୮ ୧୪:୨୮ ମାଥ୍‌ଉ ୨୮:୧୭.

ଜୀଉବିରିଦ୍‌କେଦ୍‌ତେ ଗାଲିଲ୍‌ତେ ଆପେଏତେ ଆୟାର୍‌ରେଇଙ୍ଗ୍ ସେନା ।”

୨୯ ପାଡ଼ରାସ୍ କାଜିରୁହାଡ଼କିୟାଏ “ଏଟାଃକ ବାଗିତାମ୍‌ରେହ୍, ଆଇଙ୍ଗ୍ କାଇଙ୍ଗ୍ ବାଗିମେଆ ।”

୩୦ ଯୀଶୁଦ୍ ପାଡ଼ରାସ୍‌କେ ମେତାଇୟାଏ, “ସାର୍‌ଡିଗିଙ୍ଗ୍ କାଜିୟାମ୍‌ତାନା, ତିସିଙ୍ଗ୍, ନେ ନିଦାରେ ସାଣ୍ଡିସିମ୍ ବାର୍‌ସା ରାଆଃଏ ସିଦାରେ ଆଇଙ୍ଗ୍‌କେ କାଇଙ୍ଗ୍ ସାରିୟା ମେନ୍ତେ ଆପିସାମ୍ କାଜିୟା ।”

୩୧ ପାଡ଼ରାସ୍ ଆଡ଼ଃଗି ପୁରାଃତେ କାଜିକିୟାଏ, “ଆମ୍‌ଲଃ ଗଜଃ ଲାଗାଡିଙ୍ଗ୍‌ରେଅ ଆଇଙ୍ଗ୍ ଆମ୍‌କେ କାଇଙ୍ଗ୍ ସାରିଆଃ ମେନ୍ତେ କାଇଙ୍ଗ୍‌ଗି କାଜିୟା ।” ଆଡ଼ଃ ଏନ୍‌ଲେକା ସବେନ୍ ଏଟାଃ ତେଲାଇହଗି କାଜିକେଦାଃକ ।

**ଗେଥ୍‌ସିମାନି ବାଖଡ଼ିରେ ଯୀଶୁ ବିକ୍ରିତାନାଏ
(ମାଥୁଉ ୨୬:୩୬-୪୬; ଲୁକ ୨୨:୩୯-୪୬)**

୩୨ ଗେଥ୍‌ସିମାନି ନୁତୁମ୍ ଠାୟାଦ୍‌ତେକ ତେବାଃକେଦ୍‌ତି, ଯୀଶୁ ଆୟାଃ ତେଲାଇକେ ମେତାଦ୍‌କଆଏ, “ଆଇଙ୍ଗ୍ ବିକ୍ରି ଜାକେଦ୍ ନେତାଃରେ ଦୁବାକାନ୍‌ପେ ।” ୩୩ ଇନିଃ ପାଡ଼ରାସ୍, ଯାକୁବ୍, ଆଡ଼ଃ ଯୋହାନ୍‌କେ ଆୟାଃଲଃ ଇଦିକେଦ୍‌କଆଏ । ଆଡ଼ଃ ଇନିଃ ପୁରାଃଗି ଦୁକୁତେ ଆକୁଲ୍‌ବାକୁଲ୍‌ୟାନା । ୩୪ ଆଡ଼ଃ ଇନିଃ ଇନ୍‌କୁକେ କାଜିୟାଦ୍‌କଆଏ, “ଜୀଉତାଇୟାଃ ଗଜଃଲେକା ଦୁକୁଃତାନା, ନେତାଃରେଗି ତାଇନ୍‌କାନ୍‌ପେ ଆଡ଼ଃ ଆଇଁୟାଃଲଃ ଏୟନାକାନ୍ ତାଇନ୍‌ପେ ।”

୩୫ ଯୀଶୁ କାଟିଃ ସାଜିନ୍ ସେନ୍‌କେଦ୍‌ତେ ଅତେରେ ଇକ୍‌ଡ଼ୁୟାନ୍‌ଲଃ ଅମ୍ବାଃୟାନାଏ ଆଡ଼ଃ ବିକ୍ରିକେଦାଏ, “ହବାଦାଡ଼ିୟଃରେଦ୍ ନେ ଦୁକୁ ଦିପିଲି ଆଇଙ୍ଗ୍‌ତାଃଏତେ ପାରମଃକା ।” ୩୬ ଇନିଃ ବିକ୍ରିରେ ମେନ୍‌କେଦା, “ହେ ଆବା, ହେ ଆପୁ, ଆମାଃତେ ସବେନାଃ ହବାଦାଡ଼ିଅଃଆ । ନେ ଦୁକୁ କାଟୋରାକେ ଆଇଙ୍ଗ୍‌ଏତେ ଆଡ଼ମ୍‌ତାମ୍; ଇମିନ୍‌ରେଅ ଆଇଁୟାଃ ସାନାଙ୍ଗ୍‌ଲେକାଦ୍ କାହାଗି, ମେନ୍‌ଦ୍ ଆମାଃ ସାନାଙ୍ଗ୍ ଲେକାଗି ହବାଅଃକା ।”

୩୭ ଏନ୍ତେ ଇନିଃ ଆୟାଃ ତେଲାଇକତାଃ ରୁହାଡ଼ିୟାନ୍‌ତି ଇନ୍‌କୁକେ ଦୁଡ଼ମ୍ବାକାନ୍ ନାମ୍‌କେଦ୍‌କଆଏ । ଇନିଃ ପାଡ଼ରାସ୍‌କେ କାଜିକିୟାଏ, “ଏ ଶିମୋନ୍, ଦୁଡ଼ମ୍ବା ତାନାମ୍ ତି ? ମିଦ୍ ଘାଣ୍ଟାଅତି ଏୟନାକାନ୍

କାମ୍‌ତାଇନ୍ ଦାଡ଼ିୟାନା ?” ୩୮ ଆଡ଼ଃ ଇନିଃ କାଜିକେଦକଆଏ, “ବିଡ଼ାଅରେ ଆଲ୍‌ଦେ ଉୟୁଗଃକା ମେନ୍ତେ ଏୟନାକାନ୍ ତାଇନ୍‌ଦେ ଆଡ଼ଃ ବିନ୍ତିଦେ । ଆମ୍‌ଦ ସାନାଙ୍ଗ୍‌ତାନାଏ, ମେନ୍‌ଦ ହଡ଼୍‌ମ ନାରାଦୁରାଗିଆଃ ।”

୩୯ ଇନିଃ ଆଡ଼ଃଗି ସେନଃୟାନାଏ, ଆଡ଼ଃ ସିଦାଲେକାଗି ବିନ୍ତିକେଦାଏ । ୪୦ ଏନ୍ତେ ଇନିଃ ହିଜୁଃରୁହାଡ଼୍‌ଲେନାଏ ଆଡ଼ଃ ଚେଲାକକେ ଆଡ଼ଃମିସା ଦୁଡ଼୍‌ମୁକାନାଏ ନାମ୍‌କେଦକଆ, ଚିୟାଃଟି ଇନ୍‌କୁ ଦୁଡ଼୍‌ମୁତେ ମେଦ୍‌ତାକଆଃ ଆରିଦ୍ କାକ ଦାଡ଼ିତାନ୍‌ତାଇକେନା । ଇନିଃକେ ଚିନାଃରୁ କାଜିରୁହାଡ଼୍‌କିୟା ମେନ୍ତେ ଇନ୍‌କୁ କାକ ସାରିକେଦା ।

୪୧ ଆଡ଼ଃ ଇନିଃ ଆପିସା ରୁହାଡ଼୍‌ୟାନ୍‌ଚି, ଇନ୍‌କୁକେ କାଜିୟାଦକଆଏ, “ନାହ୍‌ଞ୍ଚି ଜାକେଦ୍‌ଚିଦେ ଦୁଡ଼୍‌ମୁତାନା ଆଡ଼ଃ ରୁଡୁନ୍‌ତାନା ? ଇମ୍‌ନାଙ୍ଗ୍‌ଗି ! ନେଡ଼ା ତେବାଃୟାନା, ନେଲେଦେ, ଆଇଙ୍ଗ୍ ମାନଃହନ୍ ପାପିକଆଃ ତିଃଇରେ ସାବ୍‌ରିକାଅଃତାନାଇଙ୍ଗ୍ । ୪୨ ବିରିଦ୍‌ଦେ, ଦଲାରୁ ସେନଆଃ ! ନେଲିଦେ, ଆଇଙ୍ଗ୍‌କେ ସାବ୍‌ରିକାଇଙ୍ଗ୍‌ନିଃ ସେଟେରାକାନାଏ ।”

ୟୀଶୁକେକ ସାବିତାନା

(ମାଥ୍‌୨ ୨୭:୪୭-୫୨; ଲୁକ ୨୨:୪୭-୫୩; ଯୋହାନ୍ ୧୮:୩-୧୨)

୪୩ ଯୀଶୁ ଜାଗାର୍‌ତାନ୍ ତାଇକେନ୍ ଇମ୍‌ତାଗି ଯିହୁଦା, ବାରାଝାନ୍‌କଏତେ ମିଆଁଦ୍‌ନିଃ ତେବାଃୟାନାଏ । ଇନିଃଲଃ ମୁଲ୍ ଯାଜାକ୍‌କ, ଆଇନ୍ ଇତୁକ ଆଡ଼ଃ ପ୍ରାଚିନ୍‌କ ସାଃଏତେ କୁଲାକାନ୍ ଗାଦେଲ୍ ହଡ଼କ ତାରାଉଡ଼ିକ ଆଡ଼ଃ ଭଙ୍ଗାଟ୍‌କ ସାବ୍‌କେଦ୍‌ତେ ହିଜୁଃୟାନାକ । ୪୪ ଯୀଶୁକେ ସାବ୍‌ରିକାନିଃ ଏନ୍ ଗାଦେଲ୍ ହଡ଼କକେ ମିଆଁଦ୍ ଚିହ୍ନାଁ ଏମାକାଦକ ତାଇକେନାଏ, “ଆଇଙ୍ଗ୍ ଅକ୍‌ନିଃକେ ଚଅଃଇଙ୍ଗ୍, ଇନିଃଗି ଯୀଶୁ ତାନିଃ । ଇନିଃକେ ସାବିଦେ ଆଡ଼ଃ ଚିର୍ଗାଲ୍‌ତେ ଇଦିଦେ” ମେନ୍ତେ ସିଦାରେ କାଜିକାଦକ ତାଇକେନାଏ ।

୪୫ ଯିହୁଦା ତେବାଃୟାନ୍‌ଚି, “ହେ ଗୁରୁ” ମେତାଇତାନ୍‌ଲଃ ଇନିଃକେ ଚଅଃକିୟାଏ । ୪୬ ଆଡ଼ଃ ଇନ୍‌କୁ ଯୀଶୁକେ ସାବ୍‌କେଦ୍‌ତେ ତଲ୍‌କିୟାଃକ । ୪୭ ଜାପାଃରେ ତିଙ୍ଗୁଆକାନ୍‌ଏତେ ମିଆଁଦ୍‌ନିଃ ତାରାଉଡ଼ି ଅତଙ୍ଗ୍‌କେଦାଏ ଆଡ଼ଃ ମାରାଙ୍ଗ୍ ଯାଜାକ୍‌ରାଃ ଦାସିକେ

ମାଆଃକିୟାଏ ଆଡ଼ଃ ଇନିୟାଃ ମିଆଁଦ୍ ଲୁତୁର୍ ହାଦତାଦାଏ ।
 ୪୮ ଏନ୍ତେ ଯୀଶୁ ପୁରାଃ ହଡ଼କକେ କାଜିୟାଦକଥାଏ, “ତିୟାଃ, ମିଆଁଦ୍
 କୁମୁଡ଼ତୁଲେକା ସାବିଙ୍ଗ୍ ନାଗେନ୍ତେ ତାରାଉଡ଼ିକ ଆଡ଼ଃ ଭଙ୍ଗାଟକ
 ସାବକେଦତେ ହିଜୁଃକାନାପେ ? ୪୯ ✱ସବେନ୍ ହୁଲାଇଁ ଆଇଙ୍ଗ୍
 ମାନ୍ଦିର୍ ଅଡ଼ଃରେ ଇତୁତାନ୍ଲଃ ଆପେଲଃ ତାଇକେନାଇଙ୍ଗ୍
 ଆଡ଼ଃ ଆପେ କାପେ ସାବକେଦିୟାଃ । ମେନ୍ଦ୍ ଧାରାମ୍ପୁଥୁରେ
 ଅଲାଇନ୍ତେୟାଃ ପୁରାଅଃକା ମେନ୍ତେ ନେ ସବେନାଃ ହବାଅଃଡ଼ାନା
 ।”

୫୦ ଏନ୍ତେଦ ଆୟାଃ ସବେନ୍ ତେଲାଇ ଇନିଃକେ ନିର୍ବାଗିକିୟାଃକ
 ।

୫୧ ମିଆଁଦ୍ ଧାଙ୍ଗଡ଼ା ଇନିଃକେ ଅତଙ୍ଗକିୟା, ଇନିଃ ସାମା ହଡ଼ମରେ
 ନିରାଲ୍ ଲିଜାଃ* ଉୟୁକାନ୍ ତାଇକେନାଏ, ତିମ୍ତା ସିପାଇକ
 ଧାଙ୍ଗଡ଼ାକେ ସାବ୍ ନାଗେନ୍ତେକ ହିଜୁଃୟାନା, ୫୨ ଇନିଃ ଆୟାଃ
 ନିରାଲ୍ ଲିଜାଃ ବାଗିକେଦତେ, ଇନିଃ ସାମାହଡ଼ମ ନିର୍ୟାନାଏ ।

ୟୀଶୁ ମାରାଙ୍ଗ୍ ଯାଜାକ୍‌କଥାଃ ପାଞ୍ଚେଟ୍‌ରେ

(ମାଥୁ ୨୬:୫୭-୬୮; ଲୁକ ୨୨:୫୪-୫୫, ୬୩-୭୧; ଯୋହାନ୍
 ୧୮:୧୩-୧୪, ୧୯-୨୪)

୫୩ ଏନ୍ତେ ଇନ୍‌କୁ ଯୀଶୁକେ ମାରାଙ୍ଗ୍ ଯାଜାକ୍‌କତାଃ ଇଦିକିୟାଃକ
 । ଏନ୍ତାଃରେ ମୁଲ୍ ଯାଜାକ୍‌କ, ପ୍ରାଚିନ୍‌କ ଆଡ଼ଃ ଆଇନ୍ ଇତୁକ
 ହୁଣ୍ଡିୟାନା । ୫୪ ପାଡ଼ରାସ୍ ସାଙ୍ଗିନ୍‌ଏତେ ମାରାଙ୍ଗ୍ ଯାଜାକ୍‌କଥାଃ
 ଅଡ଼ଃରାଚା ଜାକେଦ୍ ଅତଙ୍ଗ୍ ଇଦିକିୟାଏ । ଏନ୍ତାଃରେ ଇନିଃ
 ହରହଡ଼କଲଃ ଦୁବକେଦତେ ସେଙ୍ଗେଲ୍ ଜୁରୁବ୍‌ତାନ୍ ତାଇକେନାଏ ।
 ୫୫ ମୁଲ୍ ଯାଜାକ୍‌କ ଆଡ଼ଃ ପାଞ୍ଚେଟ୍‌ରେନ୍ ସବେନ୍‌କ ଯୀଶୁକେ ଗଜି
 ନାଗେନ୍ତେ ଗାଞ୍ଜାକ ଦାଣ୍ଠାବାଡ଼ା ତାଇକେନା, ମେନ୍ଦ୍ ଏନା କାକ ନାମ୍
 ଦାଡ଼ିକେଦା । ୫୬ ପୁରାଃ ହଡ଼କ ଇନିୟାଃ ବିରୁଧ୍‌ରେ ହସଡ଼ ଗାଞ୍ଜାକ
 ଏମ୍‌କେଦାଃ, ମେନ୍ଦ୍ ଇନ୍‌କୁଆଃ ଗାଞ୍ଜାକ ମିଦ୍‌ଲେକା କା ତାଇକେନା
 ।

୫୭ ଏନ୍ତେ ତିମିନ୍ ହଡ଼କ ତିଙ୍ଗୁୟାନାକ, ଆଡ଼ଃ ଯୀଶୁଆଃ ବିରୁଧ୍‌ରେ
 ନେ ହସଡ଼ ଗାଞ୍ଜାକ ଏମ୍‌କେଦାଃ : ୫୮ ✱“ହଡ଼କଥାଃ ତିଃଇତେ
 ବାଇୟାକାନ୍, ନେ ମାନ୍ଦିର୍‌କେ ହାଦୁଡ଼େଆଇଙ୍ଗ୍, ଆଡ଼ଃ ଆପିମାରେ,

✱ ୧୪:୪୯ ୧୪:୪୯ ଲୁକ ୧୯:୪୭; ୨୧:୩୭.
 ପାଢ଼ଲାଗାଦାର୍ ✱ ୧୪:୫୮ ୧୪:୫୮ ଯୋହାନ୍ ୨:୧୯.

* ୧୪:୫୧ ୧୪:୫୧ ପୁଣ୍ଡିଲିଜାଃ.

ହତକଥାଃ ତିଃଇତେ କା ବାଇୟାକାନ୍ ମାନ୍ଦିରକେ ତିଞ୍ଜୁୟାଈଙ୍ଗ୍ ମେନ୍ତେ ନିଃକେ କାଜିତାନ୍ଲେ ଆୟୁମ୍ବକିୟା ।”^{୫୯} ମେନ୍ଦଦ ଇନ୍ଦୁଆଃ ନେ କାଜିକରାଃ ଗାଞ୍ଜାକ କା ମିଦ୍‌ୟାନା ।

^{୬୦} ଏନ୍ତେ ମାରାଙ୍ଗ୍ ଯାଜାକ୍, ସବେନ୍ଦକଥାଃ ସାମ୍‌ନାଙ୍ଗ୍‌ରେ ତିଞ୍ଜୁକେଦ୍‌ତେ ଯୀଶୁକେ କୁଲିକିୟାଏ, “ନେ ହତକ ଆମାଃ ବିରୁଧ୍‌ରେ ଗାଞ୍ଜାକ ଏମ୍‌କେଦାଃ, ତିୟାଃ ଆମ୍ ଜେଡ୍‌ନାଃ କାମ୍‌କାଜି ରୁହାଡ୍‌ତେତାନା ?”

^{୬୧} ମେନ୍ଦଦ ଯୀଶୁ ହାପାକାନ୍ ତାଇକେନାଏ ଆତଃ ଜେଡ୍‌ନାଃ କାଏ କାଜିରୁହାଡ୍‌କେଦା । ଆତଃଗି ମାରାଙ୍ଗ୍ ଯାଜାକ୍ ଇନିଃକେ କୁଲିକିୟାଏ, “ଆମ୍‌ଗି ତି ଶ୍ରୀଷ୍ଟ୍, ପାର୍‌ମେଶ୍‌ବାରାଃ ହନ୍ ତାନ୍‌ମେ, ଅକଏୟାଃଟି ସବେନ୍ ମାଇନାନ୍ ତାନାଃ ?”

^{୬୨} ଯୀଶୁ ମେତାଇୟାଏ, “ଆଇଙ୍ଗ୍‌ଗି ତାନିଙ୍ଗ୍ । ଆଇଙ୍ଗ୍ ମାନଞ୍ଜାହନ୍ ସବେନ୍ ପେଡ୍‌ୟାନ୍‌ନିୟାଃ ଜମ୍‌ତିସାଃରେ ଦୁବାକାନ୍ ଆତଃ ସିର୍ମାରାଃ ରିମିଲ୍‌ରେ ଆଡ୍‌ଗୁନ୍‌ତାନ୍‌ପେ ନେଲିଙ୍ଗ୍‌ୟା ।”

^{୬୩} ଏନ୍ତେ ମାରାଙ୍ଗ୍ ଯାଜାକ୍, ଆୟାଃ ଲିଜାଃ ଚାଗାଡ୍‌କେଦାଏ । “ଆବୁକେ ଆତଃ ତିକାନ୍ ଗାଞ୍ଜା ଲାଗାତିୟାଃ ?” ମେନ୍ତେ ଇନିଃ କୁଲିକେଦକଥାଏ । ^{୬୪} “ଆପେଦ ପାର୍‌ମେଶ୍‌ବାରାଃ ନିୟାକାଜିପେ ଆୟୁମ୍‌କେଦା । ତିନାଃପେ ବିଚାରେତାନା ?”

ସବେନ୍ଦକ ଇନିୟାଃ ବିରୁଧ୍‌ରେ କାଜିକେଦାଃକ ତି ଇନିଃକେ ଗନଏଃ ସାଜାଇ ଏମଃ ଲାଗାତିଙ୍ଗ୍‌ୟାଃ ।

^{୬୫} ଏନ୍ତେ ତିମିୟାଙ୍ଗ୍‌କ ଯୀଶୁକେ ବେଏକ୍‌କିୟାଃକ, ଆତଃ ଇନିୟାଃ ମେଦ୍ ହାରୁବ୍‌କେଦ୍‌ତେ ଦାଲିତାନ୍‌ଲଃ କାଜିକିୟାଃକ, “ଆମ୍ ପରେ ନାବୀ ତାନ୍‌ମେ, ମାର କାଜିଲେମେ, ଅକଏ ଦାଲ୍‌ମେତାନାଏ ।” ଆତଃ ହରହତକ ଇନିଃକେ ସାବ୍‌କେଦ୍‌ତେ ଆପ୍‌ଡ୍‌କିୟାଃକ ।

ପାଡ୍‌ରାସ୍ ଯୀଶୁକେ କାଇଙ୍ଗ୍ ସାରିଆଃ ମେନ୍ତେ କାଜିତାନାଏ
(ମାଥୁର ୨୭:୨୯-୩୫; ଲୁକ ୨୨:୫୭-୬୨; ଯୋହାନ୍ ୧୮:୧୫-୧୮, ୨୫-୨୭)

^{୬୬} ତିମ୍‌ତା ପାଡ୍‌ରାସ୍ ଲାଡାର୍ ଅଡ଼ାଃରାଚାରେ ତାଇକେନ୍‌ରେ, ମାରାଙ୍ଗ୍ ଯାଜାକ୍‌ରାଃ ମିଆଁଦ୍ କାମ୍‌ଡିକୁଡି† ହିଜୁଃୟାନାଏ ।

† ୧୪:୭୭ ୧୪:୭୭ ଦାସିକୁଡି

୭୭ ଆଡ଼ଠା ପାତ୍ରରାସ୍ତାକୁ ଜୁରୁବତାନ୍ ନେଲକିୟାଏ, ଇନିଃକେ ଆରିଦବାଇକେଦ୍‌ତେ ମେତାଇୟାଏ, “ଆମ୍‌ଅଗି ନାଜ୍‌ରେଡ୍‌ରେନ୍, ଯୀଶୁଲିଃ ତାଇକେନାମ୍ ।”

୭୮ ମେନ୍‌ଦ ଇନିଃ କାହାଗି ମେନ୍‌କେଦ୍‌ତେ, କାଜିରୁହାଡ୍‌କେଦାଏ, “ଆଇଙ୍ଗ୍ ଇନିଃକେ କାଇଙ୍ଗ୍ ସାରିୟା । ଆମ୍ ଚିନାଃମ୍ କାଜିତାନା ଆଇଙ୍ଗ୍ କାଇଙ୍ଗ୍ ମୁଣ୍ଡିଅଃତାନାଃ ।” ଏନ୍ତେ ଇନିଃ ବଲଃଦୁଆରତେ ସେନଃୟାନାଏ, ଇମ୍‌ତାଗି ସାଣ୍ଡିସିମ୍ ରାଆଃକେଦାଏ‡ ।

୭୯ ଆଡ଼ଠାମିସା କାମ୍‌ଡିକ୍‌କ୍‌ଡି ଇନିଃକେ ନେଲକିଃତେ, ଜାପାଃକରେ ତିଙ୍ଗୁଆକାନ୍ ହଡକକେ ମେତାଦକଆଏ, “ନିଃଇହ ଇନ୍‌କୁଏତେ ମିଆଁଦ୍‌ନିଃ ତାନିଃ ।” ୭୦ ମେନ୍‌ଦ ପାତ୍ରରାସ୍ ଆଡ଼ଠା “କାହାଗି” ମେନ୍‌କେଦାଏ ।

ଘାଡ଼ିକାଦ୍ ତାୟମ୍‌ତେ ଏନ୍ତାଃରେ ତିଙ୍ଗୁଆକାନ୍‌କ ପାତ୍ରରାସ୍‌କେକ କାଜିକିୟା, “ସାଡ୍‌ତିଗି, ଆମ୍ ଇନ୍‌କୁଏତେ ମିଆଁଦ୍‌ନିଃ ତାନମେ, ଚିୟାଃଚି ଆମ୍‌ଅଗି ଗାଲିଲରେନ୍ ତାନମେ ।”

୭୧ ଏନ୍ତେ ପାତ୍ରରାସ୍ କିରିୟା ଜମ୍‌କେଦ୍‌ତେ କାଜିକେଦାଏ, “ଆପେ କାଜିତାନ୍ ନେ ହଡକେ ଆଇଙ୍ଗ୍ କାଇଙ୍ଗ୍ ସାରିଆଃ ।”

୭୨ ଏନ୍ତେ ଇମ୍‌ତାଙ୍ଗିଗି ସାଣ୍ଡିସିମ୍ ବାଡ୍‌ସାଏ ରାଆଃକେଦାଃ, ଆଡ଼ଠା “ସାଣ୍ଡିସିମ୍ ବାଡ୍‌ସା ଆଡ଼ରି ରାଆଃ ସିଦାରେ ଆପିସା ଆଇଙ୍ଗ୍‌କେ କାଇଙ୍ଗ୍ ସାରିଆ ମେନ୍ତେ କାଜିୟାମ୍,” ଏନା ଯୀଶୁ କାଜିଲେଦ୍‌କାଜି ପାତ୍ରରାସ୍ ପାହାମ୍‌କେଦାଏ । ଆଡ଼ଠା ଇନିଃ କୁସୁଦ୍ କୁସୁଦ୍‌ତାନ୍ ରାଆଃକେଦାଏ ।

୧୪

ପିଲାତୁସ୍‌ରାଃ ସାମ୍‌ନାଙ୍ଗ୍‌ରେ ଯୀଶୁ

(ମାଥୂ ୨୭:୧-୨, ୧୧-୧୪; ଲୁକ ୨୩:୧-୫; ଯୋହାନ୍ ୧୮:୨୮-୩୮)

୧ ଆଙ୍ଗ୍‌ୟାନଲଃଗି ମୁଲ୍ ଯାଜାକ୍‌କ, ପ୍ରାଚିନ୍‌କଲଃ, ଆଇନ୍ ଇଡୁକଲଃ ଆଡ଼ଠା ପାଞ୍ଚେଟ୍‌ରେନ୍ ସବେନ୍‌କଲଃକ ରଜୋଟକେଦା । ଇନ୍‌କୁ ଯୀଶୁକେ ତଲ୍‌କେଦ୍‌ତେକ ଇଦିକିୟା, ଆଡ଼ଠା ପିଲାତୁସ୍‌ରାଃ ତିଃଇରେ ଏମ୍‌କିୟାକ । ୨ ପିଲାତୁସ୍ ଇନିଃକେ, “ଆମ୍‌ଗିଚି ଯିହୁଦୀକଆଃ ରାଜା ତାନମେ?” ମେନ୍ତେ କୁଲିକିୟାଏ ।

‡ ୧୪:୭୮ 14:68 ଚିନିନ୍ ମାଗି ଅନଲକରେ, ଇମ୍‌ତାଗି ସାଣ୍ଡିସିମ୍ ରାଆଃକେଦାଏ, ମେନ୍ତେୟାଃ ବାନଃଆ

ୟୀଶୁ ମେନ୍‌ରୁହାଡ଼ାଇୟାଏ, “ହଁ, ଆମ୍‌ଗିମ୍‌ କାଜିତାନା ।”

୩ ମୁଲ୍‌ ଯାଜାକ୍‌କ ଯୀଶୁକେ ପୁରାଃ କାଜିତେକ ଚିଟାକିୟା ।
 ୪ ଏନାମେନ୍ତେ ପିଲାତୁସ୍‌ ଆଡ଼ଃଗି ଇନିଃକେ କୁଲିକିୟାଏ, “ଚିୟାଃ
 ଆମ୍‌ ଜେଡ଼ନାଃ କାମ୍‌ କାଜିରୁହାଡ଼ାକଆ ? ନେଲ୍‌କୁମ୍‌, ଇନ୍‌କୁ
 ଆମ୍‌କେ ଚିମିନ୍‌ ପୁରାଃ କାଜିତେକ ଚିଟାମେତାନା ।”

୫ ମେନ୍‌ଦ ଯୀଶୁ ଜେଡ଼ନାଃହ କାଏ କାଜିରୁହାଡ଼କିୟା, ଏନାମେନ୍ତେ
 ପିଲାତୁସ୍‌ ଆକ୍‌ଦାୟାୟାନା ।

ୟୀଶୁକେ ଗଏଃନାଙ୍ଗ୍ ବିଚାର୍

(ମାଥୁଉ ୨୭:୧୫-୨୬; ଲୁକ ୨୩:୧୩-୨୫; ଯୋହାନ୍ ୧୮:୩୯-
 ୧୯:୧୬)

୬ ପିଲାତୁସ୍‌ରାଃ ରିଡିଲେକାତେ, ସବେନ୍‌ ପାସକା ପାରାବ୍‌
 ଦିପିଲିରେ ହଡ଼କ ମିଆଁଦ୍‌ ଜେହେଲ୍‌କାନିନିଃକେ ଆସି ତାଇକେନାକ,
 ଇନିଃକେ ପିଲାତୁସ୍‌ ଇନ୍‌କୁନାଙ୍ଗ୍‌ ଆଡ଼ାଗାକତାନ୍‌ ତାଇକେନାଏ
 । ୭ ଦିଶୁମ୍‌ରେ ହାଲାଗୁଲା ହବାୟାନ୍‌ ଦିପିଲିରେ, ହଡ଼ଗଏଃ
 ହରାତେ ଜେହେଲ୍‌କାନିକଏତେ, ବାରବ୍‌ବା ନୁତୁମ୍‌ ମିଆଁଦ୍‌ ହଡ଼ହଁ
 ତାଇକେନାଏ । ୮ ଗାଦେଲ୍‌ ହଡ଼କ ପିଲାତୁସ୍‌ତାଃ ହିଜୁଃୟାନ୍ତେ, ଆମ୍‌
 ଜାନାଅ ରିକାତାନ୍‌ ଲେକା ଆଲେୟାଃ ନାଙ୍ଗ୍‌ ରିକାଗାଲେମ୍‌, ମେନ୍ତେକ
 ଆସିଏଟେଦକିୟା । ୯ ପିଲାତୁସ୍‌ ଇନ୍‌କୁକେ ମେତାଦକଆଏ,
 “ଚିନାଃ ଆଇଙ୍ଗ୍‌ ଆପେୟାଃ ନାଗେନ୍ତେ ଯିହୁଦୀକଆଃ ରାଜାକେଇଙ୍ଗ୍‌
 ଆଡ଼ାଃତାଇୟା ମେନ୍ତେପେ ସାନାଙ୍ଗ୍‌ତାନା ?” ୧୦ ଚିୟାଃଚି ମାରାଙ୍ଗ୍‌
 ଯାଜାକ୍‌କ ହିସଙ୍ଗାତେ ଯୀଶୁକେ ଆଇଃକ୍‌ତାଃରେ ଜିମାକାଇ
 ତାଇକେନାକ, ଏନା ଇନିଃ ଆଟ୍‌କାରକେଦାଏ ।

୧୧ ମୁଲ୍‌ ଯାଜାକ୍‌କ, ଯୀଶୁକେ ବାନଃ ମେନ୍‌ଦ ବାରବ୍‌ବାକେ
 ରାଡ଼ା ନାଗେନ୍ତେ ପିଲାତୁସ୍‌କେ ଆସିପେ ମେନ୍ତେ ଗାଦେଲ୍‌ ହଡ଼କକେ
 ଉସ୍‌କୁରକେଦକଆକ । ୧୨ ପିଲାତୁସ୍‌ ଆଡ଼ଃଗି ହୁଣ୍ଡିଆକାନକକେ
 କୁଲିକେଦକଆଏ, “ଆପେ ଯିହୁଦୀକଆଃ ରାଜା ମେତାଇନିଃକେ
 ଚିନାଃଇଙ୍ଗ୍‌ ଚିକାଇୟା ମେନ୍ତେପେ ସାନାଙ୍ଗ୍‌ତାନା ?”

୧୩ ଇନ୍‌କୁଦ ଆଡ଼ଃଗିକ କାଉରିକେଦାଃ, “ଇନିଃକେ କୁଶ୍‌ରେ
 କିଲାଇମେ ।” ୧୪ ମେନ୍‌ଦ, “ଇନିଃ ଚିନାଃ ଗୁଣ୍ଡାକାଦାଏ ?” ମେନ୍ତେ
 ପିଲାତୁସ୍‌ ଇନ୍‌କୁକେ କୁଲିକେଦକଆଏ ।

ଇନକୁଦ ଆଡ଼ଠାରେ କାଉରିକେଦ୍‌ରେ କାଜିକିୟା, “କୁଣ୍ଠରେ କିଲାଇମେ ।”

^{୧୫} ପିଲାତୁସ୍ ହତକକେ ସୁକୁ ସାନାଙ୍ଗତାନ୍‌ରେ ବାରବ୍‌ବାକେ ଇନକୁଆଃ ନାଗେନ୍ତେ ରାଡାକିୟାଏ । ଏନ୍ତେ ଇନିଃ ଯୀଶୁକେ ହାଁଶ୍‌ସା ରିକାକିଃତେ କୁଣ୍ଠରେ ରାକାବଃକାଏ ମେନ୍ତେ ଇନିଃକେ ଜିମାକିୟାଏ ।

ୟୀଶୁକେ ସିପାଇକ ଲାନ୍ଦାଇତାନା
(ମାଥୂଉ ୨୭:୨୭-୩୧; ଯୋହାନ୍ ୧୯:୨-୩)

^{୧୬} ସିପାଇକ ପିଲାତୁସ୍‌ରାଃ ଅଡ଼ାଃରାଟା ଭିତାର୍‌ରେ ଯୀଶୁକେକ ଇଦିକିୟା, ଆଡ଼ଠ ଗଟା ପାଲଟାନ୍‌କକେ ହୁଣ୍ଡିକେଦ୍‌କଆକ ^{୧୭} ଇନକୁ ଇନିଃକେ ମିଆଁଦ୍ ବାଇଗିନିଆ ଲିଜାଃକ ତୁସିଙ୍ଗକିୟାଃ ଆଡ଼ଠ ଜାନୁମ୍ ମୁକୁର୍ ଗାଲାଙ୍ଗକେଦ୍‌ରେ ଇନିୟାଃ ବହଃରେକ ତୁପୁରିକିୟା । ^{୧୮} ଏନ୍ତେ ଇନକୁ ଇନିଃକେ କାଜି ଏଟେଦ୍‌କିୟାଃକ, “ହେ, ଯିହୁଦୀକଆଃ ରାଜା, ଜାନାଅ ଜାନାଅ ନାଙ୍ଗ ତାଇନଃମେ ।” ^{୧୯} ଇନକୁ ଇନିଃକେ ସଟାତେ ବହଃରେକ ଦାଲ୍‌କିୟା, ବେଏକ୍‌କିୟା ଆଡ଼ଠ ଇକ୍‌ଡୁମ୍‌କେଦ୍‌ତେକ ଜହାର୍‌କିୟା । ^{୨୦} ଇନକୁ ଇନିଃକେ ଲାନ୍ଦାକିତେ ଏନ୍ ବାଇଗିନିଆ ଲିଜାଃକେକ ହଲେଃକକେଦା ଆଡ଼ଠ ଆୟାଃ ଲିଜାଃକେକ ତୁସିଙ୍ଗକିୟା । ଏନ୍ତେ ଇନକୁ ଇନିଃକେ କୁଣ୍ଠରେ କିଲାଇ ନାଗେନ୍ତେ ବାହାରିତେକ ଇଦିକିୟା ।

ୟୀଶୁଆଃ କୁଣ୍ଠରାକାବଃ
(ମାଥୂଉ ୨୭:୩୨-୪୪; ଲୁକ ୨୩:୨୭-୪୩; ଯୋହାନ୍ ୧୯:୧୭-୨୭)

^{୨୧} ✠କୁରିନିରେନ୍ ଶିମୋନ୍ ନୁତୁମ୍ ମିଆଁଦ୍ ହତ୍, ଆଲେକ୍‌ଜାଣ୍ଡାର୍ ଆଡ଼ଠ ରୁପୁସ୍‌ରାଃ ଆପୁତେ, ହାତୁଏତେ ହିଜୁଃତାନ୍‌ଲଃ ଏନ୍ ହରାରେ ପାରମଃତାନ୍ ତାଇକେନାଏ, ଆଡ଼ଠ ପାଲଟାନ୍‌କ ଇନିଃକେକ ଯୀଶୁଆଃ କୁଣ୍ଠକେ ଜାବାର୍‌ଜାସ୍ତି ଗଅଃ ରିକାକିୟାଃକ । ^{୨୨} ଇନକୁ ଯୀଶୁକେ ଗାଲ୍‌ଗାଆ ନୁତୁମ୍ ମିଆଁଦ୍ ଠାୟାଦ୍‌ତେକ ଇଦିକିୟା, ଗାଲ୍‌ଗାଆରାଃ ମୁଣ୍ଡିଦ୍, “ବହଃଜାଙ୍ଗ୍‌ରୁ” । ^{୨୩} ଏନ୍ତାଃରେ ଇନକୁ ଇନିଃକେ ମେହେର୍‌ତେଆଃ ମେସାକାନ୍ ଦାଖ୍‌ରାସି ନୁଁଇ ନାଗେନ୍ତେକ ଏମାଇୟା, ମେନ୍‌ଦ୍ ଯୀଶୁ ଏନା କାଏ ନୁଁକେଦାଃ । ^{୨୪} ଏନ୍ତେ ଇନକୁ

✠ **୧୫:୨୧** ୧୫:୨୧ ରୋମି ୧୭:୧୩.

ଇନିଷକେ କ୍ରୁଶ୍ରେକ ରାକାବ୍‌କିଆ, ଆଡ଼ଃ ଇନିୟାଃ ଲିଜାଃକ, ଅକଏ ଅକନାଃରୁ ନାମେଆଁ ଏନା ଚିଠା* ଉୟୁଃକେଦ୍‌ଡେ ନେଲ୍‌କେଦାଃକ, ଏନ୍ତେ ଆକ ଆକରେଗି ହାଟିଙ୍‌ୟାନାକ । ୨୫ ସେଡାଃରାଃ ନାଅବାଜେ† ଇନ୍‌କୁ ଇନିଷକେ କ୍ରୁଶ୍ରେକ କିଲାକିୟାଃ ୨୬ ଇନିୟାଃ ବିରୁଧ୍‌ରେ ଅଲ୍‌କାନ୍ ଚିଠାରେ, “ଯିହୁଦୀକଆଃ ରାଜା” ମେନ୍ତେ ଅଲ୍‌କାନ୍ ତାଇକେନା । ୨୭ ଇନ୍‌କୁ ବାରିଆ କୁମ୍‌ଡୁକ୍‌କିନ୍‌କେ ଇନିଷଲଃ କ୍ରୁଶ୍ରେକ କିଲାକେଦ୍‌କିନା, ମିଆଁଦ୍‌ନିଷକେ ଜମ୍‌ଡିସାଃରେ, ଏଟାଃନିଷକେ ଲେଙ୍ଗାଡିସାଃରେ । ୨୮ ଏନ୍‌ଲେକାଡେ, ପାବିତାର ଅନଲ୍‌କରେ, “ଏଡକାନ୍‌କଲଃ ଲେକାୟାନାଏ, ମେନ୍ତେ ଧାରାମ୍‌ପୁଅରେ ଅଲ୍‌କାନ୍ କାଜି ପୁରାୟାନା ।”‡

୨୯ ✠ଏନ୍ ହରାରେ ସେନ୍‌ପାରମଃତାନ୍ ହଡକ, ଆକଆଃ ବହଃ ହିଲାଅକେଦ୍‌ଡେ ଇନିଷକେ ନିୟାତାନ୍‌ଲଃ କାଜିକିୟାଃକ, “ବାଃରେ ମାଦିର ହାଡୁଡ୍‌ନିଃ ଆଡ଼ଃ ଆପିମାରେ ବାଇରୁହାଡ୍‌ନିଃ, ୩୦ ମାର୍ କ୍ରୁଶ୍‌ଏଡେ ଆଡ୍‌ଗୁନମେ ଆଡ଼ଃ ବାଞ୍ଚାଅଏନ୍‌ମେ ।”

୩୧ ଏନ୍‌ଲେକାଗି ମୁଲ୍ ଯାଜାକ୍‌କ ଆଡ଼ଃ ଆଇନ୍ ଇଡୁକ, ଯିଶୁକେ ଆକ ଆକରେକ ହିଲାଙ୍‌କିଆ ଆଡ଼ଃ ମେପେନ୍‌ୟାନା “ଏଟାଃକକେଦ୍ ଇନିଃ ବାଞ୍ଚାଅକେଦ୍‌କଆଏ, ମେନ୍‌ଦ ଇନିଃ ଆଇଃକ୍‌ଗି ବାଞ୍ଚାଝେନ୍‌କାଏ ଦାଡିତାନ୍ । ୩୨ ଆମ୍ ସାର୍‌ଡିଗି ଖ୍ରୀଷ୍ଟ, ଇସ୍ରାଏଲ୍‌ରାଃ ରାଜାତାନ୍‌ମେ ରେଦ୍, କ୍ରୁଶ୍‌ଏଡେ ନାହାଃ ଆଡ୍‌ଗୁନକାଏ, ଆଡ଼ଃ ଏନା ନେଲ୍‌କେଦ୍‌ଡେରୁ ବିଶ୍ୱାସୀଡେଆଃ ।” ଆଡ଼ଃ ଇନିଷଲଃ କ୍ରୁଶ୍‌ରେ କିଲାକାନ୍‌କିନ୍ ଇନିଷକେକିନ୍ ହିଲାଙ୍‌କିୟା ।

ୟିଶୁଆଃ ଗନଏଃ

(ମାଥୁର ୨୭:୪୫-୫୬; ଲୁକ ୨୩:୪୪-୪୯; ଯୋହାନ୍ ୧୯:୨୮-୩୦)

୩୩ ତିକିନ୍‌ସିଙ୍‌କରେ ତିନ୍‌ଘାଣ୍ଟା ଜାକେଦ୍ ଗଟା ଦିଶୁମ୍ ନୁବାଃୟାନା । ୩୪ ଆଡ଼ଃ ତିନ୍‌ବାଜେ ଯିଶୁ ପୁରାଃଗି କାଉରିକେଦ୍‌ଡେ କାଜିକେଦାଏ, “ଏଲୋଇ ଏଲୋଇ ଲାମା ସାବାକ୍‌ଆନି ?” ଏନାରାଃ ମୁଣ୍ଡିଦ୍, “ଏ ଆଇଁୟାଃ ପାର୍‌ମେଶ୍ୱାର୍, ଏ ଆଇଁୟାଃ ପାର୍‌ମେଶ୍ୱାର୍, ତିନାଃମେନ୍ତେ ଆଇଙ୍‌କେ ବାଗିକିଦିୟାମ୍ ?”

* ୧୫:୨୪ ୧୫:୨୪ ପାଞ୍ଜିଖାଡ଼ି † ୧୫:୨୫ ୧୫:୨୫ ନାଅବାଜେ ଅରେୟାବାଜେ ‡ ୧୫:୨୮ ୧୫:୨୮ ଚିମିନ୍ ମାରି ଅନଲ୍‌କରେ ନେ ବାଚାନ୍ ବାନଃଆ ✠ ୧୫:୨୯ ୧୫:୨୯ ମାର୍କ ୧୪:୫୮; ଯୋହାନ୍ ୨:୧୯.

୩୫ ଏନ୍ ଜାପାଠରେ ତିଜୁଆକାନକଏତେ ଚିମିନ୍ ହଡ଼କ ନେଆଁ ଆୟୁକେଦତେ କାଜିକେଦା, “ଆୟୁକେଦେ, ଇନିଃ ଏଲିୟକେ ହାକାଅତାନା ।” ୩୬ ଇନ୍କୁଏତେ ମିଆଁଦନିଃ ନିରକେଦତେ ସ୍ତୁଞ୍ଜକେ ମେହେର୍ ରାସିରେ ତୁପୁକେଦାଏ ଆଡ଼ଃ ଏନାକେ ମିଆଁଦ ସଟାରେ ଗୁଡୁକେଦତେ ଯୀଶୁକେ ନୁଁଇ ନାଗେନ୍ତେ ଏମ୍‌କିୟାଏ, ଆଡ଼ଃ ମେନ୍‌କେଦାଏ, “ରାହା କୁଶ୍‌ଏତେ ଇନିଃକେ ଆଡ଼ଗୁ ନାଗେନ୍ତେ ଏଲିୟ ହିଜୁଃତାନାଏ ଚି କାହା ନେଆଁରୁ ନେଲେଆ ।”

୩୬ ଯୀଶୁ ପୁରାଠଗି କାଉରିକେଦାଏ ଆଡ଼ଃ ଜୀଉତାୟାଃ ଅତଙ୍ଗୟାନା ।

୩୭ ମାନ୍ଦିର୍ ଅଡ଼ାଠରେ ହାକାକାନ ହାନାଚିଙ୍ଗ ଦାନାଙ୍ଗଲିଜାଃ ତେତାନଏତେ ଲାଡ଼ାର ଜାକେଦ୍ ଆଲାରେ ବାର୍ ହିସା ଚାଗାଡ଼ୟାନା । ୩୮ କୁଶ୍‌ରାଃ ସାମନାଙ୍ଗରେ ତିଜୁଆକାନ ସିପାଇକଆଃ ଗମକେଽ ଯୀଶୁ ଚିଲକାଏ ଗଏଃୟାନା, ଏନା ନେଲକେଦତେ ମେନ୍‌କେଦାଏ, “ସାର୍‌ତିଗି ନେ ହଡ଼ ପାରମେଶ୍‌ବାର୍‌ଆଃ ହନ୍‌ଗି ତାଇକେନାଏ ।”

୪୦ ☆ଆଡ଼ଃ ଏନ୍ତାଠରେ ଚିମିନ୍ କୁଡ଼ିକ ସାଙ୍ଗିନ୍‌ଏତେ ନେଲତାନ୍‌କ ତାଇକେନା । ଇନ୍‌କୁଆଃ ଆଲାରେ ମାରିୟାମ୍ ମାଗ୍‌ଦାଲିନି, ହୁଡ଼ିଙ୍ଗ୍ ଯାକୁବ୍ ଆଡ଼ଃ ଯୋସିରାଃ ଏଙ୍ଗାତେ ମାରିୟାମ୍, ଆଡ଼ଃ ସାଲୋମିତେକ ତାଇକେନା । ୪୧ ଇନ୍‌କୁ, ଯୀଶୁ ଗାଲିଲ୍‌ରେ ତାଇକେନ୍ ଇମ୍‌ତା ଅତଙ୍ଗ୍‌ଇତାନ୍ ଆଡ଼ଃ ସୁସାରିତାନ୍‌କ ତାଇକେନା । ଇନିଃଲଃ ଯୀରୁଶାଲେମ୍‌ତେ ହିଜୁଃକାନ ପୁରାଃ ଏଟାଃ କୁଡ଼ିକହ ଏନ୍ତାଠରେ ତାଇକେନାକ ।

ଯୀଶୁକେକ ତପାଇତାନା

(ମାଥୂଜ ୨୭:୫୭-୬୧; ଲୁକ ୨୩:୫୦-୫୬; ଯୋହାନ୍ ୧୯:୩୮-୪୨)

୪୨ ଏନ୍‌ହୁଲାଙ୍ଗ୍‌ଦ ସାପ୍‌ଡ଼ାଅନ୍ ହୁଲାଙ୍ଗ୍ ତାଇକେନା, ଏନା ରୁଡ଼ନ୍ ହୁଲାଙ୍ଗ୍‌ରାଃ ସିଦାହୁଲାଙ୍ଗ୍ ତାଇକେନା, ଆଡ଼ଃ ଆୟୁବ୍‌ୟାନ୍‌ଚି, ୪୩ ହାରାମାଥୂୟା ସାହାରରେନ୍ ଯୋଷେଫ୍, ଇନିଃଦ୍ ଯିହୁଦୀକଆଃ ମାରାଙ୍ଗ୍ ପାଞ୍ଚେଟ୍‌ରେନ୍ ମିଆଁଦ୍ ମାଇନାନ୍ ହଡ଼ ତାଇକେନାଏ, ଇନିଃହ ପାରମେଶ୍‌ବାର୍‌ଆଃ ରାଇଜ୍ ନେଲ୍ ହରାତାନ୍

୫ ୧୫:୩୯ ୧୫:୩୯ ମିଦଗାଅ ସିପାଇକଆଃ ମାରାଙ୍ଗ୍ ☆ ୧୫:୪୦ ୧୫:୪୦ ଲୁକ ୮:୨,୩.

ତାଙ୍କକେନାଏ, ଏନାମେନ୍ତେ ଇନିଃ ଜେତାଏକେ କାଏ ବରକେଦ୍‌ତେ ପିଲାତୁସ୍‌ତାଃତେ ବଲୟାନାଏ ଆତଃ ଯୀଶୁଆଃ ଗଏଃ ହଡ଼୍‌ଫ ଆସିକିୟାଏ । ୪୪ ଯୀଶୁଆଃ ଜୀଉଟୁଣ୍ଡୁୟାନା ମେନ୍ତେ ଆୟୁମ୍‌କେଦ୍‌ତେ ପିଲାତୁସ୍ ଆକ୍‌ଦାନ୍‌ଆୟାନା । ଇନିଃ ସିପାଇକଆଃ ଗମ୍‌କେ କେ କେଡ଼ାକେଦ୍‌ତେ, ଚିୟାଃ ଇନିଃ ଗଏଃୟାନାଏ ମେନ୍ତେ ଇନିଃକେ କୁଲିକିୟାଏ । ୪୫ ପିଲାତୁସ୍ ସିପାଇକଆଃ ଗମ୍‌କେୟାଃ କାଜିତେ ଏନା ଆଟ୍‌କାର୍‌କେଦ୍‌ତେ, ଇନିଃ ଯୀଶୁଆଃ ଗଏଃହଡ଼୍‌ଫ ଯୋଷେଫ୍‌କେ ଏମ୍‌କିୟାଏ । ୪୬ ଯୋଷେଫ୍ ନିରାଲ୍ ଲିଜାଃ କିରିଙ୍ଗ୍‌କେଦ୍‌ତେ ଯୀଶୁକେ କୁଶ୍‌ଏତେ ଆଡ଼ଗୁକିଆଏ ଆତଃ ଏନ୍ ଫୀର୍‌ଚି ନିରାଲ୍ ଲିଜାଃରେ ପଟମ୍‌କିୟାଏ, ଆତଃ ସେରେଙ୍ଗ୍‌ରେ* ଉରାକାନ୍ ତପାଗାଡ଼ାରେ ଗିତିଃକିୟାଏ । ଏନ୍ତେ ଏନ୍ ଦୁଆରକେ ମିଆଁଦ୍ ମାରାଙ୍ଗ୍ ଦିରିତେ ବାଟିକେସେଦ୍‌ତାଦାଏ । ୪୭ ମାଗ୍‌ଦାଲିନି ମାରିୟାମ୍ ଆତଃ ଯୋସିଆଃ ଏଙ୍ଗାତେ ମାରିୟାମ୍ ଇନିଃକେ ଅକ୍‌ତାଃରେ ତପାକିୟାକ ଏନାକିନ୍ ନେଲ୍‌କେଦା ।

୧୭

ୟୀଶୁଆଃ ଜୀଉବିନିରିଦ୍ (ମାଥ୍‌ଉ ୨୮:୧-୮; ଲୁକ ୨୪:୧-୧୨; ଯୋହାନ୍ ୨୦:୧-୧୦)

୧ ରୁଡ଼ନ୍ ଝୁଲାଙ୍ଗ୍ ସେନଃୟାନ୍‌ଚି ମାଗ୍‌ଦାଲିନି ମାରିୟାମ୍, ଯାକୁବରାଃ ଏଙ୍ଗାତେ ମାରିୟାମ୍, ଆତଃ ସାଲୋମି ସେନ୍‌କେଦ୍‌ତେ ଯୀଶୁଆଃ ଗଏଃ ହଡ଼୍‌ଫରେ ଗସଗେ ନାଗେନ୍ତେ ବୁଗିନ୍ ସହାନ୍ ସୁନ୍‌ମ୍‌ତେୟାଃ କିରିଙ୍ଗ୍‌କେଦାଃ । ୨ ଏତଆର୍ ଝୁଲାଙ୍ଗ୍ ସେତାଃ ଇଦାନ୍‌ରେ ସିଙ୍ଗି ତୁରଃଲଃଗି ଇନ୍‌କୁ ତପାଗାଡ଼ା ଠାୟାଦ୍‌ତେ ସେନଃତାନ୍ ତାଙ୍କକେନାକ, ୩ ଆତଃ ଇନ୍‌କୁ ଆକ ଆକରେ ମେପେନ୍‌ୟାନାକ, “ତପାଗାଡ଼ା ଦୁଆରରେୟାଃ ପୁରାଃ ମାରାଙ୍ଗ୍ ଦିରିକେ ଅକଏ ବାଟିଆତମାବୁଆଏ ?” ୪ ମେନ୍‌ଦ ଇନ୍‌କୁ ଏନ୍ ଦିରିକେ ଆତମ୍‌ବାଟିକାନ୍ ନେଲ୍‌କେଦାକ, ଏନାଦ ପୁରାଃ ମାରାଙ୍ଗ୍ ଦିରି ତାଙ୍କକେନା । ୫ ତପାଗାଡ଼ାରେକ ବଲୟାନ୍‌ଚି, ପୁଣି ଲିଜାଃ

* ୧୫:୪୭ ୧୫:୪୭ ଦିରିତେ ପେରେଜାକାନ୍ ବୁରୁ

ତୁସିଙ୍ଗିଆଁକାନ ମିଆଁଦ୍ ସେପେଡ଼େଦ୍‌କେ ଜମ୍‌ସାଃରେ ଦୁବାକାନକ ନେଲ୍‌କିୟାଃ, ଆତଃକ ଆକ୍‌ବାକାଅୟାନା ।

୬ ଇନିଃଦ ମେତାଦକଆଏ, “ଆଲ୍‌ପେ ବରଏୟା, କ୍ଳୁଟ୍‌ରେ କିଲାଗଏଃୟାନ୍ ନାଜ୍‌ରେଡ଼୍‌ରେନ୍ ଯୀଶୁକେପେ ଦାଣୀତାନା, ଇନିଃ ଜୀଉବିରିଦ୍‌ୟାନାଏ, ଇନିଃ ନେତାଃରେ ବାଙ୍ଗାଲୟା । ନେଲେପେ, ନେ ଠାୟାଦ୍‌ରେଗି ଇନିଃକେକ ବାଟିଆକାଇ ତାଇକେନା । ୭ *ମେନ୍‌ଦ ଜୁ ରୁହାଡ଼୍‌ପେ, ଆୟାଃ ଚେଲାକକେ ଆତଃ ପାଡ଼୍ରାସକେ ଉଦୁବାକପେ, ଆପେଏତେ ଆୟାର୍‌ରେ ଇନିଃ ଗାଲିଲ୍‌ଡେ ସେନଃତାନା, ଇନିଃ କାଜିୟାଦ୍‌ପେ ଲେକା ଏନ୍ତାଃରେ ଇନିଃକେପେ ନେଲିୟା ।”

୮ ଆତଃ ଇନ୍‌କୁ ଅତଙ୍ଗୟାନ୍‌ଟି ବରତାନ୍ ଆତଃ ଏକ୍‌ଲାଅଃତାନ୍‌ଲଃ ତପାଗାଡ଼ାତାଃଏତେକ ନିରୁୟାନା । ଇନ୍‌କୁକେଦ ବରଭେଦାଅ ହରାତେ ଜେତାଏକେ ଜେଡ଼ନାଃ କାକ କାଜିୟାଦ୍‌କଆ ।

ୟୀଶୁ ବାଋହଡ଼୍ ଚେଲାକିନ୍‌ତାଃରେ ଉଦୁବେନ୍‌ୟାନାଏ

(ଲୁକ ୨୪:୧୩-୩୫; ମାଥୁଉ ୨୮:୯-୧୦; ଲୁକ ୨୪:୧୦-୧୧; ଯୋହାନ୍ ୨୦:୧୧-୧୮)

୯ ଯୀଶୁ ହାପ୍ତାରାଃ ପାହିଲାହୁଲାଙ୍ଗ୍ ସେତାଃଇଦାନ୍‌ରେ ଜୀଉବିରିଦ୍‌କେଦ୍‌ଡେ, ଇନିଃ ସିଦାତେ ମାଗ୍‌ଦାଲିନି ମାରିୟାମ୍‌ତାଃରେ ଉଦୁବେନ୍‌ୟାନା, ଇନିଃତାଃଏତେ ସାଡ଼ୁ ବଙ୍ଗାକକେ ଅତଙ୍ଗକାକ ତାଇନା । ୧୦ ଇନିଃ ସେନ୍‌ୟାନ୍ତେ ଯୀଶୁଲଃ ତାଇକେନ୍‌କକେ ଉଦୁବାଦ୍‌କଆଏ । ଇନ୍‌କୁଦ ରାଆଃତାନ୍ ଆତଃ ଏୟମ୍‌ତାନ୍‌କ* ତାଇକେନା । ୧୧ ଇନିଃ ଇନ୍‌କୁକେ ଯୀଶୁ ଜୀଉବିରିଦାକାନାଏ ଆତଃ ଆୟାଃତାଃ ଉଦୁବେନ୍‌ୟାନାଏ ନେଆଁ କାଜିକେଦ୍‌କଆଏ, ମେନ୍‌ଦ ଇନ୍‌କୁ ଇନିଃକେ କାକ ବିଶ୍ୱାସ୍‌କିୟାଃ ।

୧୨ ଏନ୍ ତାୟମ୍‌ଡେ, ଇନ୍‌କୁଏତେ ବାଋହଡ଼୍, ହାଡୁଡେକିନ୍ ରୁହାଡ଼୍‌ତାନ୍ ଦିପିଲିରେ, ଯୀଶୁ ଏଟାଃ ମେଦ୍‌ମୁହାଡ଼୍‌ୟାନ୍ତେ ଇନ୍‌କିନ୍‌ତାଃ ହରାରେ ଉଦୁବେନ୍‌ୟାନାଏ । ୧୩ ଇନ୍‌କିନ୍

☆ ୧୭:୭ ୧୭:୭ ମାଥୁଉ ୨୭:୩୨; ମାର୍ଚ୍ଚ ୧୪:୨୮. * ୧୭:୧୦ ୧୭:୧୦ କୁସୁଦ୍ କୁସୁଦ୍ ରାଆଃ

ରୁହାଡ଼କେଦତେ ଏଟାଃ ଚେଲାକକେ ଏନା ଉଦୁବାଦକଆକିନ୍, ମେନ୍ଦଦ ଇନ୍କୁ ଇନ୍କିନାଃ କାଜିୟଃ କାକ ବିଶ୍ୱାସକେଦାଃ ।

ୟାଶୁ ଏଗାରାଝାନ୍କତାଃ ଉଦୁବେନ୍ତାନାଏ

(ମାଥୂଉ ୨୮:୧୭-୨୦; ଲୁକ ୨୪:୩୬-୪୯; ଯୋହାନ୍ ୨୦:୧୯-୨୩; ପ୍ରେରିତ୍ ୧:୬-୮)

୧୪ ତାୟମତେ ଯାଶୁ ଏଗାରାଝାନ୍ ଚେଲାକତାଃରେ ଜମ୍ବକ ଦୁବାକାନ୍ ଦିପିଲିରେ ଉଦୁବେନ୍ୟାନାଏ ଆତଃ ଅକନକ ଇନିଃକେ ଜୀଉବିରିଦାକାନ୍ ନେଲ୍କାଇ ତାଇକେନାକ, ଇନ୍କୁଆଃ କାଜିକକେ କାକ ବିଶ୍ୱାସକେଦା ଆତଃ ଇନ୍କୁଆଃ କେଟେଦମନ୍ ନାଗେନ୍ତେ ଇନିଃ ଇନ୍କୁକେ ମାରାଙ୍ଗମଚାକେଦକଆଏ । ୧୫ ☆ଇନିଃ ଇନ୍କୁକେ ମେତାଦକଆଏ, “ଜୁ ଗଟା ଅତେଦିଶୁମ୍ତେପେ ଆତଃ ସବେନ୍ ହଡକକେ ନେ ସୁକୁକାଜି ଉଦୁବାକପେ । ୧୬ ବିଶ୍ୱାସେନିଃ ଆତଃ ବାପ୍ତିସ୍ନାଅନିଃ ବାଞ୍ଚାଅଥାଏ, ମେନ୍ଦଦ କା ବିଶ୍ୱାସେନିଃ ବିଚାରକେଦତେ ପାରମେଶ୍ୱାର୍ତାଃଏତେ ସାଜାଇ ନାମେୟାଏ । ୧୭ ବିଶ୍ୱାସ୍ତାନକକେଦ ପେଡେଃକରାଃ କାମି ନାଗେନ୍ତେ ପେଡେଃ ଏମଃଆ; ଇନ୍କୁ ଆଇଁୟାଃ ନୁଡୁମତେ ବଙ୍ଗାକ ହାଉଅଡଙ୍ଗକଆ, ଇନ୍କୁ ନାଞ୍ଜା ଜାଗାରକ ବାଗାଣେଆ । ୧୮ ଇନ୍କୁ ବିଙ୍ଗକକେ ହାଲାଙ୍ଗକରେ ଚାଏ ମାହୁଁରାକ ନୁଁଏରେଅଃ ଜେତାକାକ ରିକାଅଆଃ, ଇନ୍କୁ ଦୁକୁହାସୁତାନକଆଃ ଚେତାନରେ ଆକଆଃ ତିଃଇକ ଦହଲେରେ, ଇନ୍କୁ ବୁଗିଅଃଆକ ।”

ୟାଶୁ ସିର୍ମାତେ ସେନଃତାନାଏ

(ଲୁକ ୨୪:୪୦-୫୩; ପ୍ରେରିତ୍ ୧:୯-୧୧)

୧୯ ☆ୟାଶୁ ପ୍ରାଭୁ ନେଆଁ କାଜିକେଦକଟି, ସିର୍ମା ଦିଶୁମ୍ତେ ଇଦିୟାନା ଆତଃ ଇନିଃ ପାରମେଶ୍ୱାର୍ତାଃ ଜମ୍ବତିସାଃରେ ଦୁବ୍ୟାନାଏ । ୨୦ ଏନ୍ତେ ଚେଲାକ ସେନଃୟାନ୍ତେ ସବେନ୍ତାଃରେ ପାରଚାରକେଦାଃକ, ଆତଃ ପ୍ରାଭୁ ଇନ୍କୁଲଃ କାମିକେଦାଏ ଆତଃ

☆ ୧୭:୧୫ ୧୭:୧୫ ପ୍ରେରିତ୍ ୧:୮. ☆ ୧୭:୧୯ ୧୭:୧୯ ପ୍ରେରିତ୍ ୧:୯-୧୧.

ଆୟାଃ ଉଦୁବଃତାନ କାଜିକେ ଚିହ୍ନାତେ ସାର୍ତ୍ତି ତାନାଃ ମେନ୍ତେ
ପକ୍ତାକେଦାଏ ଆତଃ ଗାଞ୍ଜା ଏମ୍‌କେଦାଏ ।†

† ୧୭:୨୦ ୧୭:୨୦ ଚିନିନ୍ ମାରି ଅନଲ୍‌କରେ ୯-୨୦ ପାଦ୍ ବାନଃଆ

ପାରମେଶ୍ଵରୀୟାଃ ଜୀନିଦ୍ ବାଚାନ୍
The New Testament in the Munda language of India:
ପାରମେଶ୍ଵରୀୟାଃ ଜୀନିଦ୍ ବାଚାନ୍

copyright © 2020 The Word for the World International

Language: ମୁଞ୍ଜା (Muṅḍa) (Munda)

Contributor: The Word for the World International

ପାରମେଶ୍ଵରୀୟାଃ ଜୀନିଦ୍ ବାଚାନ୍
ନାଞ୍ଜା ନିୟାମ୍ , 2020

The New Testament in Munda Language

The Word for the World International

This translation is made available to you under the terms of the Creative Commons Attribution license 4.0.

You may share and redistribute this Bible translation or extracts from it in any format, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2023-04-13

PDF generated using Haiola and XeLaTeX on 22 Feb 2024 from source files dated 14 Apr 2023

903abb6b-97c3-582d-9df8-a6a8f2fce6d6